





# **DIE KERKORDE**

## **VAN DIE NEDERDUITSE GEREFORMEERDE KERK**

met Reglemente, Kerkordelike Riglyne en Funksionele Besluite  
soos vasgestel deur die  
Algemene Sinode in Oktober 2002



Saamgestel deur Prof Pieter Coertzen  
Aktuaris van die Algemene Sinode

**LUX VERBL.BM**

# VERKLARING

Tydens die vergadering van die Algemene Sinode van die NG Kerk het ons as afgevaardigdes al hoe meer oortuig geraak van die liefde van Christus en daarom ook van die NG Kerk se roeping en plek in Suider-Afrika.

Daarom:

- (a) verbind ons ons opnuut aan die Here wat ons Kerk 350 jaar gelede hier geplaas het. Ons dank Hom vir die voorreg om ook nou deel van Sy kerk te kan wees. Ons is daarvan oortuig dat net die Evangelie van Christus ons op 'n pad van heil kan plaas. Daarom wil ons as Kerk die Woord van die Here tydig en ontydig verkondig en orals getuienis aflê van die hoop wat in ons leef;
- (b) verbind ons ons opnuut tot ons vasteland, in die besonder Suider Afrika. Die tragiese verhale van die allerverskriklike vorms van geweld, die geweldige omvang van armoede en gevolglike hongersnood, die gevolge van die vigsandemie, die gebrek aan respek vir mense, diere en die omgewing en ook ons aandeel daaraan, het ons ontstel. Die Sinode betuig sy meegevoel aan die talle slagoffers. Ons wil ook 'n verskil maak. Daarom verbind ons ons om mee te werk aan oplossings vir ons samelewing. Ons stel ons as kerk beskikbaar om op elke vlak waar ons kan help betrokke te raak. Ons verseker die owerheid van ons voorbidding en ons verbintenis tot diens aan die gemeenskap;
- (c) verbind ons ons tot groter eenheid met ander kerke. Ons wil graag herenig met ons kerkfamilie, soos ons glo God dit wil hê. Ons wil ook graag ons ekumeniese bande bevestig en uitbrei en saam met alle ander Christene hande vat om ons lande op te bou en pynlike omstandighede te verlig;
- (d) roep ons gemeentes op om by die genesing van ons land betrokke te raak. Ons dank die Here vir die toewyding van lidmate en die talle positiewe aksies waarvan ons orals hoor. Kom ons wys die wêreld opnuut dat ons as “sout van die aarde” en “lig van die Wêreld” God se Koninkryk wil laat kom.

Ons het 'n Here. Ons is hier. Ons is Sy kerk.

Aan God al die eer.

# VOORWOORD

Hiermee die *Kerkorde, Bepalinge, Reglemente en Kerkordelike Riglyne en Besluite* soos goedgekeur deur die Algemene Sinode van 2002. Dit is die orde wat vir die volgende paar jaar in die hele verband van die NG Kerk sal geld – in alle gemeentes, kerkrade, ringe, sinodes en die Algemene Sinodale verband.

Soos in die verlede wil ook hierdie orde 'n kontemporêre vergestaltung wees van die beginsels van kerklike orde wat in God se Woord gevind word. Of ons die Woord reg gehoor het, is 'n volgende vraag. Daarom mag ons nooit in ons geldende orde berus asof dit 'n volmaakte orde is nie. Ons moet mekaar help deur die orde wat geld voortdurend te toets aan Skrif en belydenis – *ecclesia reformata semper reformanda*.

In hierdie Kerkorde kom verskeie belangrike sake na vore. Van die belangrikstes is dat die NG Kerk sy reg om sy eie interne orde te reël, bevestig; verder word gereël dat geen lidmaat, ampsdraer of amptenaar in die Kerk hulle op die burgerlike reg sal beroep vóór hulle nie eers al die kerklike middele tot hulle beskikking benut het nie en dan word daar weer 'n groter gesag aan die ringe toegeken in allerlei sake betreffende die orde in die kerk onder meer die opsig en tug oor ampsdraers.

Verskeie persone het hard gewerk om die Kerkorde so gou as moontlik na die Algemene Sinode beskikbaar te maak. Ter erkenning van en met dank aan hulle noem ek hulle name: Drr GJ Cloete en PR du Toit; dii. HJ Kleynhans, JJ Wessels, JH Windell, K Delport, JJ Louw, PFJ van Vuuren, F Maritz en mev Wilma Riekert.

P Coertzen  
Voorsitter ARK  
Stellenbosch  
4 Desember 2002

# INHOUDSOPGAWE

<b>DIE KERKORDE</b> .....	1
<b>Die belydenis en orde van die kerk</b> .....	1
<b>Die ampte van die kerk</b> .....	1
Algemene bepalinge .....	1
Die bedienaars van die Woord .....	2
Ouderlinge en diakens .....	10
<b>Die vergaderinge van die kerk</b> .....	11
Algemene bepalinge .....	11
Besondere bepalinge .....	14
Die kerkraad .....	14
Die ring .....	15
Die sinode .....	16
Die Algemene Sinode.....	17
<b>Die arbeid van die kerk</b> .....	19
Die openbare erediens .....	19
Die sakramente .....	20
Die Doop .....	20
Die Nagmaal .....	20
Die Jeugbediening .....	21
Die Herderlike sorg .....	21
Gemeentebediening .....	21
Sending/getuienis.....	21
Diens van barmhartigheid.....	22
Die Dienswerk van die gelowiges .....	22
Leer en aktuele sake .....	22
Rentmeesterskap .....	22
<b>Kerklike opsig en tug</b> .....	23

Diensverhoudinge.....	23
Tugwaardige sondes.....	24
Die amptelike ondersoek.....	24
Tugmaatreëls .....	27
Appèlle.....	28
Opheffing van Tugmaatreëls.....	28
<b>Betrekkinge van die kerk na buite</b> .....	30
Kerk en staat.....	30
Kerk, maatskappy en vrye vereniging.....	30
Kerk en onderwys.....	30
Kerk en ekumeniese betrekkinge .....	31

## **REGLEMENTE**

1. Reglement: Algemene Sinodale Kommissie (ASK).....	37
2. Reglement vir die Algemene Kommissie vir Argief en Inligting (AKAI).....	39
3. Reglement vir die Reëling van die Bevoegdheid van Predikante en Proponente.....	41
4. Reglement vir die Algemene Kommissie vir Bybelvertaling, -Verklaring en –Verspreiding (AKBV) .....	47
5. Reglement vir die Algemene Kommissie vir die Diens van Barmhartigheid (AKDB).....	49
6. Reglement vir die vermeerdering, kombinerings, eenwording en samesmelting van gemeentes.....	51
7. Reglement vir die Algemene Kommissie vir Fondse (AKF).....	58
8. Reglement vir die Algemene Kommissie vir Gemeentebediening (AKG).....	59
9. Reglement vir die reëling van eiendomme, goedere en fondse .....	60
10. Reglement vir die Algemene Jeugkommissie (AJK) .....	71
11. Reglement vir die Algemene Kommissie vir Kerklike Media (AKKM).....	72
12. Reglement vir Kerklike Jeugwerkers .....	74
13. Reglement vir die Algemene Kommissie vir Leer en Aktuele Sake	

(AKLAS) .....	75
14. Reglement vir die Reëling van die Opleiding en Legitimasië van Evangeliedienaars .....	76
15. Reglement van Orde .....	86
16. Reglement vir die Algemene Regskommissie (ARK) .....	92
17. Reglement vir die Algemene Sinodale Kommissie vir Getuïenis (ASKG) .....	93
18. Reglement vir die Sending/Getuïenis van die NG Kerk .....	94
19. Reglement vir Tentmakerbediening .....	99
20. Reglement vir die Algemene Kommissie vir Teologiese Opleiding (AKTO) .....	101
21. Die Nederduitse Gereformeerde Kerk en ander Christelike Kerke en Groepe .....	102
22. Reglement vir die Verlof van Predikante en Sinodale Amptenare .....	106
23. Reglement vir die Algemene Kommissie vir Vrouelidmate (AKV) .....	109
24. Reglement vir die Algemene Kommissie vir Getuïenisaksie (AKGA) .....	110
25. Reglement vir die Algemene Kommissie vir Diensverhoudings .....	111
26. Reglement vir die Algemene Kommissie vir die Erediens (AKE) .....	112

## **KERKORDELIKE RIGLYNE EN FUNKSIONELE BESLUITE**

### **Kerkordelike Riglyne**

1. Beginsels, Besluite, Riglyne en Handleidings .....	113
2. Riglyne vir die Beslegting van Kerklike geskille .....	113
3. Riglyne vir die Bediening van die Nagmaal buite die Erediens .....	114
4. Riglyne vir samewerking met ander sending-organisasies .....	114
5. Riglyne vir die bevoegdheid van Leraars van die NG Kerk wat saam met ander organisasies of kerke werk .....	114
6. Riglyne vir vergoeding aan werkgewers .....	115

### **Kerkordelik-funksionele besluite**

7. Argief .....	116
8. Besluite oor die Funksionering van die Algemene Sinode .....	116



9.	Bediening van dooplidmate in skoolkoshuise.....	117
10.	Bediening van sakramente deur proponente .....	117
11.	Beroepbaarheid van leraars binne die familie van NG Kerk .....	117
12.	Brits-Israelse Beweging.....	117
13.	Bybel.....	117
14.	Doop .....	118
15.	Geloftedag as versoeningsdag .....	119
16.	Kapelane .....	119
16.	Kerklied .....	120
17.	Kerklike lidmaatskap.....	120
18.	Kerkrade wat dit nie kan bekostig om te beroep nie.....	122
19.	Legitimasië met beperkte opdrag .....	122
20.	Misbruik rondom die beroepstelsel .....	123
21.	NG Kerkseel.....	123
22.	Nagmaal.....	123
23.	Omruilings van standplase .....	125
24.	Outeursreg en sangbundels.....	126
25.	Predikante .....	127
26.	Proponente.....	127
27.	Samestelling van kerkrade.....	128
28.	Sinodale grenswysigings .....	128
29.	Vrymesselary .....	128
	INDEKS .....	129

# **DIE KERKORDE**

## **HOOFSTUK 1**

### **DIE BELYDENIS EN ORDE VAN DIE KERK**

#### **Artikel 1**

Die Nederduitse Gereformeerde Kerk staan gegrond op die Bybel as die heilige en onfeilbare Woord van God. Die leer wat die Kerk in ooreenstemming met die Woord van God bely, staan uitgedruk in die Formuliere van Eenheid soos vasgestel op die Sinode van Dordrecht in 1618-1619, naamlik die sewe en dertig artikels van die Nederlandse Geloofsbelijdenis, die Heidelbergse Kategismus en die vyf Dordtse Leerreëls.

#### **Artikel 2**

- 2.1 Waar die Woord van God eis dat in die gemeente van Christus alles welvoeglik en ordelik moet toegaan (1 Kor 14:40), word in die volgende artikels 'n aantal bepalinge gegee vir die lewe en werk van die Kerk met die oog op die volbrenging van sy taak en roeping ooreenkomstig die Heilige Skrif en die Belydenis.
- 2.2 Hierdie bepalinge handel oor die ampte in die Kerk, die vergaderinge van die Kerk, die werksaamhede van die Kerk, regering en tug van die Kerk en die betrekkinge van die Kerk na buite.
- 2.3 Die Nederduitse Gereformeerde Kerk reël sy eie interne orde op grond van sy onvervreembare roeping en interne bevoegdheid as kerk van Jesus Christus en ook op grond van sy reg tot vryheid van godsdiens.

## **HOOFSTUK 2**

### **DIE AMPTE VAN DIE KERK**

#### **2.1 Algemene bepalinge**

#### **Artikel 3**

- 3.1 Christus self deur die Heilige Gees verrig al die dienswerk in sy kerk. Hy doen dit deur:
  - 3.1.1 die dienswerk van al die gelowiges;
  - 3.1.2 die dienswerk van die drie besondere ampte, te wete:
    - \* dié van bedienaar van die Woord<sup>1</sup>

---

<sup>1</sup> In die Kerkorde verwys "leraar", "evangeliedienaar" en "predikant" na "bedienaar van die Woord" en het die begrippe ooreenstemmende betekenis.

- \* dié van ouderling
- \* dié van diaken.

3.2 Hierdie drie ampte is gelykwaardig, maar word in opdrag en werk onderskei. By die uitoefening van hulle roeping mag geen ampsdraer oor ander ampsdraers heerskappy voer nie, aangesien Christus die enigste Hoof, Koning en Meester van sy kerk is.

## Artikel 4

Niemand mag in die kerk van Christus in een van die besondere ampte dien sonder dat hy/sy

- \* op wettige wyse beroep (of verkies) is,
- \* die nodige approbasie verkry het, en
- \* bevestig is nie.

## 2.2 Die bedienaars van die Woord

### Artikel 5

5.1 Vir die toelating tot die bediening van die Woord word vereis:

5.1.1 'n geskiktheid vir die amp;

5.1.2 'n deeglike teologiese opleiding; en

5.1.3 die ondertekening van die legitimasieverklaring waarin die ondertekening van die Formuliere van Eenheid vervat is.

5.2 Die Algemene Sinode bepaal die vereistes vir die opleiding, die aard en die toesig daaroor en die plekke waar dit moet geskied.

5.3 Die sorg vir, asook die beheer en toesig oor die opleiding van evangeliedienaars word deur 'n kuratorium behartig.

5.3.1 Wanneer meer as een sinode om historiese of ander redes by 'n kuratorium betrokke is, reël die betrokke sinodes onderling die wyse waarop die kuratorium saamgestel word. Ander sinodes het die reg om op eie koste elk een verteenwoordiger in die kuratorium te benoem.

5.3.2 Die kuratorium is verantwoordelik vir die keuring, begeleiding, toesighouding oor, eksaminering en aanbeveling vir toelating tot die evangeliebediening van teologiese studente. Hierdie verantwoordelikhede kan namens die kuratorium deur (n) kommissie(s) van die kuratorium behartig word.

5.3.3 Die raad van dosente is meer bepaald vir die akademiese opleiding van die studente verantwoordelik.

5.3.4 Een lid van die raad van dosente het met adviserende stem sitting in die kuratorium.

5.4 Ten opsigte van universiteite waar daar nie 'n teologiese fakulteit van die Nederduitse Gereformeerde Kerk bestaan nie, geskied die keuring, begeleiding en toesighouding oor studente wat met die eerste fase van die opleiding vir die evangeliebediening besig is, deur 'n sinodale kommissie vir begeleiding wat deur die betrokke sinode benoem word.

5.5 Die kuratorium benoem 'n eksamenkommissie wat bestaan uit soveel lede as wat hy nodig ag uit bevoegde persone voorgelê aan die kuratorium deur die onderskeie sinodes en wat nie noodwendig lede van die kuratorium hoef te wees nie.

Die eksamenkommissie het as opdragte:

5.5.1 Die keuring en aanbeveling by die kuratorium van kandidate ná voltooiing van hul teologiese studies.

5.5.2 Die afneem van *colloquium doctum*.

## Artikel 6

Die verlening van ampsbevoegdheid as bedienaar van die Woord in al sy gestaltes (KO art. 9) of die wegneem daarvan geskied deur die Algemene Regskommissie namens die Algemene Sinode.

## Artikel 7

- 7.1 'n Bedienaar van die Woord vir 'n plaaslike gemeente word deur die kerkraad van die gemeente met goedkeuring van die gemeente en die ring, beroep. Voordat die beroepsbrief afgestuur word, moet
  - 7.1.1 die goedkeuring van die gemeente deur afkondiging verkry word;
  - 7.1.2 die Ring (of sy gevolmagtigde Kommissie) skriftelik bevestig dat daar aan al die kerklike vereistes vir die uitbring van die beroep voldoen is. Indien nie aan die vereistes voldoen is nie, word die beroep deur die Ring of sy gevolmagtigde Kommissie ongeldig verklaar.
  - 7.1.3 Besware teen 'n beroep of beroepene word by die betrokke ring of ringskommissie ingedien wat dit volgens die Bepalings van die betrokke sinodale gebied hanteer.
- 7.2 Bedienaars van die Woord in diens van die kerkverband (Ring, Sinode of Algemene Sinode (sien Regl. 3: 2.3.1 en 2.3.2)) word deur die betrokke kerkvergadering of sy gevolmagtigde kommissie beroep. Voordat die Beroepsbrief afgestuur word, moet
  - 7.2.1 die goedkeuring van die kerkverband verkry word deur bekendmaking van die beroep in Die Kerkbode en
  - 7.2.2 die betrokke Sinodale Regs-/Kerkordekommissie of sy gevolmagtigde skriftelik bevestig dat daar aan al die kerklike vereistes vir die uitbring van die beroep voldoen is. Indien nie aan die vereistes voldoen is nie, word die beroep deur die betrokke Sinodale Regs-/Kerkordekommissie of sy gevolmagtigde na die kerkvergadering terugverwys vir regstelling, of, indien nodig, die beroep ongeldig verklaar.
- 7.3 Die beroepsvergadering stel die beroepsbrief op.
  - 7.3.1 'n Verteenwoordiger van die Ringskommissie, wat nie lid van die betrokke gemeente is nie, adviseer die kerkraad
  - 7.3.2 In gevalle van beroepe deur die kerkverband, word die advies deur die betrokke Sinodale Regs-/Kerkordekommissie of sy gevolmagtigde gegee.
- 7.4 Die beroepsbrief is die diensaanbod wat aan die hand van KO art. 9 die diensopdrag en na aanleiding van KO art. 13 die diensvoordele van die beroepene omskryf. In gevalle van beroepe deur die kerkverband, word die nodige aanpassings gemaak ten opsigte van die diensopdrag en diensvoordele.
- 7.5 Binne die raamwerk van die Kerkorde en die sinodale besluite van toepassing is die bepalinge in die beroepsbrief onderhandelbaar by oorweging van die beroep.
- 7.6 Na oorweging van die bepalinge van die beroepsbrief en enige onderhandelinge daartoe, word die diensoooreenkoms waarvolgens die bedienaar van die Woord in diens van die gemeente of die kerkverband gaan tree, finaal opgestel.
- 7.7 Die finale diensoooreenkoms met 'n gemeenteleraar word deur die Ring (of sy gevolmagtigde Kommissie) en in geval van 'n Bedienaar van die Woord in diens van die kerkverband deur die betrokke Sinodale Regs-/Kerkordekommissie of sy gevolmagtigde goedgekeur. Hierna word die finale ooreenkoms deur beide partye onderteken en kan die bevestiging plaasvind met in agneming van die ander vereistes vir bevestiging (sien KO art. 8).
- 7.8 Hierdie diensoooreenkoms kan van tyd tot tyd gewysig word met instemming van beide partye en skriftelike goedkeuring van die Ring (of sy gevolmagtigde Kommissie) in die geval van 'n gemeenteleraar, en die betrokke Sinodale Regs-/Kerkordekommissie of sy gevolmagtigde in die geval van 'n leraar in diens van die kerkverband.

## **Besluite by Artikel 7**

### **7b1 Proforma vir 'n beroepsbrief en die finale diensooreenkoms.**

- 7b1.1 *Identifikasie van die partye.*
- 7b1.2 *Aanhef.*
- 7b1.3 *Diensomskrywing: Algemene diensverpligtinge (Artikel 9) met gepaardgaande spesifieke verwagtinge.*
- 7b1.4 *Vergoeding en byvoordele (Artikel 13).*
- 7b1.5 *Die wedersydse erkenning deur die partye dat hulle geskrewe ooreenkoms onderhewig is aan die bepalinge van die Kerkorde en die besluite van die Algemene Sinode en die betrokke sinode soos van tyd tot tyd gewysig.*
- 7b1.6 *Aanvangsdatum (a) in die geval van leraars in diens van gemeentes of in diens van die kerkverband, die datum van demissie. (b) in ander gevalle waar 'n beroep aanvaar is, is die aanvangsdatum die datum van bevestiging of 'n datum soos ooreengekom.*
- 7b1.7 *'n Verklaring deur die beroepene dat daar geen hangende of dreigende tughandeling teen hom/haar is nie en dat hy/sy aan die plegtige legitimasie-verklaring getrou sal bly.*
- 7b1.8 *Die partye se handtekeninge met getuies en datum van ondertekening as aanvaarding dat 'n diensooreenkoms tussen die partye tot stand kom.*

### **7b2 Besluit ter verduideliking van Art. 7.1:**

- 7b2.1 *Hierdie beroeping vind plaas vanuit 'n groslys wat saamgestel is op die volgende wyse:*
  - 7b2.1.1 *Die kerkraad van die beroepende gemeente stel die groslys saam en elke kerkraadslid het die reg om soveel name op die groslys te plaas as wat daar vakatures is EN/OF*
  - 7b2.1.2 *Die kerkraad kan ook geskikte name van die ringskommissie en die Algemene Kommissie vir Gemeentebediening aanvra om die groslys aan te vul EN*
  - 7b2.1.3 *Die lidmate van die gemeente moet versoek word om by die skriba van die kerkraad/pre-advieskommissie name in te gee vir plasing op die groslys EN/OF*
  - 7b2.1.4 *Die kerkraad kan die naam van die beroepende gemeente en die datum van die beroepsvergadering onder amptelike berigte in Die Kerkbode plaas. Leraars en proponente kan dan indien hulle wil, vertroulik daarop reageer deur hulle name tesame met 'n curriculum vitae aan die kerkraad voor te lê. Kerkrade van beroepende gemeentes kan aan leraars op die groslys 'n vraelys uitstuur waarin uitdruklike bedieningsgerigte vrae gestel word.*
- 7b2.1.5 *Die kerkraad het die reg om 'n curriculum vitae aan te vra van enige leraar of proponent wie se naam op die groslys verskyn. Beroeping geskied in die strengste vertroulikheid volgens die bepalinge van elke sinode.*
- 7b2.2. *Indien die kerkraad van 'n pre-advieskommissie gebruik maak, word die beskikbare name aan die kommissie voorgelê wat daaruit minstens drie name kies en dit in alfabetiese volgorde aan die kerkraad voorlê tesame met al die ander name op die groslys. Enige lid van die kerkraad het die reg om 'n verdere naam op die groslys te plaas.*

### **7b3 Besluit ter verduideliking van Art.7.5:**

*Enige vorm van onderhandeling met iemand wie se naam op die groslys verskyn, kan slegs plaasvind nadat 'n beroep op hom/haar uitgebring is. Kerkrade word daarop gewys dat hulle in hierdie verband nie verder kan gaan as wat die besluite van die Algemene Sinode voor ruimte laat nie.*

## **Artikel 8**

- 8.1 Die bevestiging van 'n gemeenteleraar geskied nadat:
  - 8.1.1 die Ring (of sy gevolmagtigde Kommissie) skriftelik bevestig het dat aan al die kerklike vereistes voldoen is.
  - 8.1.2 'n Akte van demissie uit die vorige werkkring of in die geval van evangeliedienaars wat in 'n nie-kerklike betrekking gestaan het, ook 'n getuigskrif van eervolle ontslag en 'n attestaat uit die vorige gemeente aan die Ring of sy gevolmagtigde kommissie voorgelê en by die beroepende kerkraad ingedien is.
  - 8.1.3 In die geval van proponente moet
    - 8.1.3.1 die akte van legitimasië getoon word;
    - 8.1.3.2 'n attestaat by die beroepende kerkraad ingelewer word en;
    - 8.1.3.3 geskied die bevestiging met oplegging van hande waarna predikantsbevoegdheid verkry word.
- 8.2 Die bevestiging van 'n leraar in diens van die kerkverband vind plaas nadat:
  - 8.2.1 Die betrokke Sinodale Regs-/Kerkordekommissie of sy gevolmagtigde skriftelik bevestig het dat aan al die kerklike vereistes voldoen is;
  - 8.2.2 'n Akte van demissie uit die vorige werkkring, of in die geval van evangeliedienaars wat in 'n nie-kerklike betrekking gestaan het, ook 'n getuigskrif van eervolle ontslag en 'n attestaat uit die huidige gemeente aan die Sinodale Regs-/Kerkordekommissie of sy gevolmagtigde voorgelê is.
  - 8.2.3 In die geval van proponente, moet die akte van legitimasië aan die Sinodale Regs-/Kerkordekommissie of sy gevolmagtigde voorgelê word en geskied die bevestiging met die oplegging van hande waarna predikantsbevoegdheid verkry word.
  - 8.2.4 Dit is die verantwoordelikheid van die betrokke kerkvergadering in wie se diens die leraar/proponent is om onverwyld kennis aan die ARK te gee van enige verandering wat mag intree ten opsigte van standplaas en/of bevoegdheid.

## **Artikel 9**

Die amp of bediening van die bedienaar van die Woord is gerig op die Woordbediening in sy verskillende gestaltes en omvat:

- 9.1 die prediking;
- 9.2 die bediening van die sakramente;
- 9.3 die diens van gebede;
- 9.4 die leiding van die eredienste;
- 9.5 die kerklike onderrig, in samewerking met die ander ampte en die gelowiges;
- 9.6 die behartiging van die herderlike sorg, veral in die vorm van huisbesoek, saam met die kerkraadslede;
- 9.7 die ywer vir die uitbreiding van die koninkryk van God;

- 9.8 die regering, organisasie, leiding en bestuur van die gemeente saam met die ouderlinge en diakens;
- 9.9 die uitoefening, saam met die ouderlinge en diakens, van die opsig en tug oor die gemeente;
- 9.10 die gee van leiding aan kerkraads- en ander kerkvergaderinge.
- 9.11 verantwoordelikhede ten opsigte van die kerkverband.

## **Artikel 10**

'n Bedienaar van die Woord mag geen ampspligte (Artikel 9) uitoefen binne die grense van 'n ander gemeente sonder die toestemming van daardie kerkraad nie.

## **Artikel 11**

Predikante kan die kerkdien slegs om ernstige en gewigtige redes verlaat. Hulle hou op om predikant te wees indien hulle hulle gemeente of werkring in die kerkverband verlaat om 'n ander betrekking te aanvaar. Hulle kan egter vooraf van die Algemene Regskommissie verlof ontvang om hulle bevoegdheid as proponent te behou. Sodanige behoud van die bevoegdheid kan alleen verleen word indien die betrekking wat hulle aanvaar, 'n geestelike karakter dra wat regstreeks met die verkondiging van die Woord in verband staan en ten bate van die Nederduitse Gereformeerde Kerk geag word.

### ***Besluit by Artikel 11***

- 11b1 Dit staan kerkrade vry om predikante vir 'n bepaalde termyn en vir 'n bepaalde taak te beroep in gevalle waar dit nie gaan om 'n permanente pos nie.*
- 11b2 Die termynbepaalde pos word geskep met approbasie/goedkeuring van die Ring/Ringskommissie wat die meriete daarvan moet oorweeg.*
- 11b3 Aan die einde van die termyn behou so 'n persoon die bevoegdheid wat hy/sy gehad het voor hy/sy in die pos bevestig is.*

## **Artikel 12**

- 12.1 Predikante word vir die uitvoering van hulle amp of bediening deur 'n kerkvergadering (kerkraad, ring, sinode, Algemene Sinode) beroep en in diens gestel.
- 12.2 'n Predikant is, as geroepene van die Here deur Sy kerk, aan die Here én aan die betrokke kerkvergadering verantwoording verskuldig.
- 12.3 Die kerkvergadering gee aan die predikante die respek en ondersteuning wat hulle as geroepenes van die Here en sy kerk in staat kan stel om hulle amp en bediening effektief uit te voer.
- 12.4 Indiensneming en diensbeëindiging geskied deur die betrokke kerkvergadering soos bepaal deur die Kerkorde en ander geldende besluite.
- 12.5 Slegs persone wat die nodige ampsbevoegdheid het (vgl. KO art. 6) kan in 'n gemeente of in die kerkverband as predikant dien (vgl. voetnoot 1 by KO art. 3 en ook Reglement 3).
- 12.6 'n Predikant se dienste word met onmiddellike effek beëindig by verlies van ampsbevoegdheid ingevolge die Reglement vir die reëling van die bevoegdheid van predikante en proponente.
- 12.7 Die betrokke kerkvergadering, soos bepaal deur die Kerkorde en ander geldende besluite, kan die dienste van 'n predikant in die volgende gevalle beëindig:
  - 12.7.1 op grond van wangedrag (vgl. Kerkorde, hoofstuk 5);

- 12.7.2 op grond van onbekwaamheid of ongeskiktheid (vgl. 12b 2.2);  
12.7.3 op grond van die gemeente op kerkverband se finansiële onvermoë (vgl. 12b 2.3).

## **Besluite by Artikel 12**

### **12b 1 Algemene uitgangspunte**

- 12b 1.1 *Elke kerkvergadering het 'n kommissie wat die diensverhouding tussen hom as werkgewer en sy werknemers bestuur. Die kommissie kan kundiges betrek.*
- 12b 1.2 *In alle gevalle van diensbeëindiging ingevolge Artikel 12.7 word aan die Algemene Regskommissie kennis gegee van die predikant se diensbeëindiging.*
- 12b 1.3 *Werkgewers moet vir elke predikant 'n rekord hou waarin die aard van optrede ingevolge Artikel 12, die optrede van die werkgewer en die redes vir die optrede aangedui word.*
- 12b 1.4 *Vir die diensverhouding tussen gemeentes en die kerkverband met ander werknemers as predikante sien Artikel 58.*

### **12b 2 Prosedures (wyses van optrede)**

#### **12b 2.1 Wangedrag**

*In geval van wangedrag deur predikante tree die toesighoudende ring volgens die prosedure vir kerklike tug op.*

#### **12b.2.2 Onbekwaamheid of ongeskiktheid**

*Indien 'n kerkraad of die betrokke ring as toesighoudende liggaam, oordeel dat 'n formele ondersoek na die bekwaamheid of geskiktheid van 'n predikant nodig is, word die saak op die agenda van die kerkraad geplaas vir hantering aan die hand van die volgende prosedure met verslag aan die ring.*

- 12b 2.2.1 *Die betrokke kerklike vergadering versoek sy kommissie wat die diensverhouding tussen predikant en gemeente/kerkverband hanteer, bygestaan deur die Ringskommissie of ten minste drie lede van die laaste ringsvergadering deur die Ringskommissie aangewys, om die bekwaamheid of geskiktheid van die predikant formeel te ondersoek. Die vereistes vir 'n formele ondersoek is dieselfde as die vereistes wat geld vir 'n tugondersoek (vgl. KO art. 63) soos aangepas vir die formele ondersoek na bekwaamheid of geskiktheid.*
- 12b.2.2 *Tydens die ondersoek kry die predikant die geleentheid om sy/haar kant van die saak te stel en hom/haar te verweer teen die besware teen sy/haar diens. Die predikant kan deur 'n medelidmaat bygestaan word.*
- 12b 2.2.3 *Die besware oor ongeskiktheid of onbekwaamheid wat formeel ondersoek gaan word, moet skriftelik onder die aandag van die predikant gebring word.*
- 12b 2.2.4 *Indien bevind word dat die predikant onbevredigende diens lewer, moet die redes vir die onbevredigende diens en die vereistes waaraan hy/sy moet voldoen, in oorleg met hom/haar en skriftelik onder sy/haar aandag gebring word.*
- 12b 2.2.5 *Die kommissie doen alles in sy vermoë om deur toepaslike evaluering, toerusting, begeleiding (leiding en advies) en berading die betrokke predikant te help om bevredigende diens aan die gemeente te lewer.*
- 12b 2.2.6 *'n Redelike tyd word toegelaat vir die predikant om sy/haar dienste te verbeter en te voldoen aan die vereistes wat die kerkraad aan hom/haar gestel het.*
- 12b 2.2.7 *Die kerkraad oorweeg ander wyses buiten diensbeëindiging om die aangeleentheid reg te stel.*



- 12b 2.2.8 *Indien die kommissie tot die gevolgtrekking kom dat die onbekwaamheid of ongeskiktheid nie uit die weg te ruim is nie, kan die kerkraad die predikant uit diens van die gemeente ontslaan met behoud van bevoegdheid en die uitreiking van 'n akte van demissie.*
- 12b2.2.9 *In gevalle waar die predikant in diens van die kerkverband is, versoek die kerkvergadering sy kommissie wat die diensverhouding tussen die predikant en die kerkvergadering hanteer, om in samewerking met die Sinodale Regs-/Kerkordekommissie of sy gevolmagtigde die bekwaamheid of geskiktheid van die predikant formeel te ondersoek. Dieselfde prosedure soos uiteengesit in 12b2.2.2 – 12b2.2.8 soos aangepas, word gevolg.*
- 12b.2.3 **Die gemeente/kerkverband se finansiële onvermoë (bedryfsvereistes)**  
*Indien 'n kerkraad of die betrokke ring as toesighoudende liggaam, oordeel dat 'n gemeente om finansiële redes nie meer 'n predikant kan bekostig nie, word die saak op die agenda van die kerkraad geplaas vir hantering aan die hand van die volgende prosedure met verslag aan die ring.*
- 12b 2.3.1 *Die kerkraad versoek sy finansiële kommissie om in samewerking met die ring se kommissie vir fondse en in oorleg met sy kommissie wat die diensverhouding tussen predikant en kerkraad hanteer, die saak formeel te ondersoek.*
- 12b 2.3.2 *Die kommissie bepaal die omvang van die finansiële probleem en wend daadwerklike pogings aan om oplossings te soek.<sup>2</sup>*
- 12b 2.3.3 *Indien diensbeëindiging die enigste oplossing blyk te wees, pleeg die kommissie oorleg met die predikant(e) wat waarskynlik deur die beoogde diensbeëindiging geraak sal word.*
- 12b 2.3.4 *Die oorlegplegende partye poog om eenstemmigheid te bereik oor:*
- 12b 2.3.4.1 *geskikte maatreëls om die diensbeëindiging te vermy, dit tot die minimum persone te beperk, die tydsberekening daarvan te verander en die nadelige gevolge daarvan te versag;*
- 12b 2.3.4.2 *die metode van selektering van die predikant(e) wie se dienste beëindig gaan word;*
- 12b 2.3.4.3 *voorsiening by diensbeëindiging (uittreeloon of skeidingspakket).*
- 12b 2.3.5 *Die kommissie voorsien skriftelik aan die predikant(e) met wie oorleg gepleeg word:*
- 12b 2.3.5.1 *die redes vir die beoogde diensbeëindiging;*
- 12b 2.3.5.2 *alternatiewe wat oorweeg is voordat diensbeëindiging voorgestel is en die redes waarom elk van die alternatiewe verwerp is;*
- 12b 2.3.5.3 *die aantal predikante wat waarskynlik geraak gaan word;*
- 12b 2.3.5.4 *die voorgestelde metode van selektering van welke predikant(e) se diens beëindig moet word;*
- 12b 2.3.5.5 *die datum waarop die diensbeëindiging waarskynlik van krag sal word;*
- 12b 2.3.5.6 *die voorgestelde voorsiening by diensbeëindiging (uittreeloon of skeidingspakket);*
- 12b 2.3.5.7 *enige bystand wat die kerkraad beoog om aan te bied;*
- 12b 2.3.5.8 *die moontlikheid van 'n toekomstige beroep.*
- 12b 2.3.6 *Die betrokke predikant(e) word geleentheid gebied om vertoë te rig oor enige aangeleentheid waaroor oorleg gepleeg word, en die kommissie oorweeg die vertoë*

---

<sup>2</sup> Voorbeelde is: voortgesette diens teen verminderde diensvoordele en -verpligtinge, tentmakerbediening, aanstelling in 'n ander pos, standplaasruiling en kombinasie.

en reageer daarop. Indien die kommissie nie daarmee eens is nie, verstrek die kommissie redes daarvoor.

12b 2.3.7 Die kommissie selekteer die predikant(e) wie se diens beëindig gaan word volgens maatstawwe waaroor die oorlegplegende partye ooreengekom het of wat, indien daar nie eenstemmigheid is nie, billik en objektief is.

12b 2.3.8 By bereiking van 'n ooreenkoms en na ondertekening daarvan deur die oorlegplegende partye, beëindig die kerkraad die diens van die predikant(e) met behoud van bevoegdheid en uitreiking van 'n akte van demissie. Indien daar nie eenstemmigheid is nie, besluit die werkgewer op billike en objektiewe wyse in die lig van die voorgeskrewe voorsiening.

## 12b 2.4 **Voorsiening**

In gevalle van diensbeëindiging geld die volgende reëling met betrekking tot billike voorsiening:

### 12b 2.4.1 **Diensbeëindiging weens wangedrag**

12b 2.4.1.1 Die uitbetaling van alle uitstaande verlof ingevolge die bepalinge van die Reglement vir die Verlof van Predikante en Sinodale Amptenare (Regl. 22).

12b 2.4.1.2 In gevalle van summiere ontslag word behuisingsvoordele vir 30 dae na die ontslag voorsien.

12b 2.4.1.3 In gevalle van ontslag op 'n datum soos besluit deur die kerkraad word lewensonderhoud, toelaes en behuisingsvoordele voorsien soos ooreengekom tot op dié datum.

### 12b 2.4.2 **Diensbeëindiging weens onbekwaamheid of ongeskiktheid**

12b 2.4.2.1 In gevalle van diensbeëindiging weens onbekwaamheid, 'n uittreeloon/skeidingsloon gelyk aan ten minste twee weke se lewensonderhoud en toelaes vir elke voltooide jaar van aaneenlopende diens by die betrokke werkgewer, asook reëlins in verband met pensioendekking en die werkgewer se bydraes tot die mediese fonds en groepversekering vir hierdie periode. In dié verband geld 'n minimum van 4 weke en 'n maksimum van 26 weke.

12b 2.4.2.2 Die uitbetaling van alle uitstaande verlof ingevolge die bepalinge van die Reglement vir die Verlof van Predikante en Sinodale Amptenare (Regl. 22).

### 12b 2.4.3 **Diensbeëindiging weens mediese ongeskiktheid**

12b 2.4.3.1 In gevalle van mediese ongeskiktheid ontvang die predikant toelae volgens die bepalinge van die betrokke reglement.<sup>3</sup>

12b 2.4.3.2 In gevalle waar 'n reglement wat ongeskiktheidsvoordele reël nie van toepassing is nie, 'n uittreeloon/skeidingsloon gelyk aan ten minste 2 weke se lewensonderhoud en toelaes vir elke voltooide jaar van aaneenlopende diens by die betrokke werkgewer, asook reëlins in verband met pensioendekking en die werkgewer se bydraes tot die mediese fonds en groepslebensversekering vir hierdie periode. In dié verband geld 'n minimum van 4 weke en 'n maksimum van 26 weke.

12b 2.4.3.3 Die uitbetaling van alle uitstaande verlof ingevolge die bepalinge van die Reglement vir die verlof van predikante en sinodale amptenare (Regl. 22).

### 12b 2.4.4 **Diensbeëindiging weens finansiële onvermoë**

12b 2.4.4.1 In gevalle van diensbeëindiging weens die gemeente/kerkverband se finansiële onvermoë, 'n uittreeloon/skeidingsloon gelyk aan ten minste twee weke se lewensonderhoud en toelaes vir elke voltooide jaar van aaneenlopende diens by die

---

<sup>3</sup> Kerkrade moet hulle voor die beëindiging van diens weens mediese ongeskiktheid vergewis van die bepalinge van die betrokke reglement.

*betrokke werkgewer, asook reëlings in verband met pensioendekking en die werkgewer se bydraes tot die mediese fonds en groepsversekering vir hierdie periode.*

*12b 2.4.4.2 Die uitbetaling van alle uitstaande verlof ingevolge die bepalinge van die Reglement vir die Verlof van Predikante en Sinodale Amptenare (Regl. 22).*

**12b 3 Appèl**

*12b 3.1 In alle geval van diensbeëindiging het die predikant die reg van appèl ingevolge Artikel 23. By diensbeëindiging ingevolge Artikel 12.7 word die predikant oor die rede ingelig en herinner aan die reg van appèl.*

*12b 3.2 In geval van die verlies van bevoegdheid het 'n predikant die reg van appèl na die Algemene Sinodale Kommissie/Algemene Sinode.*

## **Artikel 13**

Die gemeente, kerkverband of instansie in wie se diens 'n bedienaar van die Woord staan, is verantwoordelik vir sy/haar lewensonderhoud en in die geval van deeltydse bediening vir sy kontraktuele deel van die lewensonderhoud en toelaes.

## **Artikel 14**

Wanneer bedienaars van die Woord weens verswakte gesondheid of ouderdom of andersins uit die diens tree en as hulle daarvoor kwalifiseer, moet hulle toelae volgens die bepalinge van die betrokke reglement. Daar behoort ook voldoende voorsiening gemaak te word vir die weduwees en wese van die bedienaars van die Woord.

## **2.3 Ouderlinge en diakens**

### **Artikel 15**

15.1 Ouderlinge en diakens onderskryf met hulle bevestiging deur hulle handtekening hulle instemming met die belydenis van die kerk.

15.2 Daar behoort 'n gereelde aftrede van ouderlinge en diakens te wees. Elke sinode bepaal die dienstermy van ouderlinge en diakens.

### **Artikel 16**

16.1 Die amp of bediening van die ouderling is gerig op geestelike leiding, bestuur en toesig, en omvat:

16.1.1 die toerusting van lidmate vir hulle dienswerk;

16.1.2 die regering van die gemeente;

16.1.3 die doen van huisbesoek;

16.1.4 die uitoefening van opsig en tug;

16.1.5 waaksaamheid oor die suiwerheid van die leer;

16.1.6 medeverantwoordelikheid vir die kategetiese onderwys;

16.1.7 die roeping om ander na Christus te lei;

16.1.8 ander opdragte wat deur die kerkraad bepaal word in die lig van 16.1.

16.2 Die kerkraad bepaal met inagneming van 16.1.1 tot 16.1.8 die bedieningsverantwoordelikheid van elke ouderling.

## **Artikel 17**

- 17.1 Die amp of bediening van die diaken is gerig op praktiese dienswerk. Dit begin in die erediens, en gaan vandaar uit na die gemeente en die wêreld waarin die lidmate leef. Die diakenamp omvat:
- 17.1.1 die toerusting van lidmate vir hulle dienswerk;
  - 17.1.2 die opheffing, vertroosting en ondersteuning van almal wat in een of ander opsig barmhartigheidsdiens benodig;
  - 17.1.3 die insameling en besteding van middele wat vir die diakonale werk nodig is;
  - 17.1.4 die organiseren en leiding van die barmhartigheidsbediening van die gemeente;
  - 17.1.5 ander opdragte wat deur die kerkraad bepaal word in die lig van 17.1.
- 17.2 Die kerkraad bepaal, met inagneming van 17.1.1 tot 17.1.5, die bedieningsverantwoordelikheid van elke diaken.

## **HOOFSTUK 3**

### **DIE VERGADERINGE VAN DIE KERK**

#### **3.1 Algemene bepalinge**

##### **Artikel 18**

Daar is vier kerkvergaderinge: Kerkraad, Ring, Sinode en Algemene Sinode.

##### **Artikel 19**

Die opsig oor, die regering van en die tug in die Kerk word aan hierdie vergaderinge toevertrou.

##### **Artikel 20**

- 20.1 Hierdie vergaderinge het, elkeen na sy eie aard, 'n kerklike gesag deur Christus aan hulle verleen.
- 20.2 Die gesag van die ring oor die kerkraad is dieselfde as dié van die sinode oor die ring en van die Algemene Sinode oor die sinode.

##### **Artikel 21**

Die kerkvergaderinge behandel sake vanuit kerklike perspektief, in die lig van die Woord van God en op kerklike wyse.

##### **Artikel 22**

- 22.1 In meerdere vergaderinge word alleen die sake behandel wat daar tuis hoort of daarheen verwys is deur mindere vergaderinge en wat nie in mindere vergaderinge afgehandel kon word nie.
- 22.2 'n Meerdere vergadering kan optree indien 'n kerkraad of ring nie meer bestaan nie of nie kan konstitueer nie.

## Artikel 23

- 23.1 Die besluite van vergaderinge of hulle gevolmagtigde kommissies is bindend, maar daarvoor kan in appèl na 'n meerdere vergadering of die meerdere vergadering se gevolmagtigde kommissie gegaan word.<sup>4</sup>
- 23.2 Lidmate, ampsdraers en amptenare van die Nederduitse Gereformeerde Kerk mag hulle nie tot die burgerlike hof wend in hulle beswaar teen 'n kerkvergadering se besluit(e) nie, voordat hulle nie éérs die kerklike middele tot hulle beskikking aangewend en uitgeput het nie.

### **Besluite by Artikel 23**

#### **23b 1 Algemene Bepalings ten opsigte van Appèlprosedures**

23b 1.1 *Benewens die weg van revisie vir lede van kerkvergaderings, kan die weg van kerklike appèl deur enige lidmaat gevolg word.*

23b 1.2 *In die hantering van appèlle kan enige vergadering wat dit moet hanteer die saak éérs vir bemiddeling en versoening verwys (vgl. Riglyne vir die beslegting van kerklike geskille – Funksionele besluite bls.113).*

*Indien hierdie proses nie die gewenste resultaat lewer nie, gaan die appèl amptelik voort.*

#### **23b 2 Appèl teen besluite van kerkrade**

23b 2.1 *As eerste instansie neem die ring of sy gevolmagtigde appèlkommissie die appèlle van kerkrade, kerkraadslede en lidmate teen die besluite van kerkrade in behandeling.*

23b 2.2 *Kennis van appèl teen besluite van 'n kerkraad asook die appèlstukke word gestuur aan die skriba van die ring of sy appèlkommissie.*

#### **23b 3 Appèl teen besluite van ringe en ringsappèlkommissies**

23b 3.1 *Appèl teen die besluite van 'n ring of ringsappèlkommissie mag deur 'n lidmaat of kerkvergadering wat deur die besluit van 'n ring of ringsappèlkommissie verontreg voel, of wat meen dat die besluit in stryd is met die Skrif, die Belydenis of die Kerkorde, by die skriba van die sinode of die sinodale appèlliggaam aangeteken word.*

23b 3.2 *Kennis van appèl teen besluite van 'n ring asook die appèlstukke word gestuur aan die skriba van die betrokke sinode of die skriba van sy gevolmagtigde appèlkommissie.*

#### **23b 4 Appèl teen besluite van sinodes**

23b 4.1 *Kennis van appèl teen 'n besluit van 'n sinode word aan die skriba van die sinode of sy gevolmagtigde appèlkommissie gestuur.*

23b 4.2 *Die beslissing van die sinodale appèlliggaam is finaal ten opsigte van daardie aangeleenthede wat tot sy bevoegdheid behoort.*

23b 4.3 *Benewens die reg van appèl kan 'n lidmaat of 'n kerkvergadering wat beswaar op grond van die Skrif, die Belydenis of die Kerkorde teen 'n besluit van 'n sinode het, die beswaar by wyse van 'n gravamen/beswaarskrif aan die ring/ringskommissie waaronder hy/sy ressorteer voorlê. Die ring of ringskommissie oorweeg die beswaar en indien dit aanvaar word, word dit by wyse van 'n beskrywingspunt aan die sinode vir oorweging voorgelê.*

#### **23b 5 Appèl teen besluite van 'n Algemene Sinode**

---

<sup>4</sup> Indien 'n kerkvergadering van 'n appèlkommissie gebruik maak, wys hy die kommissie aan na goeddunke.

- 23b 5.1 *Appèl teen 'n besluit van 'n Algemene Sinode mag deur 'n lidmaat of kerkvergadering wat deur 'n besluit van 'n Algemene Sinode veronreg word, of wat meen dat die besluit in stryd is met die Skrif, die Belydenis of Kerkorde, gemaak word by die skriba van die Algemene Sinode of sy gevolmagtigde appèlkommissie.*
- 23b 5.2 *Kennis van appèl teen besluite van 'n Algemene Sinode asook die appèlstukke word gestuur aan die skriba van die Algemene Sinode of sy gevolmagtigde appèlkommissie. Die appèlkommissie dien die volgende Algemene Sinode of die Algemene Sinodale Kommissie met 'n aanbeveling.*
- 23b 5.3 *Teen 'n besluit van die Algemene Sinode kan ook 'n gravamen/beswaarskrif ingedien word by die skriba van die beswaarde se sinode vir deursending na die Algemene Sinode indien dit deur die betrokke sinode, sinodale kommissie of moderamen aanvaar word.*
- 23b 5.4 *Ingevolge Artikel 44.3 van die Kerkorde kan sake in verband met leergeskille of geskille tussen sinodes onderling of tussen sinodes en mindere vergaderinge by wyse van appèl/beroep voor die Algemene Sinode of sy appèlkommissie dien. Dieselfde voorskrifte vir alle appèlle is ook met betrekking tot die behandeling van appèlle voor die Algemene Sinode of sy appèlkommissie van toepassing.*
- 23b 6 ***Bepalings in verband met appèlle en beswaarskrifte wat geld vir alle kerkvergaderings wat appèlle en beswaarskrifte hanteer***
- 23b 6.1 *Vergaderings wat appèlle aanhoor, is geslote vergaderings.*
- 23b 6.2 *'n Lidmaat of 'n kerkvergadering wat hom/haar deur die beslissing van 'n kerkvergadering veronreg voel, of wat meen dat 'n besluit in stryd is met die Skrif, die Belydenis of die Kerkorde, mag binne 30 dae nadat hy/sy kennis geneem het van die besluit van die vergadering, kennis gee van appèl of beswaar (in die geval van 23b 4.3) by die skriba van die rings- of sinodale appèlligaam binne wie se gebied die besluit geneem is.*
- 23b 6.3 *Die appellant gee ook skriftelik kennis van die appèl aan die skriba van die kerkvergadering teen wie se besluit geappelleer of beswaar aangeteken word. (Vgl Artikel 23.2 en Artikel 65 van die Kerkorde).*
- 23b 6.4 *Die appellant moet binne 30 dae nadat hy/sy kennis van appèl of beswaar gegee het die skriba van die appèlligaam van 'n skriftelike uiteensetting van die gronde/redes van die appèl of beswaar (ter sake dokumentasie kan ingesluit word) anders verval die reg op appèl.*
- 23b 6.5 *Die skriba van die appèlligaam verkry by die kerkvergadering teen wie se besluit geappelleer of beswaar aangeteken word hulle skriftelike reaksie op die appèlgronde/redes (ter sake dokumentasie, waaronder alle dokumente, notules, bandopnames, ensovoorts, moet ingesluit word) en besorg dit aan die lede van die appèlligaam wat die appèl of beswaar sal hanteer.*
- 23b 6.6 *Die indiene van 'n appèl of 'n beswaarskrif word by die indiening van die appèl of beswaarskrif in kennis gestel dat die uiteindelijke koste van die saak van hom/haar gevorder mag word indien die betrokke appèlvergadering so besluit. Die indiene van die appèl/beswaarskrif moet dan skriftelik instemming met die reëling betuig.*
- 23b 6.7 *Die appèlligaam vergader so spoedig moontlik en beslis oor die appèl na aanleiding van die stukke voor hom.*
- 23b 6.8 *Hoewel die appèlondersoek op grond van die skriftelike uiteensetting van die appèlgronde (en ter sake dokumentasie) deur die appellant en die skriftelike reaksie van die kerkvergadering op die appèlgronde (en ter sake dokumentasie) gedoen word, kan die appèlligaam self versoek of verlof gee dat mondelinge getuienis deur die appellant en/of 'n verteenwoordiger(s) van die betrokke kerkvergadering voor hom gelewer word.*
- 23b 7 ***Middelle tot beskikking van 'n appèlligaam***

23b 7.1.1 *Na oorweging van die appèl kan die appèl liggaam, behalwe in 'n geval wat onder 23b 7.2 val, die appèl op een van die volgende wyses hanteer:*

23b 7.1.2 *Die appèl geheel of gedeeltelik toestaan en die besluit van die kerkvergadering ter syde stel of wysig;*

23b 7.1.3 *Die appèl in geheel of gedeeltelik afwys en die besluit van die kerkvergadering in geheel of gedeeltelik bekragtig;*

23b 7.2 *Waar die appèl berus op wesenlike onreëlmatighede tydens die vergadering wat die besluit geneem het, stel die appèl liggaam die besluit van die betrokke kerkvergadering ter syde en verwys die aangeleentheid terug na die betrokke kerkvergadering om die aangeleentheid van nuuts af te hanteer. Die betrokke kerkvergadering kan 'n ander soortgelyke kerkvergadering vra om die aangeleentheid van nuuts af te hanteer.*

23b 8 **Besluit van die appèl liggaam**

*Die appèl liggaam kom tot 'n besluit oor die appèl wat hy saam met sy redes daarvoor notuleer. Skriftelike kennis hiervan word aan die partye gegee.*

## **Artikel 24**

Die handeling van elke vergadering word daagliks met Skriflesing en gebed begin en met danksegging beëindig.

## **Artikel 25**

Elke vergadering moet 'n voorsitter hê wat verantwoordelik is vir die leiding en ordelike verloop van die vergadering, en 'n skriba wat die handeling van die vergadering opteken.

### **3.2 Besondere bepalinge**

#### **3.2.1 Die kerkraad**

## **Artikel 26**

### **Ou Artikel 26**

Elke gemeente het 'n kerkraad aan wie die opsig oor, die regering van en die tug in die gemeente toevertrou is. 'n Kerkraad mag desentraliseer en aan wykskerkrade duidelike omskrewe bevoegdhede gee.

### **Nuwe Artikel 26**

26.1 Elke gemeente het 'n kerkraad aan wie die opsig oor, die regering van en die tug in die gemeente toevertrou is.

26.2 Die kerkraad bestaan, uit die bedienaars van die Woord asook die ouderlinge en diakens wat as kerkraadslede verkies is. Daar kan ook bedienaars van die Woord, ouderlinge en diakens wees wat nie in die kerkraad dien nie.

*(Hierdie artikel mag nie geïmplementeer word vóór die datum waarop die ASK dit in werking stel nie en moet geskied volgens die riglyne wat die ASK opstel).*

## Artikel 27

### Ou Artikel 27

Die Kerkraad bestaan uit die bedienaars van die Woord, die ouderlinge en die diakens. Vir die behartiging van die besondere werksaamhede aan die onderskeie ampte verbonde, mag die ouderlinge en diakens gereeld afsonderlik vergader.

### Nuwe Artikel 27

- 27.1 'n Kerkraad mag desentraliseer en aan gedesentraliseerde kerkrade duidelik omskrewe bevoegdhede gee wat aan die ring vir goedkeuring voorgelê word.
- 27.2 Vir die behartiging van die besondere werksaamhede aan die onderskeie ampte verbonde, mag die ouderlinge en diakens gereeld afsonderlik vergader.

*(Hierdie artikel mag nie geïmplementeer word vóór die datum waarop die ASK dit in werking stel nie en moet geskied volgens die riglyne wat die ASK opstel).*

## Artikel 28

- 28.1 Die kerkraad vergader minstens vier keer per jaar.
- 28.2 Die kerkraad kies jaarliks 'n voorsitter uit die leraar(s) en ouderlinge.
- 28.3 Buitengewone vergaderings van die kerkraad word deur die voorsitter byeengeroep na oorlegpleging met die leraar(s) indien die voorsitter nie 'n leraar van die gemeente is nie.
- 28.4 Indien die plaaslike leraar(s) nie by 'n gewone of buitengewone kerkradsvergadering teenwoordig kan wees nie, moet die konsulent of 'n ander ringsleraar deur hom/haar daartoe versoek, die vergadering adviserend namens die ring bywoon. Die konsulent kan ook op versoek van die kerkraad as voorsitter optree.

### 3.2.2 Die ring

## Artikel 29

As uitdrukking van die kerkverband en met die oog op behoorlike kerklike dissipline, word naburige gemeentes onderling gegroepeer tot ringe. Hierdie groepering van gemeentes word van tyd tot tyd deur die sinode gedoen. Die ring vergader een maal per jaar of soos deur die betrokke sinode bepaal.

## Artikel 30

- 30.1 Die ring word saamgestel uit die leraar(s) en een ouderling/diaken as afgevaardigdes deur die kerkraad van elke gemeente binne die ringsgebied.
- 30.2 As 'n gemeente meer as een predikantspos het, het die kerkraad die reg om nog een ouderling/diaken vir elke bykomende predikantspos af te vaardig, indien die sinode daartoe besluit.
- 30.3 Vir elke afgevaardigde word 'n sekundus aangewys. 'n Ouderling/diaken mag as sekundus vir 'n leraar optree.
- 30.4 Alle afgevaardigdes moet van geloofsbriewe voorsien wees.

## Artikel 31

Tot die werksaamhede van die ring behoort:

- 31.1 kerkvisitasie;
- 31.2 die opsig oor die gemeentes, om toe te sien dat kerkrade en gemeentes hulle roeping nakom;



- 31.3 advies en hulp aan kerkrade;
- 31.4 die stigting van nuwe gemeentes of ontbinding van gemeentes op versoek van kerkrade en die reëling van gemeentelike grense;
- 31.5 die behandeling van sake wat óf in eerste instansie óf in beroep voor die ringsvergadering gebring word;
- 31.6 die behartiging van sending, barmhartigheidsdiens, gemeentebediening, leer en akuele sake, jeugsake en ander algemene sake wat binne die ringsgebied aandag vereis.
- 31.7 die opsig en tug oor alle ouderlinge, diakens en predikante, wat emeriti en proponente insluit, sonder om die opsig van die kerkraad oor sy ampsdraers uit te sluit (sien Art. 62.2).

### **3.2.3 Die sinode**

#### **Artikel 32**

Die sinode word saamgestel uit afgevaardigdes van gemeentes wat geografies 'n eenheid vorm en maklik vergader. Die groepering kan deur die Algemene Sinode/Algemene Sinodale Kommissie gewysig word op versoek en met goedkeuring van die betrokke Sinode(s)/Sinodale Kommissie(s).<sup>5</sup>

#### **Artikel 33**

- 33.1 Sinodes word op een van die volgende maniere - waaroor elke sinode self besluit - saamgestel:
  - 33.1.1 'n Gelyke aantal leraars en ouderling/diakens uit elke gemeente in die sinodale gebied as afgevaardigdes van elke kerkraad. Die sinode besluit op die aantal afgevaardigdes per gemeente.
  - 33.1.2 'n Gelyke aantal leraars en ouderling/diakens uit elke ring in die sinodale gebied. Die sinode besluit op die wyse van afvaardiging en die aantal afgevaardigdes per ring.
- 33.2 Die teologiese opleiding word in adviserende hoedanigheid verteenwoordig deur een lid van die personeel van die Teologiese Fakulteit Stellenbosch en/of die Teologiese Fakulteit Pretoria en/of die Teologiese Fakulteit Bloemfontein.
- 33.3 Vir elke afgevaardigde word 'n sekundus aangewys. 'n Ouderling/diakon mag as sekundus vir 'n leraar optree.
- 33.4 Afgevaardigdes moet van geloofsbriefwe voorsien wees.

#### **Artikel 34**

Die sinode vergader ten minste elke vier jaar, sover moontlik in die jaar na die gewone vergadering van die Algemene Sinode.

#### **Artikel 35**

Tot die taak en bevoegdheids van die sinode behoort:

- 35.1 die opstel en wysiging van bepalinge en reglemente vir die werksaamhede aan hom toevertrou, mits dit nie met die Kerkorde in stryd is nie;
- 35.2 die behartiging van die gemeenskaplike belange van die plaaslike kerke in die gebied, met uitsondering van die sake wat by die Algemene Sinode tuis behoort;
- 35.3 die opleiding van evangeliedienaars soos deur Artikel 5 bepaal;

---

<sup>5</sup> Verskillende Sinodes het verskillende name (bv. Moderamen, Diensraad, Sinodale Dienskommissie) vir 'n liggaam wat die funksies van die Sinodale Kommissie verrig.

- 35.4 sending, barmhartigheidsdiens, gemeentebediening, leer en aktuele sake, jeugsake en ander algemene sake wat aandag vereis binne sy gebied, ooreenkomstig die bepalinge van die Algemene Sinode;
- 35.5 die opbou van die nodige fondse met die oog op eie werksaamhede en die finansiering van die Algemene Sinode volgens 'n aanvaarde formule;
- 35.6 die behandeling van alle sake wat in eerste instansie of by wyse van appèl voor hom gebring word;
- 35.7 die aanwysing van afgevaardigdes na die Algemene Sinode uit sy lede.

## **Artikel 36**

Die samestellende kerke of sinodes behou volle seggenskap oor hul eiendomme, finansies, werksaamhede, ensovoorts, wat hulle voor toetreding tot die algemene sinodale verband gehad het of daarna verwerf, behalwe dié wat volgens die Kerkorde aan die Algemene Sinode oorgedra is of sal word, of deur die Algemene Sinode in trust gehou word.

## **Artikel 37**

Dit staan die samestellende kerke vry om met behoud van alle regte, voorregte, besittings, naam, ensovoorts, uit die algemene sinodale verband te tree wanneer hulle so 'n stap voor God in die lig van sy Woord kan regverdig.

### **3.2.4 Die Algemene Sinode**

## **Artikel 38**

- 38.1 'n Gewone en buitengewone Algemene Sinode word saamgestel uit 20 predikante en 20 ouderlinge/diakens as afgevaardigdes van elkeen van die sinodes. Sinodes het die reg om minder afgevaardigdes te stuur.
- 38.2 Die teologiese opleiding word in adviserende hoedanigheid verteenwoordig deur een lid van die personeel van elk van die teologiese fakulteite van Stellenbosch, Pretoria en Bloemfontein.
- 38.3 Elke afvaardiging moet van 'n geloofsbrief voorsien wees.

## **Artikel 39**

- 39.1 Die moderatuur van die Algemene Sinode bestaan uit 'n moderator, 'n assessor, 'n aktuaris en 'n skriba.
- 39.2 Dieselfde persoon mag nie by twee agtereenvolgende vergaderings as moderator verkies word nie. Die persoon mag wel in een van die ander poste in die moderatuur verkies word.
- 39.3 Dieselfde persoon mag nie by twee agtereenvolgende vergaderings as assessor verkies word nie. Die persoon mag wel in een van die ander poste in die moderatuur verkies word.

## **Artikel 40**

Voor die verdaging van die Algemene Sinode word 'n Algemene Sinodale Kommissie saamgestel.

## **Artikel 41**

Die afgevaardigde leraar met die langste diens wat die oudste in jare is, gaan op die Algemene Sinode voor totdat die moderator gekies is.

## Artikel 42

- 42.1 Die Algemene Sinode vergader elke twee jaar op 'n tyd en plek soos deur die Algemene Sinodale Kommissie bepaal. 'n Sinode kan 'n uitnodiging rig dat die Algemene Sinode in sy sinodale gebied vergader.
- 42.2 Die Algemene Sinodale Kommissie roep 'n buitengewone Algemene Sinode byeen indien hy dit nodig ag, óf op eie inisiatief, óf op versoek van een of meer sinodes.

## Artikel 43

Tot die taak van die Algemene Sinode behoort:

- 43.1 Wat kerklike beleid betref
  - 43.1.1 die bepaling van beleid in sake van gemeenskaplike belang wat deur kerkvergaderinge gevolg moet word;
  - 43.1.2 die aanwysing van die Bybelvertaling(s) wat amptelik gebruik moet word;
  - 43.1.3 die vasstelling van die belydenisskrifte, die Kerkorde, die liturgiese formuliere en gebruike, die liederebundel(s) en die orde van die eredienste;
  - 43.1.4 die vasstelling van die formele vereistes vir die opleiding van die bedienaars van die Woord;
  - 43.1.5 die bepaling van verhoudinge en ooreenkomste met die Staat op algemene sinodale vlak.
- 43.2 Wat werksaamhede betref
  - 43.2.1 die administrasie van vaste eiendom en fondse van die Algemene Sinode;
  - 43.2.2 die behartiging van sake waar eenvormigheid vir die hele kerk noodsaaklik is;
  - 43.2.3 die behartiging van die ekumeniese belange van die Kerk op sy terrein;
  - 43.2.4 die beheer oor algemene kerklike media;
  - 43.2.5 die hantering van appèlsake.

## Artikel 44

- 44.1 Die wysiging van die Belydenis kan alleen geskied nadat elke sinode afsonderlik met 'n tweederdemeerderheid ten gunste daarvan besluit het.
- 44.2 Artikel 44.1 en 44.2 word gewysig nadat elke sinode afsonderlik met 'n tweederdemeerderheidstem ten gunste daarvan besluit het en die Algemene Sinode daarna met 'n tweederdemeerderheidstem ten gunste daarvan besluit.
- 44.3 Die Algemene Sinode mag, met uitsondering van Artikel 44.1 en 44.2, die Kerkorde wysig of aanvul met 'n tweederdemeerderheidstem.
- 44.4 Sake in verband met leertug, leergeskille of geskille tussen sinodes en mindere vergaderinge kan by wyse van appèl voor die Algemene Sinode dien. In gevalle van leertug en leergeskille word 'n tweederdemeerderheidsbesluit vir die bekragtiging van die uitspraak van die Algemene Sinode vereis (vgl Artikel 65.2).
- 44.5 Indien 'n tweederdemeerderheid nie verkry word nie, mag enige van die partye 'n verdere beroep op die afsonderlike sinodes doen. Die gesamentlike volstreekte meerderheid van stemme van die afsonderlike sinodes is dan beslissend.

## Artikel 45

- 45.1 Die Algemene Sinode kan vir sy vergadering en kommissies reglemente opstel.
- 45.2 Die Algemene Sinode mag artikels van die Kerkorde, met die uitsondering van Artikel 44.1 en 44.2, met 'n tweederdemeerderheidstem óf opskort óf daarvan vrystelling verleen.

## **Artikel 46**

Die Algemene Sinode mag kommissies benoem om hom van advies te bedien of om besluite en opdragte uit te voer.

## **Artikel 47**

Die Algemene Sinode kan deur die Algemene Kommissie vir Fondse kerkkantore organiseer en personeel aanstel om die kantore te beman.

# **HOOFSTUK 4**

## **DIE ARBEID VAN DIE KERK**

### **4.1 Die openbare erediens**

#### **Artikel 48**

- 48.1 Die erediens is, onder die genadige werking van die Heilige Gees, die openbare samekoms van die gemeente tot ontmoeting met God en onderlinge gemeenskap van die heiliges onder leiding van die besondere ampte en deur die bediening van die Woord, die bediening van die heilige sakramente, die gebed, kerklied en dankoffers.
- 48.2 Die inrigting van die eredienste word deur die kerkraad vasgestel met gebruikmaking van Bybelvertalings wat vir amptelike gebruik aanvaar is, die liturgiese orde van die erediens, asook die liederebundel(s) en die liturgiese formuliere, soos deur die Algemene Sinode vasgelê.
- 48.3 Die leiding van eredienste berus by een van die volgende persone:
- 48.3.1 die bedienaar van die Woord van die plaaslike gemeente, of in sy/haar afwesigheid;
- 48.3.2 die konsulent;
- 48.3.3 'n ander bevoegde evangeliedienaar van gereformeerde belydenis wat deur die kerkraad daartoe uitgenooi is;<sup>6</sup>
- 48.3.4 'n student van 'n teologiese fakulteit van die Nederduitse Gereformeerde Kerk (Artikel 5.2) wat, óf in ooreenstemming met die vereistes van die betrokke fakulteit en met toestemming van die kerkraad, deel van sy/haar praktiese opleiding in die gemeente ontvang, óf na voltooiing van sy/haar praktiese werk deur 'n kerkraad uitgenooi is;
- 48.3.5 'n ouderling van die betrokke gemeente wat 'n leesdiens waarneem.
- 48.4 Prediking
- 48.4.1 Met die oog op die verkondiging van die volle raad van God moet die prediking deurgaans volle reg aan die kerklike jaar en die belydenisskrifte laat geskied.
- 48.4.2 Die inhoud van die prediking moet steeds 'n verklaring en toepassing van die Heilige Skrif wees.

---

<sup>6</sup> Onder 'n bevoegde bedienaar van die Woord wat eredienste kan lei, word verstaan 'n persoon met ampsbevoegdheid in die NG Kerk of 'n ander kerk van gereformeerde belydenis. Wanneer 'n kerkraad aan 'n persoon wat nie sodanig bevoeg geag word nie 'n uitnodiging rig om 'n erediens te lei, word daar strydig met die Kerkorde gehandel. (Vgl Handeling Algemene Sinode 1998, bl 409, 1.19.2.2).

48.5 Die Heidelbergse Kategismus, Nederlandse Geloofsbelijdenis en Dordtse Leerreëls moet deurentyd sistematies in die prediking aan die orde gestel word.

## 4.2 Die sakramente

### Artikel 49

#### 49.1 Die Doop

Die heilige doop word, behalwe by hoë uitsondering, in 'n erediens deur 'n bedienaar van die Woord bedien met gebruikmaking van 'n goedgekeurde liturgiese formulier.

#### **Besluite by Artikel 49.1**

49.1b 1 *Wanneer geeneen van die ouers geregtig is om op die doopvrae te antwoord nie kan die kerkraad in oorleg met die ouers 'n doopgetuie(s) vind wat genoegsame waarborg kan bied vir 'n Christelike opvoeding van die dopeling*

49.1b 2 *Die kerkraad moet toesien dat die doop van verbondskinders so gou as moontlik aangevra en bedien word*

49.1b 3 *By die doop van 'n kind ouer as sewe jaar en voor belydenisaflegging:*

49.1b3.1 *moet die kerkraad daarvan oortuig wees dat die ouers/doopgetuies se gesindheid en meelewing tans reg is, en die kind wat gedoop moet word, moet in staat wees om, na gelang van die kind se bevatlikheid, 'n eenvoudige belydenis van instemming met die Christelike waarheid af te lê, tesame met 'n getuienis aangaande liefde tot en geloof in Jesus Christus.*

49.1b3.2 *Die eenvoudige belydenis word deur die kind slegs by die dooponderhoud afgelê.*

49.1b3.3 *Tydens die dooponderhoud word die kind voorberei op die vrae en antwoord slegs met 'n "ja". Die vrae lui soos volg:*

- *Glo jy dat die Bybel die Woord van God is ?*
- *Glo jy dat God, die Vader, die Skepper van hemel en aarde is ?*
- *Glo jy dat die Here Jesus Christus vir jou sondes gesterf het en dat Hy uit die dood opgestaan het, en het jy Hom lief ?*
- *Glo jy dat die Heilige Gees in jou woon en jou lewe nuut maak ?*

49.1b4 *Persones sestiende jaar en ouer wat nie gedoop is nie kan gedoop word na openbare belydenis van geloof.*

49.1b5 *Die doop van iemand uit 'n ander kerkverband word erken as dit geskied het in die Naam van die Drie-enige God, Vader, Seun en Heilige Gees; met water bedien is; en deur 'n persoon met bevoegdheid in die betrokke kerkverband bedien is.*

#### 49.2 Die Nagmaal

49.2.1 Die heilige nagmaal word minstens vier maal per jaar in elke gemeente gevier (vgl. Funktionele besluit 22).

49.2.2 Tot die heilige nagmaal word toegelaat :

49.2.2.1 belydende lidmate van die gemeente;

49.2.2.2 dooplidmate van die gemeente wat deur die kerkraad toegelaat is tot die heilige nagmaal (vgl. Funktionele besluit 22);

49.2.2.3 besoekers uit ander NG gemeentes;

49.2.2.4 besoekers uit ander kerke (vgl. Reglement 21: 3.2.2.1 en 3.2.2.2)

### **4.3 Jeugbediening**

#### **Artikel 50**

- 50.1 Die jeug as wesenlike deel van die gemeente is die verantwoordelikheid van die Kerk en hierdie verantwoordelikheid is onvervreembaar en onoordraagbaar.
- 50.2 Die bediening aan die jeug as verbondsjeug is 'n geïntegreerde deel van die omvattende gemeentelike bediening waarin God deur sy Woord tot die jeug kom deur verkondiging, onderrig, toerusting, herderlike sorg en dienswerk. Hierdie gemeentelike bediening geskied onder die leiding van die ampte aan en deur die jeug.
- 50.3 Die kinders van die gemeente, asook alle buitekerklikes wat belydende lidmate van die gemeente wil word, moet onderrig word in die Woord van God en die leer van die Kerk. Hierdie onderrig geskied met die oog op belydenisaflegging waardeur hulle deel in die volle regte en verantwoordelikhede van belydende lidmate.

### **4.4 Herderlike sorg**

#### **Artikel 51**

Die bedienaars van die Woord, ouderlinge en diakens moet deur die behartiging van getroue huisbesoek die herderlike sorg uitstrek tot alle lidmate van die gemeente, in besonder behoeftiges, siekes en oues van dae. Hulle moet besoek, bemoedig, vertrous en ondersteun word. Voorts moet lidmate voortdurend gewaarsku word teen valse leringe en dwalinge, teen wêreldsgesindheid en goddelose lewenspraktyke.

### **4.5 Gemeentebediening**

#### **Artikel 52**

- 52.1 Die Kerk rig hom deur middel van gemeentebediening tot die lidmate ten einde die gemeente op te bou tot vervulling van sy dienswerk.
- 52.2 Die Kerk rig hom deur intensiewe gespesialiseerde gemeentebediening tot kerkvervreemdes wat formeel nog lidmate is ten einde hulle daadwerklik te bereik en hulle tot gemeenskap met Christus te bring.

### **4.6 Sending/getuienis**

#### **Artikel 53**

- 53.1 Sending is die heilshandeling van die drie-enige God, Vader, Seun en Heilige Gees met die wêreld, waardeur Hy uit die hele menslike geslag vir Hom 'n gemeente deur sy Woord en Gees vergader.
- Deur dié gemeente
- \* laat God sy Woord aan die gevalle wêreld verkondig,
  - \* bring Hy die gemeenskap van die heiliges uit alle nasies tot stand en
  - \* laat Hy diens aan die wêreld in nood lewer,
  - \* laat Hy sy opdrag om die skepping te bewaar en te bewerk sigbaar tot uitdrukking kom, en
  - \* word sy geregtigheid aan die samelewing en wêreld verkondig.

So laat Hy sy koninkryk kom tot aan die voleinding van die wêreld.

- 53.2 Deur sending bedien die kerk die evangelie in al sy dimensies aan mense buite die kerk.
- 53.3 Sending is die roeping van elke lidmaat asook die gemeente. Waar die omvang en ander omstandighede van die werk dit vereis, word dit in kerkverband van ring en sinode onderneem.

#### **4.7 Diens van barmhartigheid**

##### **Artikel 54**

- 54.1 Die Kerk moet met priesterlike bewoëheid omsien na die armes en ander sorgbehoewendes deur hulle te help, te troos en geestelik op te hef.
- 54.2 Waar die omvang en ander omstandighede van die werk dit vereis, onderneem die gemeentes in kerkverband van ring en sinode barmhartigheidsbediening.

#### **4.8 Dienswerk van die gelowiges**

##### **Artikel 55**

- 55.1 Dit is noodsaaklik dat die lidmate van die gemeente geaktiveer word om werksaam te wees ten opsigte van die Skriftuurlike opdragte tot opbouing van die liggaam van Christus en die uitbreiding van die Koninkryk van God.
- 55.2 Hierdie dienswerk van die gelowiges kan ongeorganiseer en spontaan geskied, maar behoort ook ter wille van die groter krag en doeltreffender funksionering daarvan kerklik georganiseer te word. Sodanige organisasie moet egter altyd geskied met toepaslike verantwoording aan die kerkraad, ring en sinode.
- 55.3 Die Kerk het die onvervreembare reg om sy eie lidmate vir bepaalde werksaamhede te organiseer deur kommissies van die kerkraad, ring óf sinode óf te laat organiseer deur organisasies wat van die Kerk daartoe opdrag gekry het.
- 55.4 Waar daar kerklike organisasies vir bepaalde dienswerk bestaan in sinodale en algemeen-sinodale verband, behoort alle georganiseerde dienswerk op daardie terrein daarby in te skakel.
- 55.5 Organisasies wat in hierdie verband tot stand kom, lê hulle bepalinge aan die betrokke kerkvergadering vir goedkeuring voor. Die voorlegging geskied deur die kerklike kommissie wat verantwoordelik is vir die afdeling van die Kerk se werk waarby die organisasie die nouste betrokke is.

#### **4.9 Leer en aktuele sake**

##### **Artikel 56**

Die Kerk beywer hom vir Skrifgefundeerde beskouinge ten opsigte van aktuele, leerstellige en etiese aangeleenthede en die bevordering van 'n sedelik gesonde openbare lewe.

#### **4.10 Rentmeesterskap**

##### **Artikel 57**

Elke kerkvergadering maak die nodige voorsiening vir die sorgvuldige beheer van die stoflike aangeleenthede van die Kerk en doen jaarliks verslag van sy rentmeesterskap aan die gemeente, ring, sinode of Algemene Sinode, soos die geval mag wees.

# HOOFSTUK 5

## KERKLIKE OPSIG EN TUG

### Artikel 58

#### Diensverhoudinge

- 58.1 Werknemers anders as predikante in diens van 'n gemeente of die kerkverband se diensverhouding, word per diensooreenkoms gereël.
- 58.2 Vir die diensverhouding van predikante sien Art. 12.
- 58.3 In geval van wangedrag deur werknemers, anders as predikante, tree die verantwoordelike kerkvergadering op in gevolge die diensooreenkoms en indien nodig die prosedure van die kerklike tug.

### Artikel 59

- 59.1 Kerklike opsig word gehou en kerklike tug uitgeoefen
  - 59.1.1 tot eer van God;
  - 59.1.2 tot heil van die Kerk;
  - 59.1.3 tot behoud van die sondaar;
- 59.2 volgens voorskrifte van
  - 59.2.1 die Woord van God;
  - 59.2.2 die Belydenisskrifte;
  - 59.2.2 die Kerkorde en ander bepalinge van die Kerk.

### Artikel 60

- 60.1 Die kerklike opsig en tug dra 'n geestelike karakter en pas by die kerk as 'n geloofs- en liefdesgemeenskap. Opsig en tug word dus op 'n kerklike wyse en met geestelike middele uitgeoefen.
- 60.2 Die amptelike uitoefening van die tug deur kerkvergaderinge of hulle gevolmagtigdes vervang nie die roeping van die gelowiges tot onderlinge vermaning nie, maar vul dit aan.
- 60.3 Amptelike kerklike opsig en tug is pastoraal-kerkregtelik van aard en moet uit 'n Bybelse en geestelike oogpunt billik en regverdig toegepas word.

### Artikel 61

#### Tugwaardige sondes

- 61.1 Tugwaardige sondes is sondes wat indruis teen die Woord van God en die belydenis van die Kerk.
- 61.2 Sondes wat openbare aanstoot gee of wat na aanleiding van die voorskrifte van Matteus 18:15 - 17 onder die aandag van die Kerk kom, stel die oortreder(s) bloot aan 'n amptelike tugondersoek.
- 61.3 Wangedrag deur werknemers van die kerk in terme van diensverhoudinge kan ook tugwaardige sondes wees.



- 61.4 Die kerklike opsig gaan oor die hele lewenswandel (leer en lewe) van al die lidmate (doop en belydend) van die gemeente, ampsdraers ingesluit.

## **Artikel 62**

- 62.1 Alle doop- en belydende lidmate van die gemeente val onder die opsig en tug van die kerkraad.
- 62.2 Alle ouderlinge, diakens en predikante, wat emeriti en proponente insluit, staan onder die opsig en tug van die ring, sonder om die opsig van die kerkraad oor sy ampsdraers uit te sluit (vgl. Art. 31.7).
- 62.3 Predikante in diens van die kerkverband (waarby teologiese dosente ingesluit word), staan wat hulle leer en lewe betref onder die opsig en tug van die ring binne wie se gebied hulle lidmaat is van 'n gemeente.

## **Artikel 63**

### **Die amptelike ondersoek**

#### **63.1 Die Ondersoekliggaam**

- 63.1.1 Amptelike ondersoeke van beweerde tugwaardige sondes word deur 'n ondersoekliggaam gehanteer wat of die kerkvergadering self kan wees of 'n gevolmagtigde kommissie van die kerkvergadering.
- 63.1.2 Elke kerkvergadering met tugverantwoordelikheid, besluit of die vergadering self tugondersoeke gaan doen en of daar van 'n gevolmagtigde kommissie gebruik gemaak gaan word.
- 63.1.3 Indien 'n kerkraad van 'n gevolmagtigde kommissie as ondersoekliggaam gebruik maak om 'n amptelike tugondersoek te hanteer, wys hy 'n kommissie van ten minste vyf lede aan. Hierdie kommissie word saamgestel uit minstens drie ouderlinge van die gemeente. Ander kundige lidmate van binne of buite die gemeente kan ook telkens na behoefte op die kommissie gekoöpteer word as volwaardige lede.
- 63.1.4 Indien 'n ring van 'n gevolmagtigde kommissie gebruik maak as ondersoekliggaam, wys hy 'n kommissie van ten minste vyf lidmate aan waarvan ten minste drie lede van die ringsvergadering moet wees. Ander kundige lidmate van binne of buite die ring kan ook telkens na behoefte op die kommissie gekoöpteer word as volwaardige lede.
- 63.1.5 Indien 'n kerkvergadering (kerkraad of ring) besluit om self as amptelike ondersoekliggaam op te tree, kan kundige lidmate van binne of buite die gemeente na behoefte as volle lede van die ondersoekliggaam benoem word.
- 63.1.6 'n Lid van 'n ondersoekliggaam wat aan 'n ondersoek deelneem, behou sittingsreg in die vergadering tot die ondersoek voltooi is al sou die lid se ampstermyn in die betrokke kerkvergadering tydens die duur van die ondersoek verstryk.
- 63.1.7 As 'n situasie ontstaan waardeur of die ondersoekliggaam of die geïmpliseerde voel dat 'n regverdige en billike ondersoek nie kan plaasvind met die huidige samestelling van die ondersoekliggaam nie, het beide die reg om, met opgaaf van redes, aansoek te doen dat 'n ander ondersoekliggaam die ondersoek doen.
- 63.1.7.1 In geval van 'n ondersoek deur die kerkraad of sy gevolmagtigde kommissie wend hulle hul tot die ring/ringskommissie
- 63.1.7.2 In geval van 'n ondersoek deur die ring of sy gevolmagtigde kommissie wend hulle hul tot die Sinodale Kommissie/die moderatuur om 'n ander ondersoekliggaam aan te wys.

#### **63.2 Aanmelding van 'n klag, gerug of 'n verslag**

- 63.2.1 Die sondes waarna Artikel 61.2 verwys, kom op een van drie maniere voor die betrokke kerkvergadering of sy gevolmagtigde:
  - 63.2.1.1 deur 'n nadelige gerug of
  - 63.2.1.2 'n skriftelike klag of
  - 63.2.1.3 'n verslag aan die kerkvergadering wat voortvloei uit amptelike werksaamhede.

### **63.3 Aanvanklike hantering van 'n klag, gerug of verslag**

- 63.3.1 By ontvangs van 'n klag, gerug of verslag en vóórdat besluit word om dit amptelik in behandeling te neem:
  - 63.3.1.1 Word die kerkvergadering of die gevolmagtigde kommissie gesuiwer van die persone oor wie die klag, gerug of verslag gaan asook van die klaer of aanbringer van die gerug of verslag;
  - 63.3.1.2 Stel die kerkvergadering of sy gevolmagtigde kommissie, eers vas of die klag, gerug of verslag tot 'n amptelike ondersoek van beweerde tugwaardige sonde sou kon lei;
  - 63.3.1.3 'n Kerkvergadering of sy gevolmagtigde kommissie kan eers probeer om, waar toepaslik, die saak deur herderlike sorg, versoeningsaksie, of die hantering daarvan as 'n geskil, op te los. Indien so 'n proses nie die gewenste resultaat lewer nie, gaan die ondersoek amptelik voort;
  - 63.3.1.4 Indien besluit word om 'n beweerde tugwaardige sonde nie amptelik te ondersoek nie, moet die klaer of aanbringer van die gerug of verslag, asook die persoon oor wie die klag of gerug gaan, waar nodig skriftelik in kennis gestel word;
  - 63.3.1.5 'n Klag, gerug of verslag wat ontvang word, word nadat dit ter tafel geneem is, die besit van die betrokke kerkvergadering of sy gevolmagtigde kommissie en kan nie sonder toestemming van die betrokke kerkvergadering of sy gevolmagtigde kommissie teruggetrek word nie.
  - 63.3.1.6 Indien besluit word om die beweerde tugwaardige sonde amptelik te ondersoek, word die inhoud op skrif gestel.

### **63.4 Opskrifstelling van 'n klag, gerug of verslag**

- 63.4.1 Die aangewese ondersoekliggaam is verantwoordelik vir die opskrifstelling van die gerug.
- 63.4.2 In die geval van 'n klag kan die ondersoekliggaam die klaer adviseer met betrekking tot die formulering van die klag. Dit geskied met goedkeuring van die klaer.
- 63.4.3 In die geval van 'n verslag formuleer die ondersoekliggaam self die beweerde sonde wat ondersoek moet word.
- 63.4.4 'n Geformuleerde klag wat ondersoek word moet skriftelik die aard, plek en tyd van die beweerde sonde vermeld.

### **63.5 Besorging van klag of gerug**

Die inhoud van die geformuleerde klag of gerug moet 'n redelike tyd vóór die ondersoek daarvan, skriftelik aan die aangeklaagde of geïmpliseerde besorg word.

### **63.6 Die moontlikheid van stuiting**

- 63.6.1 By beweerde ergerlike wangedrag<sup>7</sup> deur 'n ampsdraer (vgl. Art. 61) mag die ring of sy gevolmagtigde kommissie na ontvangs van die klag, die verslag, of na kennisname van die gerug, die betrokke in die diens stuit. Die betrokke vergadering moet die geïmpliseerde

---

<sup>7</sup> Ergelike wangedrag kan onder meer die volgende behels: owerspel, onsedelikheid, egskeiding, moord, meined, diefstal en leerdwaling.

ampsdraer vooraf skriftelik kennis gee van die voorneme om hom/haar in die amp te stuit. Hierdie kennisgewing moet 'n bondige uiteensetting bevat van die beweerde ergerlike wangedrag en die betrokke uitnoui om skriftelike verhoë te rig voordat 'n besluit tot stuiting gefinaliseer word.

- 63.6.2 Hierdie stuiting geskied met kennisgewing aan die betrokke en die instansie in wie se diens hy/sy staan.
- 63.6.3 Kerklik gesproke is stuiting nie 'n tugmaatreël nie. Stuiting dien tot beskerming van die gemeente en/of individu(e) wat betrokke is in die ondersoek en die maatreël het betrekking op die uitoefening van ampsbevoegdhede tydens die ondersoek.

### **63.7 Die moontlikheid van 'n voorlopige ondersoek**

- 63.7.1 Die ondersoekliggaam kan 'n voorlopige ondersoek deur van sy lede laat doen.
  - 63.7.1.1 Die lede wat die voorlopige ondersoek doen, berei 'n verslag voor vir die ondersoekliggaam wat tot 'n bevinding(e) moet kom.
    - 63.7.1.2 Die verslag moet slegs feitlike inligting betreffende die voorlopige ondersoek bevat, dws:
      - 63.7.1.2.1 'n beskrywing van die inhoud en verloop van die ondersoek;
      - 63.7.1.2.2 stawende materiaal (notules, dokumente ens.)
    - 63.7.1.3 Die verslag mag geen bevinding(e) na aanleiding van die ondersoek of aanbevelings betreffende skuld of onskuld en moontlike tugmaatreëls bevat nie.
  - 63.7.2 Die verslag van die voorlopige ondersoek dien voor die vergadering van die ondersoekliggaam wat 'n bevinding(e) moet maak en besluite moet neem betreffende die skuld of onskuld en moontlike tugmaatreëls.
  - 63.7.3 Die vereistes vir die voorlopige ondersoek is dieselfde as dié vir die ondersoekliggaam wat tot 'n bevinding(e) en besluite moet kom.
  - 63.7.4 Deelname aan so 'n voorlopige ondersoek ontnem die lede nie van sittingsreg aan die ondersoekvergadering wat die saak hanteer nie.

### **63.8 Vereistes vir 'n tugondersoek**

Ooreenkomstig Art. 59.2 en om gestalte te gee aan Art. 60.3, moet kerkvergaderings of hulle gevolmagtigdes aan die volgende uitvoering gee tydens die ondersoek:

- 63.8.1 Suiwering van die ondersoekliggaam
  - Niemand met 'n botsende belang ten opsigte van die saak wat ondersoek word, mag deel wees van 'n liggaam wat 'n tugondersoek doen en besluite daarvoor neem nie. Die ondersoekliggaam moet dus gesuiwer word van persone soos die partye (die klaer(s) en die aangeklaagde(s)), hulle getuies, persone wat in die eerste of tweede graad aan die partye verwant is en ander persone wat een of ander persoonlike belang by die saak het.
- 63.8.2 Vergaderings wat tugondersoeke doen, is geslote vergaderings.
- 63.8.3 Klaer(s), aangeklaagde(s) en getuies moet voldoende geleentheid kry om hulle saak te stel.
- 63.8.4 Die partye is nie geregtig op iemand wat namens hulle optree nie, maar kan bygestaan word deur 'n lidmaat van die eie of 'n ander gemeente.
- 63.8.5 Die ondersoek van 'n beweerde tugwaardige sonde vind deurentyd plaas in die teenwoordigheid van die klaer(s) en die aangeklaagde(s). Vrae deur al die aanwesiges kan oor en weer gestel word. Die betrokke vergadering kan self ook getuies oproep en getuies aanbied om tot 'n behoorlike bevinding in sy ondersoek te kom. Die partye self kan in die loop van die saak verdere getuies aanbied om lig op die saak te werp.
- 63.8.6 Indien enige van die partye weier om voor die betrokke ondersoekliggaam te verskyn of die voortgang van die ondersoek verhinder kan die ondersoekliggaam met opgaaf van redes die ondersoek in sy/haar afwesigheid voortgesit.

- 63.8.7 Die lede van 'n ondersoekliggaam wat tot 'n bevinding(e) en besluite in 'n tugsak kom, moet almal vir die volle duur van die ondersoek teenwoordig wees.
- 63.8.8 Ná die ondersoek maak die gesuiwerde ondersoekliggaam in afwesigheid van die partye sy bevinding(e) en neem besluite.
- 63.8.9 Die bevindinge en besluite tot tugmaatreëls van kerkvergaderinge of hulle gevolmagtigde ondersoekliggame moet met opgaaf van redes gepaard gaan.
- 63.8.10 Die koste van 'n tugondersoek kom op die rekening van die betrokke kerkvergadering, met dien verstande dat die partye self vir die koste van hulle getuies verantwoordelik is.

## Artikel 64

### Tugmaatreëls

- 64.1 Die onderstaande tugmaatreëls kan deur ondersoekliggame toegepas word.<sup>8</sup>
- 64.2 **Dooplidmate**
  - 64.2.1 'n bestraffing in 'n privaatgesprek of ter vergadering van die ondersoekliggaam;
  - 64.2.2 sensuur wat bestaan uit onthouding van die nagmaal en/of weerhouding van die aflegging van belydenis van geloof;
  - 64.2.3 afsnyding van die gemeente deur die gebruik van die betrokke formulier.
- 64.3 **Belydende lidmate**
  - 64.3.1 'n bestraffing in 'n privaatgesprek of ter vergadering van die ondersoekliggaam;
  - 64.3.2 sensuur wat bestaan uit die onthouding van die sakramente en die opskorting van ander lidmaatsregte;<sup>9</sup>
  - 64.3.3 afsnyding van die gemeente nadat sensuur en voortgesette herderlike sorg nie tot berou gelei het nie, en deur die gebruik van die betrokke formulier.
- 64.4 **Ouderlinge en diakens**
  - 64.4.1 'n bestraffing in 'n privaatgesprek of ter vergadering van die ondersoekliggaam;
  - 64.4.2 skorsing met of sonder onthouding van die sakramente en met of sonder opskorting van lidmaatsregte totdat daar bewys van grondige berou is;
  - 64.4.3 afsetting uit die diens met opskorting van lidmaatsregte en onthouding van die sakramente.
- 64.5 **Evangeliedienaars**
  - 64.5.1 'n bestraffing in 'n privaatgesprek of ter vergadering van die ondersoekliggaam;
  - 64.5.2 skorsing vir 'n vasgestelde tydperk met een of meer van die volgende maatreëls:
    - 64.5.2.1 opskorting van lidmaatsregte;
    - 64.5.2.2 onthouding van die sakramente;
    - 64.5.2.3 gedeeltelike of volle weerhouding van lewensonderhoud en toelaes.

---

<sup>8</sup> Hoewel die maatreëls in hierdie Artikel vervat opeenvolgend toegepas kan word, sal dit nie in alle gevalle die aangewese weg wees nie.

<sup>9</sup> Lidmaatsregte wat deur hierdie tugmaatreël geraak kan word, behels onder meer die reg om verkies te word as kerkraadslid, die reg om as doopgetuie te staan, die reg om 'n attestaat te ontvang, die reg om belydenis van geloof af te lê, die reg om onderrig te gee in die gemeente, die reg om deel te neem aan 'n gemeentevergadering, in die geval van ampsdraers die reg om hulle ampspligte uit te oefen, in die geval van leraars ook die reg om beroep te word of om 'n ongekwalifiseerde akte van demissie te ontvang. Die reg op herderlike versorging van lidmate word nie deur hierdie tugmaatreël geraak nie.

- 64.5.3 Indien die ondersoekliggaam nie oortuig is van die egtheid van die berou nie, kan hierdie skorsing verleng word.<sup>10</sup>
- 64.5.4 Ontslag met een of meer van die maatreëls: opskorting van lidmaatsregte en/of onthouding van die sakramente. Ontslag kan wees:
  - 64.5.4.1 ontslag uit die diens van die gemeente of uit die diens van die kerkverband;
  - 64.5.4.2 ontslag uit die diens van die gemeente of uit die diens van die kerkverband met die aanbeveling aan die Algemene Sinode of sy gevolmagtigde kommissie dat die betrokke leraar se ampsbevoegdheid opgeskort word;
  - 64.5.4.3 ontslag uit die diens van die gemeente of uit die diens van die kerkverband met die aanbevelings dat die Algemene Sinode of sy gevolmagtigde kommissie die leraar se ampsbevoegdheid beëindig wat die nietigverklaring van die akte van legitimasie insluit.

## Artikel 65

### Appèlle

- 65.1 Ooreenkomstig Artikel 23 kan daar teen die bevindinge en tugmaatreëls van tugliggame geappelleer word.
- 65.2 Oor leerstellige sake en bevoegdheidsaangeleenthede van gelegitimeerdes kan tot by die Algemene Sinode geappelleer word (vgl Art. 44.4).
- 65.3 Oor ander sake wat met die tug verband hou, kan daar nie verder as die sinode geappelleer word nie.<sup>11</sup>

## Artikel 66

### Opheffing van Tugmaatreëls

- 66.1 Tugmaatreëls het berou en inkeer ten doel en word, met inagneming van Artikel 59.1, opgehef in die geval van
- 66.2 **Lidmate**
  - 66.2.1 Wanneer 'n belydende lidmaat berou betoon nadat hy/sy onder sensuur geplaas is, hef 'n ondersoekliggaam of kerkraad wat oortuig is van die egtheid van die berou, die sensuur op.
  - 66.2.2 Wanneer belydenis van geloof weerhou is, laat die kerkraad die dooplidmaat toe tot belydenisaflegging wanneer die tugliggaam oortuig is van die egtheid van berou.
  - 66.2.3 Wanneer 'n lidmaat wat van die gemeente afgesny is, berou betoon en verlang om weer in die gemeente opgeneem te word, neem die kerkraad, as hy oortuig is van die egtheid van die berou, die persoon weer in die gemeente op met die gebruik van die betrokke formulier. By dooplidmate kan hierdie stap gepaard gaan met belydenisaflegging.
- 66.3 **Ouderlinge en diakens**

As die ring of sy gevolmagtigde kommissie as ondersoekliggaam oortuig is van die egtheid van berou, kan die sensuur of skorsing van ouderlinge en diakens opgehef word. Ouderlinge en diakens wat afgesit is, kan dan weer verkies word tot die kerkraad.<sup>12</sup>
- 66.4 **Evangeliedienaars**

---

<sup>10</sup> Ter wille van die bediening in die gemeente moet die skorsing nie onbepaald voortduur nie. Ringe moet toesien dat die gemeentebediening nie skade ly nie.

<sup>11</sup> Vir die reëlings in verband met appèlle vergelyk Artikel 23 en toepaslike besluite.

<sup>12</sup> Al hierdie maatreëls hoef nie almal of gelyktydig opgehef te word nie.

- 66.4.1 As die ring of sy gevolmagtigde kommissie as ondersoekliggaam oortuig is van die egtheid van berou, word die sensuur en skorsing as tugmaatreëls opgehef met verslag aan die Algemene Regskommissie.
- 66.4.2 By ontslag volgens Artikel 64.5.4.2 moet die ring of sy gevolmagtigde kommissie, as ondersoekliggaam, die sensuur ophef voor die Algemene Regskommissie die ampsbevoegdheid kan herstel.<sup>13</sup>
- 66.4.3 Herstel in diens van die gemeente kan alleen deur 'n beroep geskied of na 'n suksesvolle appél teen die ontslag-tugmaatreëls genoem in Artikel 64.5.4.1 - 64.5.4.3.
- 66.4.4 Legitimasie na verlies van bevoegdheid van 'n predikant of proponent vind plaas deur die Algemene Regskommissie na *colloquium doctum* op aanbeveling van die sinode/sinodale kommissie na oorweging van die getuienis van die ring wat die aansoek om hertoelating hanteer (vgl Reglement 3 : 6).
- 66.4.5 In die geval van ontneming van bevoegdheid deur tughandeling as gevolg van ergerlike sondes soos owerspel, onsedelikheid, egskeiding, moord, meened, diefstal of na afsetting as gevolg van leerdwaling, mag toestemming tot legitimasie alleen by hoë uitsondering, nadat gunstige aanbevelings van alle betrokke instansies ontvang is, deur die Algemene Sinode in sitting verleen word.

---

<sup>13</sup> Al hierdie maatreëls hoef nie almal of gelyktydig opgehef te word nie.

# HOOFSTUK 6

## BETREKKINGE VAN DIE KERK NA BUITE

### 6.1 Kerk en staat

#### Artikel 67

- 67.1 In die lig van Romeine 13 erken die Kerk die staat as 'n dienaar van God tot ons beswil. Dit is God wat aan die staat die opdrag gegee het om die reg te handhaaf en die kwaaddoeners te straf.
- 67.2 Die Kerk erken dat die staatsowerheid wat deur sy fisiese swaardmag in beheer van 'n bepaalde staatsgebied is, deur God beskik is en as sodanig eerbiedig moet word. Die norm vir die Kerk se deelname aan die publieke regsverkeer en uitoefening van burgerlike regte is die Woord van God.
- 67.3 Christus is die Hoof van die kerk. Daarom beskou die Kerk sy reg op vryheid van godsdiens, wat sy Bybels-profetiese getuienis teenoor die staatsowerheid en die wêreld waarin hy staan, insluit, as onvervreembaar. In die uitoefening hiervan maak hy aanspraak op die regsgebepaalde beskerming van die owerheid.
- 67.4 Die Kerk nader staatsowerhede op alle vlakke op 'n ordelike wyse. Hierdie skakeling word gedoen deur sy erkende kerkvergaderings of die kommissies wat hulle daarvoor aanwys. Skakeling oor sake wat die Kerk in sy algemene sinodale verband raak, geskied deur die Algemene Sinode of sy betrokke kommissie. Skakeling sonder 'n opdrag van die Algemene Sinode geskied deur die betrokke kommissie in oorleg met die Algemene Sinodale Kommissie.

### 6.2 Kerk, maatskappy en vrye vereniging

#### Artikel 68

Waar moontlik, verleen die Kerk steun aan maatskaplike, nie-kerklike organisasies wat op 'n positiewe Christelike basis georganiseer is en daarop gemik is om die koninkryk van God te bevorder. Hierdie steun geskied vanuit 'n kerklike perspektief en op 'n kerklike wyse. Die vraag of 'n bepaalde organisasie kan aanspraak maak op die steun van die Kerk, hang af van sy grondslag en doelstellings en die uitlewing daarvan in die praktyk.

### 6.3 Kerk en onderwys

#### Artikel 69

- 69.1 Die Kerk beywer hom daarvoor dat die Woord van God en Protestants-Christelike norme en waardes rigtinggewend sal wees in onderwys- en opvoedkundige instellings en ook vir die kultuuridroom waarin die onderwys plaasvind.
- 69.2 Die Kerk erken die interne bevoegdheid van onderwysinstellings om tipiese onderwysaangeleenthede (standaarde, leerinhoude, ensovoorts) te finaliseer.
- 69.3 Die Kerk beywer hom vir Christelike opvoeding en onderwys vir sy kinders en jongmense. Hierdie onderwys moet verantwoorde standaarde en leerinhoude insluit.

## **6.4 Kerk en ekumeniese betrekking**

### **Artikel 70**

- 70.1 Die Kerk streef daarna om deur middel van sy vergaderinge op 'n verantwoorde wyse met ander Christelike kerke saam te werk, 'n gemeenskaplike boodskap uit te dra en saam te stry vir die behoud van Christelike lewensbeginsels.
- 70.2 Die Algemene Sinode bepaal die aard en graad van die betrekkinge met ander kerke of kerkgemeenskappe deur middel van 'n gewone meerderheidstem.
- 70.3 Die graad en wyse van samewerking word in elke geval bepaal deur die graad van ooreenstemming ten opsigte van belydenis, kerkregering, erediens en die siening van die Christelike lewenswandel van die betrokke kerk.
- 70.4 Die besluit oor 'n aansoek of beëindiging van lidmaatskap van 'n ekumeniese organisasie word geneem met 'n tweederdemeerderheidstem van die Algemene Sinode

### **Besluite by Artikel 70**

#### **EKUMENIESE BELEID**

##### **70b.1 UITGANGSPUNTE VIR DIE NG KERK MET BETREKKING TOT EKUMENIESE BETREKKINGE**

*Hierdie uitgangspunte moet saam gelees word met die volgende: (i) Die Reglement: Die NG Kerk en ander Christelike Kerke en Groepe (Kerkorde 1998, Reglement 21); (ii) Agenda Algemene Sinode 1994:66, punt 14.2.1-14.2.5; (iii) Die Ekumeniese Beleid. Agenda Algemene Sinode 1990:61-64, Handeling Algemene Sinode, 1990:546-549.*

##### **70b.1.1 Die kerk van Christus is wêreldwyd één**

##### **70b.1.2 Die kerk van Christus is oor die grense van plek en tyd één**

##### **70b.1.3 Eenheid is 'n gawe aan en 'n roeping vir die kerk**

*Hierdie taak word veral ook op plaaslike vlak volvoer – hier word die kragtigste getuienis van eenheid tot stand gebring. Plaaslike kerke streef daarna om met die ware kerk van Christus (NGB art. 29) saam te aanbid, te getuig en te werk.*

##### **70b.1.4 Eenheid en verskeidenheid**

*Eenheid is nie eendersheid nie. Die verskeidenheid van volke, tale, gebruike en kulture moet erken word. Ook die gevolglike ryk verskeidenheid in aanbidding, kerkstrukture, formuliere en kerkstrukture. Die verskeidenheid mag egter nie tot geskeidenheid lei nie – dit is 'n verskeidenheid in die eenheid van Christus se kerk.*

##### **70b.1.5 Eenheid in waarheid**

*Kerke streef daarna om saam die waarheid van die Woord van die Here, wat nie ter wille van eenheid prysgegee moet word nie, te soek.*



## **70b.2 DIE NG KERK EN EKUMENIESE BETREKKINGE, BILATERAAL EN MULTILATERAAL (EKUMENIES)**

- 70b.2.1 *Die NG Kerk (Algemene Sinode) wil aktief bilaterale (een-tot-een) verhoudinge met ander Christelike kerke (denominasies) aanknoop, handhaaf en bevorder, beide op nasionale en internasionale vlak.*
- 70b.2.2 *Oor die kerke met wie bilaterale verhoudinge aangegaan word en die aard en graad van elke verhouding besluit die Algemene Sinode op onder meer aanbeveling van sy Ekumeniese Kommissie ('n subkommissie van die ASK).*
- 70b.2.3 *Die NG Kerk wil ook sy roeping tot die eenheid van die kerk bevorder en handhaaf deur in nasionale en internasionale ekumeniese organisasies en liggame op 'n multilaterale vlak (ekumenies) met ander kerke en organisasies in verhouding te tree.*
- 70b.2.4 *Oor die ekumeniese organisasies of liggame met wie in verbinding getree word, die aard en graad van die multilaterale betrekkinge besluit die Algemene Sinode op aanbeveling van onder meer sy Ekumeniese Kommissie.*

## **70b.3 BILATERALE KERKLIKE VERHOUDINGE**

*Bilaterale kerklike betrekkinge met ander kerke (nasionaal of internasionaal) kan bestaan uit:*

- \* Volle verhoudinge*
- \* Gedeeltelike verhoudinge*
- \* Dialoogverhoudinge*
- \* Insidentele kontakverhoudinge*

### **70b.3.1 Volle verhoudinge**

#### **70b.3.1.1 Die omvang van volle verhoudinge**

*'n Volle verhouding met 'n ander kerk behels die volgende:*

- \*1 Dit is 'n verhouding met 'n ander kerk van gereformeerde belydenis*
- \*2 Die volle verhouding behels:*
  - \*2.1 die stuur van afgevaardigdes na mekaar se sinodes*
  - \*2.2 die toelaat van leraars op mekaar se kansels*
  - \*2.3 die toelaat van mekaar se lidmate tot die nagmaalstafel*
  - \*2.4 gesamentlike optrede op terreine van gemeenskaplike verantwoordelikheid*
  - \*2.5 kommunikasie met mekaar oor sake van gemeenskaplike belang en kommer*
  - \*2.6 wedersydse opsig oor en sorg vir mekaar as kerke ten einde die eenheid van die kerk te bevorder*
  - \*2.7 die pastorale versorging van mekaar se lidmate wanneer hulle binne die grense van mekaar se kerke vestig*
  - \*2.8 die wedersydse erkenning van mekaar se teologiese opleiding en gevolglike ooreen-weer beroepbaarheid van leraars met inagneming van spesifieke vereistes wat 'n kerk kan stel.*

*70b.3.1.2 Die Ekumeniese Kommissie sien toe dat die bepalinge van 'n volle verhouding met 'n kerk namens die NG Kerk in 'n ooreenkoms neerslag vind en nagekom word.*

- 70b.3.1.3 *Die Ekumeniese Kommissie bly op hoogte van ontwikkelinge in dié kerke met wie die NG Kerk volle verhoudinge het en lig die Algemene Sinode gereeld daaroor in.*
- 70b.3.1.4 *Die Ekumeniese Kommissie adviseer die Algemene Sinode oor die kerke met wie volle verhoudinge aangegaan en volgehou kan word.*
- 70b.3.1.5 *Indien alle aspekte van 'n volle kerklike verhouding vanweë praktiese omstandighede nie gerealiseer kan word nie, kan volle betrekkinge ten opsigte van sommige aspekte aangegaan word. Die doel moet steeds volle betrekkinge ten opsigte van alle fasette wees.*

### **70b.3.2 Gedeeltelike verhoudinge**

- 70b.3.2.1 *Die NG Kerk streef daarna om gedeeltelike kerklike verhoudinge na te streef en aan te gaan met kerke van gereformeerde oortuiging met wie die NG Kerk nie in volle verhouding staan nie.*
- 70b.3.2.2 *Voorwaardes vir die aangaan van 'n gedeeltelike kerklike verhouding is:*
- \*1 Wedersydse erkenning van 'n gemeenskaplike basis in gereformeerde geloofsoortuiginge soos uitgedruk in reformatoriese belydenisskrifte.*
  - \*2 'n Wedersydse begeerte om 'n kerklike verhouding aan te gaan.*
- 70b.3.2.3 *'n Gedeeltelike verhouding word aangegaan met die veronderstelling dat dit tot 'n volle kerklike verhouding kan lei.*
- 70b.3.2.4 *Samewerkingsooreenkomste, gesamentlike optrede ten opsigte van gemeenskaplike verantwoordelikhede, voortgaande kommunikasie oor sake van gemeenskaplike kommer en wedersydse sorg vir mekaar se lidmate indien daartoe versoek, is moontlik met kerke met wie die NG Kerk in 'n gedeeltelike verhouding staan.*
- 70b.3.2.5 *Die Ekumeniese Kommissie identifiseer met verantwoording aan die Algemene Sinode die kerke met wie die NG Kerk gedeeltelike verhoudinge wil aangaan en is, indien nodig, namens die NG Kerk verantwoordelik vir die samewerkingsooreenkomste, gesamentlike optredes, voortgaande kommunikasie en die implementering van die wedersydse versorging van lidmate indien daartoe versoek.*
- 70b.3.2.6 *Die Ekumeniese Kommissie adviseer die Algemene Sinode wanneer 'n gedeeltelike verhouding kan oorgaan in 'n volle verhouding.*

### **70b.3.3 Dialoogverhoudinge**

- 70b.3.3.1 *Die NG Kerk streef daarna om deur die Ekumeniese Kommissie in gereelde dialoog te tree met 'n wye verskeidenheid kerke wat nie noodwendig dieselfde belydenisgrondslag of standpunte het nie ten einde ingelig te word oor hulle kerklike lewe, verhoudinge en standpunte.*
- 70b.3.3.2 *Die Ekumeniese Kommissie identifiseer die kerke en voer die gesprekke op 'n gereelde basis met verantwoording aan die Algemene Sinode.*
- 70b.3.3.3 *Benewens dat die dialoog kan lei tot gedeeltelike of volle kerklike verhoudinge, kan die gesprekke ook op kort termyn die moontlikhede van samewerking, gesamentlike optredes en kommunikasie oor sake van gemeenskaplike kommer oorweeg en soos nodig verder voer.*

### **70b.3.4 Kontakverhoudinge**

- 70b.3.4.1 *Die NG Kerk wil ook die roeping tot ekumene uitvoer deur na luid van behoeftes, omstandighede en geleenthede, insidentele kontak op te neem met ander kerke.*

70b.3.4.2 Die kontakverhoudinge word deur die Ekumeniese Kommissie behartig met verantwoording aan die Algemene Sinode.

#### **70b.4 MULTILATERALE KERKLIKE VERHOUDINGE**

70b.4. Die NG Kerk wil sy ekumeniese roeping bevorder en uitbou deur:

70b.4.1.1 deel te wees van ekumeniese organisasies waar die Kerk met ander Gereformeerde Kerke kan saamwerk

70b.4.1.2 deel te neem aan ekumeniese organisasies, geselskappe en verenigings wat die kerk sal toelaat om die ekumeniese verantwoordelikhede wyd, effektief en doeltreffend na te kom

70b.4.1.3 verhoudinge met ekumeniese organisasies te ontwikkel.

70b.4.2 Oor die aard, graad en omvang van deelname aan 'n multilaterale ekumeniese organisasie, geselskap of vereniging, besluit die Algemene Sinode na 'n bestudering van die aard van 'n betrokke ekumeniese organisasie soos dit gevind en gedemonstreer word in die grondwet, basiese uitgangspunte, verklarings, aktiwiteite en optredes van elke organisasie. Die Ekumeniese Kommissie adviseer die Algemene Sinode hierin.

70b.4.3 Grade van betrokkenheid by multilaterale organisasies kan, wat die NG Kerk betref, die volgende behels:

\*1 **volle lidmaatskap** – dit wil sê volle deelname, verkiesbaarheid tot ampte, aanvaarding van medeverantwoordelikheid vir besluite en aksies.

\*2 **waarnemerlidmaatskap** – dit wil sê die kerk neem net die handeling en optredes van die betrokke organisasie waar en aanvaar nie verantwoordelikheid vir besluite en optredes nie; is ook nie verkiesbaar tot enige ampte nie.

#### **70b.5. DIE EKUMENIESE KOMMISSIE**

70b.5.1 Die Ekumeniese Kommissie word deur die ASK saamgestel en rapporteer aan die Algemene Sinode deur die ASK.

70b.5.2 Ooreenkomstig die uitgangspunte van die NG Kerk vir ekumeniese betrekkinge en ander besluite van die Algemene Sinode, dra die Algemene Sinode dit op aan die Ekumeniese Kommissie om belangstelling in en verhoudinge met die kerk van Christus wêreldwyd (nasionaal en internasionaal) te handhaaf en te bevorder.

70b.5.3 Die taak van die Ekumeniese Kommissie in bilaterale verhoudinge

70b.5.3.1 Die taak van die Ekumeniese Kommissie met betrekking tot kerke met wie die NG Kerk in volle verhouding is:

\*1 Die Ekumeniese Kommissie identifiseer kerke met wie die Algemene Sinode in volle verhouding kan tree en adviseer die Algemene Sinode daarvoor.

\*2 Die Ekumeniese Kommissie handhaaf noue en voortgesette verhoudinge met dié kerke met wie die Algemene Sinode besluit het om in volle verhouding te tree.

\*3 Die Ekumeniese Kommissie bly ingelig oor ontwikkelinge in dié kerke met wie die Algemene Sinode volle verhoudinge aangegaan het en lig ook die Algemene Sinode dienooreenkomstig in.

\*4 Benewens die normale spektrum van vol verhoudinge beveel die Ekumeniese Kommissie by die Algemene Sinode aan watter spesifieke soort vol verhoudinge met elke kerk aangegaan moet word.

70b.5.3.2 Die taak van die Ekumeniese Kommissie met betrekking tot gedeeltelike verhoudinge

- \*1 *Die Ekumeniese Kommissie identifiseer kerke met wie die NG Kerk gedeeltelike verhouding wil aangaan en adviseer die Algemene Sinode daaroor.*
- \*2 *Die Ekumeniese Kommissie inisieer en/of maak kontak met kerke met wie die NG Kerk gedeeltelike verhoudinge sou kon aangaan. In hierdie proses kan van die volgende gebruik gemaak word:*
  - \*2.1 *uitnodigings dat daar wedersyds afgevaardigdes na mekaar se Algemene Sinodes (of die ekwivalent) gestuur word, waar die afgevaardigdes erken word en geleentheid kry om verteenwoordigers van die kerk te ontmoet. Die NG Kerk sou ook aan die afgevaardigde van die ander kerk geleentheid kon gee om kortliks groete oor te dra*
  - \*2.2 *indien daar nie van wedersydse ekumeniese afgevaardigdes gebruik gemaak word nie, kan daar per skrywe gekommunikeer word – verslag word aan die Algemene Sinode gedoen*
  - \*2.3 *daar kan ook wedersyds van persone of instelling gebruik gemaak word wat per geleentheid by 'n kerk kan besoek aflê*
  - \*2.4 *die gereelde stuur van agendas, handeling, die kerkorde en ander amptelike dokumente aan die ander kerk*
  - \*2.5 *die Ekumeniese Kommissie moet steeds ook weë bedink waarop die NG Kerk tot diens kan wees en dit onder die aandag van die ander kerk(e) bring soos byvoorbeeld geleenthede vir opleiding van leraars en ander werkkragte, beskikbaarheid van onderrigmateriaal, of enige ander vorm van diens wat die NG Kerk sou kon lewer. Daar moet ook kennis geneem word van die dienste wat ander kerke sou kon lewer.*

*70b.5.3.3 Die taak van die Ekumeniese Kommissie met betrekking tot kerke met wie die NG Kerk in dialoog/ kontak is.*

*In uitvoering van die standpunt van die NG Kerk om betrekkinge met ander kerke te bevorder en te handhaaf, gee die Ekumeniese Kommissie deur studie en kontak – soos die geleentheid hom voordoen – uitvoering aan die beleidstandpunt van die kerk. Dit gebeur deur dialoog of ander vorme van kontak met:*

- \*1 *kerke wat belangstel om een of ander vorm van betrekking aan te gaan*
- \*2 *kerke wat spesifiek met die NG Kerk 'n betrekking wil aangaan*
- \*3 *kerke wat hulle bande met die NG Kerk verbreek het of hulle om een of ander rede teruggetrek het uit 'n vorige verhouding*
- \*4 *kerke van verskillende historiese of konfessionele agtergronde wat bereid is om sake van gemeenskaplike belang of oor sake wat opklaring verg, te praat of te kommunikeer.*

*70b.5.3.4 Die taak van die Ekumeniese Kommissie met betrekking tot multilaterale verhoudinge*

- \*1 *Die Ekumeniese Kommissie dien as kontakliggaam van die NG Kerk met ekumeniese organisasies.*
- \*2 *Die Ekumeniese Kommissie dien as die skakelligaam tussen die NG Kerk en dié ekumeniese liggame of organisasies met wie die NG Kerk betrekkinge het. Ten opsigte van hierdie liggame/organisasies moet die Ekumeniese Kommissie:*
  - \*2.1 *hulle aktiwiteite bestudeer en die Algemene Sinode met 'n verslag en aanbevelings dien;*

- \*2.2 *persone identifiseer wat die NG Kerk by die onderskeie organisasies/liggame verteenwoordig.*
- \*3 *Die Ekumeniese Kommissie stel ondersoek in na verskillende ekumeniese organisasies, neem dit waar, bestudeer dit en doen daarvoor aan die Algemene Sinode verslag.*

## **70b.6. DIE STAND VAN SAKE VAN DIE NG KERK SE EKUMENIESE BETREKKINGE**

*Onderstaande is die stand van sake in Oktober 2002. Die Algemene Sinode sal gereeld op hoogte gehou word van die toedrag van sake.*

### **70b.6.1 Kerke met wie die NG Kerk in vol betrekkinge staan**

70b.6.1. *Die Familie van NG Kerke in Suid-Afrika.*

70b.6.1.2 *Die NG Kerk staan in 'n besondere betrekking met die Nederduitsch Hervormde Kerk van Afrika en die Gereformeerde Kerke in Suid-Afrika, wat vir die huidige uitdrukking vind in die Tussenkerklike Raad.*

70b.6.1.3 *Die NG Kerk staan in 'n besondere betrekking met die lede van die NG Kerkfamilie buite SA wat vir die huidige uitdrukking vind in die Federale Raad.*

### **70b.6.2 Ander Kerke met wie die NG Kerk in vol betrekking staan**

70b.6.2.1 *Christian Reformed Church in North America*

70b.6.2.2 *Christian Reformed Churches of Australia*

70b.6.2.3 *Reformed Church in Japan*

### **70b.6.3 Kerke met wie die NG Kerk in dialoog is**

70b.6.3.1 *Evangelische Kirche Deutschland*

70b.6.3.2 *Apostoliese Geloof Sending van Suid-Afrika*

70b.6.3.3 *Methodist Church*

70b.6.3.4 *Uniting Presbyterian Church in Southern Africa*

70b.6.3.5 *Rooms-Katolieke Kerk van Suid-Afrika*

70b.6.3.6 *Afrikaanse Protestantse Kerk*

70b.6.3.7 *Gereformeerde Kerke van die Nederlande*

70b.6.3.8 *Church of England in South Africa*

70b.6.3.9 *Church of the Province of Southern Africa*

70b.6.3.10 *Federasie van Switserse Protestantse Kerke*

### **70b.6.4 Multilaterale verhouding**

70b.6.4.1 *Volle lidmaatskap*

\*1 *Gereformeerde Ekumeniese Raad (GER)*

\*2 *Wêreldbond van Gereformeerde Kerke (WBGK)*

\*3 *Suid-Afrikaanse Bond van Gereformeerde Kerke (SABGK)*

\*4 *Federale Raad van die NG Kerkfamilie*

\*5 *Konvent van Reformatoriese Kerke*

\*6 *Tussenkerklike Raad (TKR)*

70b.6.4.2 *Waarnemerlidmaatskap*

\*1 *Suid-Afrikaanse Raad van Kerke (SARK)*

# REGLEMENTE

## 1. REGLEMENT: ALGEMENE SINODALE KOMMISSIE (ASK)

### 1. NAAM

Algemene Sinodale Kommissie (ASK).

### 2. SAMESTELLING EN VAKATURES

2.1 Die Algemene Sinodale Kommissie word soos volg saamgestel:

2.1.1 die moderator, assessor, aktuaris en skriba (die Moderatuur) van die Algemene Sinode wat ook die voorsitter, ondervoorsitter, aktuaris en skriba van die ASK is en die dagbestuur vorm;

2.1.2 een verteenwoordiger (met sekundus) van elke sinode;

2.1.3 twee ouderlinge/diakens (met sekundi) wat nie oor die bevoegdheid van proponent/predikant beskik nie;

2.1.4 die voorsitter van die Algemene Kommissie vir Vrouelidmate (met sekundus).

2.1.5 Die Predikant in Algemene Sinodale Diens Inligting en Ekumene en die Redakteur van die Kerkbode/Amptelike tydskrif dien in die ASK met adviserende stem. Indien die dagbestuur/ASK dit noodsaaklik ag, kan 'n verteenwoordiger van 'n kommissie/subkommissie van die Algemene Sinode vir die duur van die hantering van 'n saak die vergadering adviserend bywoon.

### 2.2 Aanvul van vakatures

2.2.1 'n Vakature ontstaan in die Algemene Sinodale Kommissie deur die bedanking, emeritaat, verlies van bevoegdheid, opsegging van kerkverband, afsetting of dood van 'n lid. 'n Vakature ontstaan ook wanneer 'n lid bedoel in bepaling 2.1.2 uit sy/haar sinodale gebied vertrek of nie weer tot die moderatuur verkies word nie. Wanneer 'n lid van die moderatuur wat ingevolge Artikel 39 verkies is, na 'n ander sinodale gebied verskuif, bly hy/sy lid van die Algemene Sinodale Kommissie.

2.2.2 Indien 'n vakature ontstaan ten opsigte van 'n lid van die moderatuur wat ingevolge Artikel 39 verkies is, benoem die Algemene Sinodale Kommissie uit die geledere van alle afgevaardigdes na die vorige Algemene Sinode 'n persoon om die vakature aan te vul.

2.2.3 'n Vakature vanweë die afwesigheid van 'n ouderling/diakens wat ingevolge bepaling 2.1.3 verkies is, word deur die Algemene Sinodale Kommissie uit die sekundi aangevul. Indien een van die ouderlinge/diakens tot 'n moderatuur van 'n sinode verkies word, ontstaan nie 'n vakature nie.

### 3. OPDRAG

Die Algemene Sinodale Kommissie

3.1 gee uitvoering aan besluite van die Algemene Sinode wat nie onder die opdragte van ander kommissies van die Algemene Sinode ressorteer nie;

3.2 hanteer voorlopig met verantwoording aan die volgende Algemene Sinode sake van spoedeisende aard;

3.3 roep indien nodig 'n buitengewone vergadering van die Algemene Sinode byeen.;

- 3.4 dien as Kommissie van die Algemene Sinode vir Ekumeniese Betrekkinge;
- 3.5 skenk deurlopend aandag aan rasionalisering van funksies/take van die Algemene Sinode soos verwoord in die Kerkorde en die reglemente van die onderskeie kommissies;
- 3.6 tree, na die eis van omstandighede in oorleg met die betrokke kommissie(s) van die Algemene Sinode en met verantwoording aan die volgende vergadering van die Algemene Sinode, leidinggewend en koördinerend op ten opsigte van werksaamhede van die Algemene Sinode tussen vergaderings.

#### **4. KONSTITUERING EN VERGADERINGS**

- 4.1 Die Algemene Sinodale Kommissie konstitueer tydens die vergadering van die Algemene Sinode en vergader normaalweg vier maal per jaar;
- 4.2 Die dagbestuur vergader slegs indien nodig met die oog op buitengewoon belangrike sake;
- 4.3 Die Kommissie benoem subkommissies na behoefte vir behartiging van sy werksaamhede.

## **2. REGLEMENT VIR DIE ALGEMENE KOMMISSIE VIR ARGIEF EN INLIGTING (AKAI)**

### **1. NAAM**

Algemene Kommissie vir Argief en Inligting (AKAI).

### **2. SAMESTELLING**

2.1 Die argivarisse of persone belas met die argiewe van sinodes plus die voorsitter/verteenwoordiger van elk van die betrokke kommissies.

2.2 Deskundiges beperk tot 'n maksimum van drie gekoöpteerde persone.

### **3. OPDRAG**

Die Kommissie

3.1 adviseer die Algemene Sinode

3.1.1 in verband met die argiefreglemente en handleidings vir die gebruik deur sinodes;

3.1.2 met betrekking tot die publisering van belangrike historiese bronne en ander kerkhistoriese publikasies;

3.2 sien toe dat die stukke van die Algemene Sinode en sy kommissies in die aangewese kerkargiefbewaarplek versorg en ontsluit word;

3.3 sien toe dat inligting vir In Memoriam verslae volgens die prosedure in die Argief- en Museumbeleid tussen sinodes uitgeruil word.

### **4. KONSTITUERING EN VERGADERINGS**

4.1 Die Kommissie konstitueer en vergader hoogstens drie maal tussen twee vergaderings van die Algemene Sinode.

4.2 By die konstituering word 'n dagbestuur saamgestel, bestaande uit die voorsitter, ondervoorsitter en skriba.

4.3 Die Kommissie benoem subkommissies volgens behoefte.

### **5. REKORDBEHEER**

5.1 Gemeentes beskik oor hul eie argivalia en lewer dit by die betrokke argief in vir bewaring, volgens die riglyne in die Agenda van die Algemene Sinode 1998, bl 142v.

5.2 Kommissies van die kerk in breër verband lewer gereeld hulle argivalia (alle stukke ouer as tien jaar) by die betrokke argief in vir bewaring.

5.3 Waar 'n gemeente met 'n ander gemeente verenig, word alle gemeentestukke van die gemeente wat sluit, behalwe dokumente van die laaste 5 jaar en die gemeenteregisters, by die argief ingehandig vir bewaring voor datum van eenwording.

5.4 Gemeentes wat ophou bestaan, lewer voor datum van ontbinding alle argivalia by die betrokke argief in.

5.5 Argiefskeppende instansies en amptenare moet by die inlewering van argivalia, die argief adviseer met betrekking tot stukke wat gesluit behoort te word, asook die tydperk. Sulke stukke is vir navorsers gesluit en word alleen beskikbaar gestel met goedkeuring van die argiefskeppende instansie, of indien die argief deur 'n hof daartoe gelas word.

5.6 Argiefskeppende instansies moet behulpsaam wees met die versameling en bewaring van ongepubliseerde verhandelinge (teologiese/historiese navorsing), gemeenteblaaie, fotomateriaal en akoestiese materiaal.



- 5.7 Vir doeltreffende rekordbeheer word die Riglyne vir die Bewaring van Kerklike Dokumente aanvaar as beleid. (Agenda van die Algemene Sinode 1998, bl 142).

### **3. REGLEMENT VIR DIE REËLING VAN DIE BEVOEGDHEID VAN PREDIKANTE EN PROPONENTE**

#### **1. ALGEMENE UITGANGSPUNTE**

- 1.1 Daar moet by elke aspek van die reëling van die bevoegdheid (wat verpligtinge en regte insluit) van predikante en proponente daarvan uitgegaan word dat dit Christus is wat sy kerk deur sy Woord en die Heilige Gees regeer en dat Hy dit doen deur persone wat Hy daartoe roep, toerus en in sy diens stel.
- 1.2 Die bevoegdheid vir die uitvoering van die werk van die bedienaar van die Woord is nie geleë in bepaalde vermoëns of besondere kwaliteite, of 'n aparte geestelike stand wat beklee is met 'n blywende eer of mag en wat deur die daad van ordening verkry word nie. Daar bestaan nie so iets soos 'n ampstatus wat aan die persoon kleef en aan hom/haar sekere regte en bevoegdhede verleen sonder dat hy/sy hulle amp binne gemeentelike of kerkverband beklee nie.
- 1.3 Iemand kan slegs predikant wees indien hy/sy behoorlik beroep/benoem, approbasie verkry en bevestig is (KO Artikel 4). Die amp funksioneer binne gemeentelike verband met dien verstande dat persone in 2.3 genoem, naamlik die wat deur die kerkverband beroep is as dosente aan die teologiese opleidingsentra van die NG Kerk of in diens van ringe, sinodes of die Algemene Sinode, per ooreenkoms met 'n gemeente in 'n gemeente beroep en bevestig kan word. Predikante in diens van die Kerkverband en teologiese dosente het beperkte ampsbevoegdheid wat beperk is tot die bediening van Woord en sakramente tensy hulle, benewens hulle verbandswerk, ook per ooreenkoms met 'n gemeente na die gemeente beroep en bevestig is as predikant. In laasgenoemde geval verkry hulle volle ampsbevoegdheid.
- 1.4 Die amp van die bedienaar van die Woord word in Artikel 9 van die Kerkorde omskryf.

#### **2. DIE BEVOEGDHEID VAN PREDIKANTE**

- 2.1 Vir die verkryging van die bevoegdheid van 'n predikant geld die volgende. Dit is iemand wat:
  - 2.1.1 die innerlike roeping van die Here ontvang het,
  - 2.1.2 die teologiese opleiding volgens die voorskrifte van die Algemene Sinode deurloop het,
  - 2.1.3 aan 'n ondersoek ten opsigte van leer en lewe en die geskiktheid vir die bediening onderwerp is,
  - 2.1.4 gelegitimeer en beroepbaar gestel is,
  - 2.1.5 deur 'n gemeente of ander kerklike instansie beroep is, en
  - 2.1.6 in die amp bevestig is.
- 2.2 Elke predikant wat in 'n gemeente bevestig is, beklee die amp soos omskryf in KO Artikel 9.
- 2.3 Persone wat vir diens in die kerkverband - ring, sinode of Algemene Sinode - beroep word, verkry beperkte ampsbevoegdheid en kan slegs die Woord, sakramente en die gebede bedien tensy hulle, benewens hulle verbandswerk, ook per ooreenkoms met 'n gemeente na die gemeente beroep en bevestig word in welke geval hulle volle ampsbevoegdheid verkry. Hierdie persone is :

- 2.3.1 Persone wat deur die kerkverband geroep is om as dosente studente aan die teologiese opleidingsentra van die Nederduitse Gereformeerde Kerk op te lei;
- 2.3.2 Predikante wat in diens van die kerkverband beroep is: hulle kan in diens van ringe, sinodes of die Algemene Sinode wees of kan deur die Algemene Sinode beroep en beskikbaar gestel word vir diens namens die Ned Geref Kerk in instansies soos die Bybelgenootskap, die Kapelaansdienste of ander instansies wat deur die Algemene Sinode of die ASK, namens die Algemene Sinode, goedgekeur is.
- 2.4 'n Proponent wat vir enige van die poste wat onder 2.3.2 vermeld word, benoem word, bly 'n proponent.
- 2.5 Persone wat ingevolge KO Artikel 12.7.2 en 12.7.3 demissie ontvang het, behou die bevoegdheid om predikant te wees met dien verstande dat hulle hul jaarliks voor 30 Junie by die Algemene Regskommissie aanmeld met vermelding van redes waarom hulle steeds predikantsbevoegdheid moet behou.
- 2.5.1 Hierdie aanmelding moet vergesel wees van 'n vertroulike aanbeveling oor die betrokke se gemeentelike meelewing, uitgereik deur die kerkraad van die gemeente waar hy/sy lidmaat is.
- 2.6 Emeriti wat ingevolge KO Artikel 14 uit diens getree het, behou die bevoegdheid om predikant te wees. Ter wille van die behoorlike instandhouding van die Bevoegdheidsregister moet sodanige persone jaarliks voor 30 Junie kennis gee aan die ARK.

### **3. DIE BEVOEGDHEID VAN PROPONENTE**

- 3.1 'n Proponent is iemand wat die vereiste teologiese opleiding deurloop het, deur middel van legitimasië vir die bediening van die Woord bevoeg verklaar is en beskikbaar is om 'n beroep te ontvang.
- 3.2 Proponente mag op uitnodiging van 'n kerkraad die Woord tydens eredienste en ander geleenthede verkondig.
- 3.3 Persone wat op grond van KO Artikel 11 of vir verdere studie demissie ontvang het (Reglement 22 : 4.2 en 4.3), word weer proponente.
- 3.4 Alle proponente wat die ouderdom van 60 jaar bereik het en hulle voornemens om nie weer voltyds in die bediening te staan nie skriftelik aan die Algemene Regskommissie bekendgemaak het, word in die Kerkbode bekendgestel as "nie beroepbaar". Hulle behou egter net soos proponente wat 65 geword het preekvergunning en kan dus op uitnodiging preekbeurte waarneem. Hulle hoef egter nie weer jaarliks by die Algemene Regskommissie aan te meld nie. Persone wat reeds die ouderdom van 65 jaar by legitimasië bereik het, het die bevoegdheid om die Woord te bedien, alhoewel hulle nie beskikbaar is vir beroeping nie.

### **4. VERANDERING VAN TOEGEKENE BEVOEGDHEID VAN PREDIKANTE EN PROPONENTE**

- 4.1 Persone aan wie die Algemene Regskommissie 'n sekere bevoegdheid as predikant of proponent toegeken het (2.3), behou hierdie bevoegdheid, ook al sou die Algemene Sinode hierdie reglement wysig, mits die oorspronklike voorwaardes wat in hulle geval gegeld het, dieselfde bly.
- 4.2 Predikante en proponente wat deur die NG Kerk gelegitimeer is en leraar wil word in 'n ander denominasie van gereformeerde belydenis, kan vooraf by die Algemene

Regskommissie aansoek doen om beroepbaar te bly binne die NG Kerk terwyl hy/sy in die ander denominasie werk.

## **5. VERLIES VAN BEVOEGDHEID**

- 5.1 Persone hou op om predikant te wees indien hulle:
  - 5.1.1 nie meer die werk soos in 2.2 en 2.3 omskryf, verrig nie behoudens 2.5;
  - 5.1.2 in 'n politieke bestuursliggaam dien of hulle as politieke kandidaat in 'n verkiesing vir enige vlak van regering beskikbaar stel;
  - 5.1.3 hulle deur woord of daad van 'n Nederduitse Gereformeerde gemeente afskei;
  - 5.1.4 wanneer hulle hulle bedanking by die betrokke kerkvergadering of kommissie indien en dit aanvaar word (vgl. 5.5);
  - 5.1.5 skriftelik aan die skriba van die Algemene Regskommissie kennis gee dat hulle die amp van predikant neerlê, met kennisgewing aan die ring onder wie se opsig hulle val;
  - 5.1.6 dit deur tughandeling verloor (KO Artikel 62.5.6).
- 5.2 Persone hou op om proponent te wees indien hulle:
  - 5.2.1 in 'n politieke bestuursliggaam dien of hulle as politieke kandidaat in 'n verkiesing vir enige vlak van regering beskikbaar stel;
  - 5.2.2 hulle deur woord of daad van 'n Nederduitse Gereformeerde gemeente afskei;
  - 5.2.3 skriftelik aan die skriba van die Algemene Regskommissie kennis gee dat hulle afstand doen van hulle bevoegdheid as proponent;
  - 5.2.4 dit deur tughandeling verloor (KO Art 62.5.6).
- 5.3 Proponente moet hulle jaarliks voor 30 Junie by die Algemene Regskommissie aanmeld ten einde aan te dui of hulle steeds beskikbaar is vir beroeping.
  - 5.3.1 Hierdie aanmelding moet vergesel wees van 'n vertroulike aanbeveling oor die betrokke se gemeentelike meelewing, uitgereik deur die kerkraad van die gemeente waar hy/sy lidmaat is.
- 5.4 Aangesien proponente onder die opsig van die kerkraad staan, word dit van die kerkraad verwag om op die hoogte te bly met die posisie van proponente wat onder sy opsig val.
- 5.5 Wanneer 'n persoon ophou om predikant of proponent te wees, word die volgende prosedure gevolg:
  - 5.5.1 Dit is die verantwoordelikheid van die betrokke kerkvergadering om die skriba van die Algemene Regskommissie van die verlies van bevoegdheid in kennis te stel.
  - 5.5.2 Iemand wat ophou om predikant of proponent te wees, moet sy Akte van Legitimasië aan die Algemene Regskommissie *via* die skriba van die ringskommissie terugbesorg.
  - 5.5.3 Die skriba van die Algemene Regskommissie gee in die amptelike blad van die NG Kerk kennis van elke persoon wat ophou om predikant of proponent te wees.

## **6. HERTOELATING TOT DIE BEDIENING**

Eertydse predikante of proponente mag slegs langs die volgende weg weer gelegitimeer word:

- 6.1 Hulle moet skriftelik aansoek doen by die ring onder wie se opsig hulle val.
- 6.2 Hierdie ring ondersoek die aangeleentheid met inagneming van KO Artikel 64.4.5. In die geval van eertydse predikante word die getuienis ingewin van al die kerkrade en

ringe binne wie se gebied hulle woonagtig was tydens en sedert hulle bevoegdheid verloor het. Getuienis kan ook van kerkrade en ringe ingewin word waar hulle woonagtig was voordat hulle uit die bediening getree het. In die geval van eertydse proponente word sover moontlik die getuienis ingewin van al die kerkrade en ringe binne wie se gebied hulle woonagtig was voordat en nadat hulle opgehou het om proponent te wees.

- 6.3 Die ring voorsien die sinode/sinodale kommissie binne wie se gebied die ring val, van al die tersaaklike stukke, 'n verslag en aanbevelings.
- 6.4 Die skriba van die sinode/sinodale kommissie stuur die dokumentasie en die verslag aan die aktuaris van die Algemene Sinode met die oog op advies.
- 6.5.1 Wanneer 'n sinode/sinodale kommissie die aansoek behandel, word die applikant ingevolge Reglement 14 : 5.2. ter vergadering ondersoek met inagneming van KO Artikel 66.4.4 - 66.4.5 van die Kerkorde. Indien die uitslag positief is, word die persoon na 'n eksamenkommissie vir *colloquium doctum* verwys. In die geval van KO Artikel 64.4.5 word die applikant se saak na die Algemene Sinode verwys vir beslissing alvorens vir *colloquium doctum* aangemeld mag word (vgl. 7 hieronder).
- 6.5.2 Wanneer 'n aansoek voor 'n sinode self gebring word, mag die applikant tydens die vergadering deur 'n kommissie ondersoek word, met inagneming van al die vereistes hierbo gestel. Indien die uitslag positief is, word 'n aanbeveling dienooreenkomstig voor die vergadering gelê. Indien die aanbeveling van die kommissie negatief is, mag die betrokke applikant die aansoek voor die volle vergadering verdedig of by 'n volgende sinode 'n nuwe aansoek indien.
- 6.5.3 Indien die sinodale kommissie die aansoek weier, word dit met opgawe van redes skriftelik aan die applikant bekendgemaak. Teen die beslissing van die sinodale kommissie/moderamen mag die applikant by die sinode appèl aanteken, of by 'n latere geleentheid 'n nuwe aansoek indien.
- 6.5.4 Indien 'n applikant om redes wat volgens die oordeel van die vergadering aanvaarbaar is, versoek om nie ter vergadering te verskyn nie, word die aansoek in sy/haar afwesigheid behandel.
- 6.6 Na bevredigende *colloquium doctum* by die eksamenkommissie, word die applikant by die Algemene Regskommissie vir legitimasie aanbeveel.
- 6.7 Eertydse predikante wat weer gelegitimeer word, word proponente. Bevestiging in 'n gemeente na die aanname van 'n beroep geskied weer met oplegging van hande.
- 6.8 Nadat 'n kandidaat goedkeuring verkry het om aan te meld vir *colloquium doctum*, moet dit binne 'n tydperk van 18 maande geskied.

## **7. HERTOELATING TOT DIE BEDIENING VAN PERSONE WAT IN ARTIKEL 66.4.5 GENOEM WORD**

Waar 'n eertydse predikant of proponent in terme van KO Artikel 66.4.5 aansoek om hertoelating tot die bediening doen, word die volgende weg gevolg:

- 7.1 Daar moet duidelike getuienis van berou en bekering wees, dat die kerklike tug tot sy reg gekom het en dat die hertoelating tot die bediening sonder skade vir die NG Kerk gedoen kan word. Die tydsverloop, rugbaarheid, algemene ontevredenheid en die getuienis van die kerk moet ook in aanmerking geneem word.
- 7.2 Die heil van die Kerk en die geskiktheid vir die bediening moet 'n deurslaggewende rol speel.

## **8. HERTOELATING TOT DIE BEDIENING VAN PERSONE WAT DIE NG KERK VERLAAT HET**

Iemand wat na 'n ander kerk of godsdienstige groep oorgegaan het en weer lidmaat van 'n NG gemeente geword het en wens om weer tot die bediening in die NG Kerk toegelaat te word, moet dieselfde prosedure as in 6 hierbo volg. Die Eksamenkommissie wat *colloquium doctum* afneem, moet vasstel of aanvullende opleiding vereis word, en indien wel, van watter aard dit moet wees. Indien daar aanvullende opleiding vereis word, word die persoon na die kuratorium van 'n teologiese fakulteit verwys. Na die voltooiing van die aanvullende opleiding, word hy/sy langs die normale weg gelegitimeer.

## **9. TOELATING TOT DIE BEDIENING VAN PREDIKANTE UIT ANDER KERKE**

'n Predikant van 'n ander kerk wat begeer om tot die bediening in die NG Kerk toegelaat te word, dien skriftelik 'n gemotiveerde aansoek in by die kuratorium van een van die teologiese fakulteite van die NG Kerk. Hierdie aansoek moet vergesel wees van die positiewe getuienis van die ring van die NG Kerk binne wie se grense hierdie persoon as predikant in die bediening is, of woon (indien nie meer in die aktiewe bediening nie) of van die kerk of gemeente van waaruit hy/sy kom. Die kuratorium bepaal watter aanvullende opleiding nodig is, indien enige. Lidmaatskap van 'n gemeente van die NG Kerk word vereis voor enige verdere handeling. In die geval van aanvullende opleiding word so 'n persoon normaalweg saam met ander studente begelei en na suksesvolle voltooiing van die vereiste studie gelegitimeer. Indien geen verdere aanvullende opleiding vereis word nie, word die persoon na *colloquium doctum* op die gebruikelike wyse gelegitimeer.

## **10. VERTOË IN VERBAND MET AMPSBEVOEGDHEID**

- 10.1 Persone wat ten opsigte van hulle posisie as predikant of proponent verontreg voel deur 'n beslissing van die ARK, kan hulle met voorlegging van nuwe gegewens beroep op 'n volgende vergadering van die Algemene Regskommissie.
- 10.2 Persone wat nog steeds verontreg voel na hulle saak ten opsigte van bevoegdheid deur die ARK of sy dagbestuur heroorweeg is, mag hulle na die Algemene Sinode/Algemene Sinodale Kommissie wend.
- 10.3 Persone wat geraak word deur die aanbevelings van tugvergaderings wat betref die opskorting/verlies van hulle ampsbevoegdheid, kan hulle by wyse van skriftelike vertoë tot die ARK rig voordat die ARK 'n besluit neem.

## **11. BEVOEGDHEIDSREGISTER - FOOIE EN PUBLIKASIE**

- 11.1 Benewens alle ander bepalinge, moet elke persoon wat oor bevoegdheid wil beskik, jaarliks voor 30 Junie aansoek om bedieningsbevoegdheid doen. Elke aanmelding moet vergesel wees van 'n vertroulike aanbeveling van die kerkraad waar die persoon lidmaat is, asook vergesel wees van 'n bedrag soos deur die ARK bepaal.
- 11.2 Al die besonderhede van die bevoegdheidsregister word jaarliks in die Kerkjaarboek gepubliseer. Hierin word vir die volgende kategorieë voorsiening gemaak: diegene in die bediening, diegene met predikantsbevoegdheid (maar wat nie in 'n gemeente of in diens van die kerkverband is nie), diegene met proponentbevoegdheid, diegene met

emeritus bevoegdheid, diegene wat bevoegdheid verloor het op enige wyse (uitgetree het).

## **4. REGLEMENT VIR DIE ALGEMENE KOMMISSIE VIR BYBELVERTALING, -VERKLARING EN -VERSPREIDING (AKBV)**

### **1. NAAM**

Algemene Kommissie vir Bybelvertaling, -verklaring en -verspreiding (AKBV).

### **2. SAMESTELLING**

2.1 Die NG Kerk Dosenterade van Stellenbosch, Pretoria en Bloemfontein benoem elk een Ou-Testamentikus en een Nuwe-Testamentikus uit hulle dosentekorps (huidige en vorige) wat deur die NGK beroep is. Hierbenewens kan ook ander vakkundiges betrek word. Die totale aantal teoloë en taalkundiges mag nie tien oorskry nie.

2.2 Twee predikante van die NG Kerk in diens van die Bybelgenootskap van Suid-Afrika.

### **3. OPDRAG**

Die Kommissie

3.1 adviseer die Algemene Sinode in verband met die aanwysing van Bybelvertaling(s) wat amptelik gebruik moet word (KO Art. 43.1.2);

3.2 neem inisiatief en adviseer die Algemene Sinode in verband met die publikasie van Bybelvertalings na aanleiding van die behoefte van lidmate;

3.3 dien as amptelike skakel tussen die NG Kerk en die Bybelgenootskap van Suid-Afrika ten opsigte van die werksaamhede van die Bybelgenootskap van Suid-Afrika, onder andere Bybelvertalingsprogramme, navorsing, publikasies en Bybelverspreiding;

3.4 doen gereeld verslag aan die Algemene Sinode oor tersaaklike aangeleenthede asook oor die werk van die Bybelgenootskap van Suid-Afrika.

### **4. KONSTITUERING EN VERGADERINGS**

4.1 Die Kommissie konstitueer verkieslik direk ná die vergadering van die Algemene Sinode.

4.2 Indien dit nie moontlik is nie, versoek die aangewese sameroeper die aktuaris om die konstituering per pos of op 'n andersins aanvaarbare wyse te hanteer.

4.3 Die Kommissie vergader minstens twee keer tussen vergaderings van die Algemene Sinode.

4.4 Tussentydse vakatures word deur die Algemene Sinodale Kommissie gevul op voordrag van die Kommissie.

### **5. BEFONDSING**

Die Kommissie lê 'n begroting vir sy werksaamhede aan die Sinode voor ná oorlegpleging met die Algemene Kommissie vir Fondse.

### **6. PREDIKANTE VAN DIE NG KERK IN DIENS VAN DIE BYBELGENOOTSKAP VAN SUID-AFRIKA**

6.1 Die Algemene Sinode stel per ooreenkoms 'n aantal predikante beskikbaar vir diens in die Bybelgenootskap van Suid-Afrika.

6.2 Predikante in diens van die Bybelgenootskap van Suid-Afrika word benoem deur die Algemene Kommissie vir Bybelvertaling, -verklaring en -verspreiding.



- 6.3 Predikante in diens van die Bybelgenootskap van Suid-Afrika se diensverhouding word per diensooreenkoms tussen die betrokkenes en die Bybelgenootskap gereël.
- 6.4 Die befondsing van predikante in diens van die Bybelgenootskap van Suid-Afrika geskied volledig deur die Bybelgenootskap van Suid-Afrika.

## **5. REGLEMENT VIR DIE ALGEMENE KOMMISSIE VIR DIE DIENS VAN BARMHARTIGHEID (AKDB)**

### **1. NAAM**

Die Algemene Kommissie vir die Diens van Barmhartigheid van die Nederduitse Gereformeerde Kerk (AKDB).

### **2. SAMESTELLING**

Die kommissie word soos volg deur die Algemene Sinode saamgestel:

- 2.1 een lid (met 'n sekundus) uit elkeen van die sinodes, verkieslik die voorsitter, ondervoorsitter of skriba van die betrokke sinode se ooreenstemmende kommissie;
- 2.2 predikante in diens van sinodes met opdrag diens van barmhartigheid. Waar so 'n pos nie bestaan nie, het die betrokke sinode die reg om 'n tweede verteenwoordiger aan te wys;
- 2.3 die predikant in diens van die Algemene Sinode met opdrag diens van barmhartigheid (indien so 'n pos bestaan);
- 2.4 een lid van die Algemene Kommissie vir Vrouelidmate;
- 2.5 die hulp van kundiges kan te eniger tyd ingeroep word, sonder dat hulle lede van die Kommissie word.

### **3. OPDRAG EN BEVOEGDHEDE**

Die Kommissie

- 3.1 voer opdragte van die Algemene Sinode uit;
- 3.2 adviseer die Algemene Sinode in verband met die beleid wat gevolg moet word ten opsigte van diens van barmhartigheid;
- 3.3 dra sorg vir navorsing, beplanning, gee inligting en voorligting en hanteer skakeling oor diens van barmhartigheid;
- 3.4 benoem subkommissies en ad hoc-kommissies na behoefte;
- 3.5 beheer en verantwoord die fondse wat aan hom toevertrou word.

### **4. KONSTITUERING EN VERGADERINGS**

- 4.1 Konstituering: Die Kommissie konstitueer tydens die sitting van die Algemene Sinode met die lede wat teenwoordig is by die Algemene Sinode, op voorwaarde dat meer as die helfte van die lede wel die konstitueringsvergadering moet kan bywoon. Die predikant in diens van die Algemene Sinode met opdrag diens van barmhartigheid (alternatiewelik die uittredende voorsitter) dien as sameroeper.
- 4.2 Dagbestuur: Die kommissie wys tydens die konstitueringsvergadering 'n dagbestuur aan bestaande uit die voorsitter, ondervoorsitter (met sekundi) en die predikant in diens van die Algemene Sinode met opdrag diens van barmhartigheid (skriba). Indien die pos van predikant in diens van die Algemene Sinode met opdrag diens van barmhartigheid nie gevul is nie, wys die AKDB of sy dagbestuur 'n lid van die AKDB aan om as lid en skriba van die uitvoerende komitee te dien.
- 4.3 Die kommissie vergader minstens twee maal tussen twee vergaderings van die Algemene Sinode.

## **5. VAKATURES**

Vakatures word gevul volgens die bestaande ordereelings van die Algemene Sinode (Reglement van Orde).

## **6. REGLEMENT VIR DIE VERMEERDERING, KOMBINEERING, EENWORDING EN SAMESMELTING VAN GEMEENTES**

### **1. VERMEERDERING/AFSTIGTING VAN GEMEENTES**

#### **1.1 Algemene reëlings**

- 1.1.1 Die uitbreiding van die kerk en die gevolglike vermeerdering van gemeentes is die roeping en plig van 'n groeiende en lewenskragtige kerk.
- 1.1.2 Indien ongesensureerde belydende lidmate oortuig is van die noodsaaklikheid van die stigting van 'n nuwe gemeente, moet hulle 'n skriftelike versoek tot die kerkraad rig.
- 1.1.3 Indien die kerkraad oordeel dat daar genoeg rede vir die stigting van 'n nuwe gemeente is, gee hy verlof dat die lidmate wat binne die voorgestelde grense van die nuwe gemeente woonagtig is, die versoekskrif en waarborglys mag onderteken.
- 1.1.3.1 Op die waarborglys moet die lidmate die versekering gee van 'n doelmatige vrye woning, 'n lewensonderhoud en vervoertoelaag vir die bedienaar van die Woord ooreenkomstig die riglyne van die Algemene Sinode in hierdie verband.
- 1.1.3.2 Slegs indien 'n meerderheid van die betrokke ongesensureerde belydende lidmate die versoekskrif ten gunste van afstigting onderteken het en die waarborglys in orde is, stuur die kerkraad die versoekskrif en die waarborglys kragtens Art. 31.4 saam met *aanbevelings* oor die volgende sake aan die skriba van die ringskommissie :
  - 1.1.3.2.1 die voorgestelde grense en naam van die nuwe gemeente;
  - 1.1.3.2.2 die voorwaardes van afstigting;
  - 1.1.3.2.3 aanverwante sake wat die aandag van die ring moet geniet.
- 1.1.4 Wanneer by die ring aansoek gedoen word om die stigting van 'n gemeente, beoordeel die ring die ingekome stukke en indien die ring oordeel dat die nuwe gemeente finansiëel in staat sal wees om te bestaan en dat 'n genoegsame persentasie van lidmate van die voorgestelde nuwe gemeente die afstigting verlang, word verlof tot afstigting gegee.
- 1.1.5 Die stigting van 'n nuwe gemeente geskied deur die ringskommissie op las van die ring op 'n vergadering waarvan vier (4) weke vooraf in *Die Kerkbode* kennis gegee is, en waarheen die belanghebbendes uit die betrokke gemeente(s) opgeroep is. Die betrokke lidmate het deur hul handtekening reeds die afstigting van die gemeente goedgekeur en stem op hierdie vergadering nie weer oor die saak nie.
- 1.1.6 Op hierdie vergadering stel die ringskommissie die grense van die gemeente so duidelik moontlik vas en gee 'n noukeurige beskrywing van die grense van reeds bestaande gemeentes wat met die grense van die nuwe gemeente saamval.
- 1.1.7 Op hierdie vergadering wat onder leiding van die ringskommissie staan, word die kerkraadslede van die nuwe gemeente met opsteek van hande verkies en wel deur die belydende lidmate wat binne die grense van die nuwe gemeente ressorteer.
- 1.1.8 Die bevestiging van hierdie kerkraadslede geskied sonder afkondiging van hul name deur die konsulent of op sy versoek deur 'n ander bedienaar van die Woord binne die kerkverband. Indien daar teen 'n persoon wat verkies is, beswaar ingebring word, word sy/haar bevestiging uitgestel totdat die saak deur die kerkraad ondersoek is.

- 1.1.9 Die kerkraad benoem een van sy lede as die bewaarder van die boeke en dokumente van die gemeente totdat 'n skriba en/of kassier benoem is. 'n Inventaris van die boeke en dokumente moet opgestel word en 'n duplikaat aan die konsulent oorhandig word.
- 1.1.10 Die kerkraad van 'n nuutgestigte gemeente moet binne drie (3) maande na die stigting 'n bedienaar van die Woord beroep.
- 1.1.11 Die koste van die ring(e) of ringskommissie(s) in verband met die stigting van nuwe gemeente(s) word deur die sinodale kas gedra.
- 1.1.12 Indien die kerkraad op versoek van sy lidmate weier om voorbereidende stappe te doen of te laat doen met die oog op die stigting van 'n nuwe gemeente, het sodanige lidmate die reg om hulle na die ring met hul versoek te wend. 'n Afskrif van die versoekskrif met volle besonderhede moet minstens drie (3) weke voor die vergadering van die ring by die betrokke kerkraad vir kennisname ingedien word. (vgl. 1.2.2 en 1.2.3 hierbo).

## **1.2 Wanneer meer as een gemeente en/of ring by die afstigting betrokke is**

- 1.2.1 Indien dit blyk dat die beoogde nuwe gemeente uit gedeeltes van meer as een gemeente moet bestaan, terwyl die saak slegs deur lidmate van een gemeente aanhangig gemaak is, het die betrokke kerkraad die reg om die ander kerkraad(e) regstreeks om hul medewerking te nader.
- 1.2.2 Indien die aangrensende kerkraad(e) wat genader is, weier om voorbereidende stappe te doen of te laat doen met die oog op die stigting van 'n nuwe gemeente, het die betrokke kerkraad die reg om sy versoek aan die ring voor te lê.
- 1.2.3 Die ring(e) het die reg om te besluit dat maatreëls in die betrokke wyke van die gemeente(s) in die ressort van daardie ring(e) met die oog op moontlike afstigting getref word.
- 1.2.4 Waar die nuwe gemeente met lidmate uit gemeentes van meer as een ring gestig word, moet die betrokke ringe onderling besluit watter ring die stigting moet waarneem.
- 1.2.5 Wanneer die ring 'n opdrag tot stigting gee, moet die kerkraad dadelik die versoekskrif en waarborglys laat onderteken in die wyke wat deur die ring aangewys is.
- 1.2.6 Die kerkraad van elke gemeente wat deel van die nuwe gemeente uitmaak, moet die versoekskrif en die waarborglys saam met sy aanbevelings daarvoor aan die ring voorlê.

## **1.3 Die Ring kan self inisiatief neem**

- 1.3.1 Waar 'n ring dit nodig ag, kan hy een of meer kerkrade opdrag gee om die stigting van 'n nuwe gemeente te ondersoek. Die ring kan ook aan sy ringskommissie opdrag gee om 'n kerkraad(e) te ontmoet en tot afstigting van 'n nuwe gemeente(s) aan te spoor (Kyk 1.14 en 1.15 hierbo).

## **1.4 Kennisgewing van afstigting**

- 1.4.1 Die skriba van die ringskommissie oorhandig aan die kerkraad van die nuwe gemeente 'n uittreksel uit die notule van die ringskommissie, bevattende die naam van die gemeente, beskrywing van die grense, name van kerkradslede, aanbevelings, genoem in punt 1.1.3.2, die naam van die konsulent en ander sake waarby die nuwe gemeente belang mag hê.
- 1.4.2 Die skriba van die ringskommissie gee aan die skriba van die Sinodale Kommissie kennis van die stigting van die nuwe gemeente met vermelding van die grenslyne asook die name van die eerste lede van die kerkraad met die oog op publikasie in *Die Kerkbode*. Hierdie kennisgewing moet op papier soos deur die argief voorgeskryf en in tweevoud geskied.

- 1.4.3 Die skriba van die Sinodale Kommissie gee aan die Registrateur van Aktes kennis van die stigting van die nuwe gemeente.
- 1.4.4 Die naam van die nuwe gemeente word in die kennisgewing soos volg aangegee: Die Nederduitse Gereformeerde Gemeente .....
- 1.4.5 Indien dit by die vermeerdering van gemeentes sou blyk dat verteenwoordigers nie aangewys is vir die ondertekening van dokumente en stukke namens die nuwe gemeente vir doeleindes van uitvoering van stigting nie, moet sulke dokumente of stukke geteken word deur die voorsitter en skriba van die ringskommissie van die ring in wie se gebied die te stigte gemeente geleë is.

## **2. KOMBINERING VAN GEMEENTES**

Kombinasie beteken dat twee of meer gemeentes, wat selfstandig voortbestaan, kontraktueel ooreenkomste met mekaar aangaan ter wille van die effektiewe Evangeliebediening.

### **2.1 Prosedure vir kombinerings**

- 2.1.1 Die kerkraad stel ondersoek in na die moontlikheid van kombinasie as hy self oordeel dat dit nodig is of ook op versoek van 'n groep lidmate.
- 2.1.2 In alle gevalle van kombinasie word 'n geskrewe ooreenkoms opgestel en aan die betrokke kerkrade vir goedkeuring voorgelê. Indien van toepassing moet Artikel 13 van *Die Kerkorde* in ag geneem word. Ten minste 66% van die dienende kerkradslede van elke betrokke kerkraad moet die ooreenkoms goedkeur.
- 2.1.3 Nadat die kerkrade die kombinasie-ooreenkoms goedgekeur het, word die ooreenkoms op twee agtereenvolgende Sondae tydens die erediens aan elkeen van die betrokke gemeentes vir approbasie bekend gemaak. Besware moet voor die tweede afkondiging skriftelik ingedien word. Ten minste 66% van die ongesensureerde belydende lidmate se instemming tot die ooreenkoms moet verkry word.
- 2.1.4 Nadat die gemeente approbasie verleen het, word die kombinasie-ooreenkoms aan die betrokke Ring/Ringskommissie vir goedkeuring en bekragtiging voorgelê. Nadat die Ring die ooreenkoms bekragtig het, word dié ooreenkoms van krag of op 'n datum wat in die ooreenkoms bepaal word.
- 2.1.5 Die koste van die Ring(e) of Ringskommissie(s) met betrekking tot die kombinasie van gemeentes, word deur die Sinodale Fonds gedra.
- 2.1.6 Indien die kerkraad weier om op versoek van 'n groep lidmate die moontlikheid van kombinasie te ondersoek, het die lidmate die reg om hulle tot die Ring met hulle versoek te wend. 'n Afskrif van die versoekskrif moet minstens drie (3) weke voor die vergadering van die Ring by die betrokke kerkraad vir kennisname deur die skriba van die ringskommissie ingedien word.
- 2.1.7 Wanneer meer as een Ring by kombinasie betrokke is, moet vooraf, na ooreenkoms deur die ringe, by die sinode aansoek gedoen word vir hergroepering van die betrokke gemeentes wat wil kombineer.
- 2.1.8 Die Ring kan self die inisiatief neem en waar hy dit nodig ag, aan twee of meer kerkrade opdrag gee om kombinasie te ondersoek. Die Ring kan ook aan sy ringskommissie opdrag gee om die betrokke kerkrade te ontmoet en tot kombinasie aan te spoor.
- 2.1.9 Die kombinasie-ooreenkoms kan in beraad met die ringe en approbasie van die gemeentes na wedersydse kennisgewing en ooreenkoms gewysig of beëindig word as al die betrokke kerkrade in hulle aparte vergaderings hulle goedkeuring daaraan heg.

- 2.1.10 Wanneer die gemeentes wat wil kombineer nie vakant is nie, kan daar nie tot kombinasie oorgegaan word voordat die betrokke bedienaar van die Woord en die Ring/Ringskommissie tevrede is dat daar billike voorsiening vir die betrokke leraar gemaak is nie.
- 2.1.11 Die beroeping en demittering van 'n bedienaar van die Woord vir kombinasie-gemeentes geskied op 'n gesamentlike vergadering van die betrokke kerkrade onder voorsitterskap van die konsulent van die gemeente waar die vergadering plaasvind. Vir die gemeentes in die kombinasie word 'n konsulent benoem. Die naam van die beroepene word op twee agtereenvolgende Sondae tydens die erediens vir approbasie aan elke gemeente van die kombinasie bekend gemaak.
- 2.1.12 'n Bedienaar van die Woord moet in een van die kombinasie-gemeentes bevestig word.
- 2.1.13 'n Bedienaar van die Woord in kombinasie-gemeentes, word deur die gemeente wat hom/haar beroep en bevestig het afgevaardig na meerdere vergaderings. Hy/Sy het egter as afgevaardigde net een stem. Elke kombinasie-gemeente verkies en vaardig volgens voorskrif van *Die Kerkorde* ook 'n ouderling/diaken af.
- 2.1.14 Die kombinasie-gemeentes is verplig om gesamentlik 'n aandeel in die Sinodale Pensioenfonds vir die bedienaar van die Woord te hou. Alle ander koste met betrekking tot die bedienaar van die Woord moet in die ooreenkoms van kombinasie gereël word.
- 2.1.15 Die ooreenkoms met die leraar kan, na wedersydse kennisgewing, gewysig of beëindig word indien al die betrokke kerkrade, in hul aparte vergaderinge, hul goedkeuring daaraan heg.
- 2.1.16 Indien dit by die kombinerings van gemeentes sou blyk dat verteenwoordigers nie aangewys is vir die ondertekening van dokumente en stukke namens die gemeentes vir doeleindes van uitvoering van ooreenkomste nie, moet sulke dokumente of stukke geteken word deur die voorsitter en skriba van die Ringskommissie van die Ring in wie se gebied die kombinerende gemeentes geleë is.

### **3. EENWORDING VAN GEMEENTES**

Eenwording beteken dat 'n gemeente wat nie langer selfstandig wil of kan voortbestaan nie, ontbind en dat die betrokke lidmate by 'n ander bestaande gemeente(s) ingelyf word.

#### **3.1 Prosedure vir eenwording**

- 3.1.1 Die kerkraad van die gemeente wat wil ontbind, moet 'n besluit tot ontbinding neem en die kerkraad(e) van die gemeente(s) waarby die betrokke lidmate ingelyf word, moet toestemming tot inlywing gee. Ten minste 66% van die dienende kerkraadslede van elke betrokke kerkraad moet ten gunste van eenwording besluit.
- 3.1.2 Die betrokke kerkrade moet oor die voorwaardes vir ontbinding en inlywing ooreenkom. Indien van toepassing moet Artikel 12b 2.3 van *Die Kerkorde* in ag geneem word.
- 3.1.3 Die ooreenkoms waartoe die kerkrade gekom het, moet vir approbasie op twee agtereenvolgende Sondae by al die openbare erediens van die betrokke gemeentes bekend gemaak word. Ten minste 66% van die lidmate se instemming tot die ooreenkoms moet verkry word.
- 3.1.4 Nadat die approbasie van die ongesensureerde belydende lidmate op dié wyse verkry is, word die ooreenkoms aan die betrokke Ring(e) vir goedkeuring voorgelê. Nadat hierdie goedkeuring verkry is of op 'n datum wat in die ooreenkoms bepaal word, word die ooreenkoms van krag.

- 3.1.5 Aangesien hiermee 'n verandering van gemeentegrense geïmpliseer word, moet die ooreenkoms 'n duidelike omskrywing van grenslyne bevat.
- 3.1.6 Die betrokke ringskriba gee aan die Skriba van die Sinode en aan die Saakgelastigde van die Sinode kennis van die ontbinding van die gemeente, asook van die nuwe grenslyne van die inlywende gemeente(s). Die Skriba van die Sinode sorg vir die publikasie van bostaande feite in *Die Kerkbode*.
- 3.1.7 'n Afskrif van die ooreenkoms tussen die gemeentes word aan die Saakgelastigde van die Sinode op papier soos deur die argief voorgeskryf en in tweevoud gestuur.
- 3.1.8 Die kerkraad van die gemeente wat ontbind gee aan die Registrateur van Aktes kennis van die ontbinding en van die oordrag van sy eiendomme.
- 3.1.9 Die dienende kerkslede van die gemeente wat ontbind, dien ook, indien dit so ooreengekom word, in die inlywende gemeente.
- 3.1.10 Die onroerende eiendomme van die ontbonde gemeente word, tensy anders ooreengekom, op die naam van die inlywende gemeente geregistreer en alle roerende goed van die ontbonde gemeente, met die regte en verpligtinge daaraan verbonde, gaan op die inlywende gemeente oor.
- 3.1.11 Die eenwording van gemeentes kan alleen plaasvind wanneer die gemeente wat ontbind, vakant is of indien nie, as daar vir die bedienaar van die Woord, na die oordeel van die ring, billike voorsiening gemaak is.
- 3.1.12 Indien dit by die eenwording van gemeentes sou blyk dat verteenwoordigers nie aangewys is vir die ondertekening van dokumente en stukke namens 'n gemeente wat ontbind het vir doeleindes van uitvoering van ooreenkomste nie, moet sulke dokumente of stukke geteken word deur die voorsitter en skriba van die ringskommissie van die ring in wie se gebied die ontbinde gemeente geleë was.

## **4. SAMESMELTING VAN GEMEENTES**

Samesmelting beteken dat twee of meer gemeentes, wat nie langer selfstandig wil of kan voortbestaan nie, afsonderlik ontbind om saam een totaal nuwe gemeente te stig binne dieselfde geografiese gebied as waarbinne die onderskeie samestellende gemeentes aanvanklik voor ontbinding bestaan het.

### **4.1 Prosedure**

- 4.1.1 Die kerkrade van die onderskeie samesmeltende gemeentes neem afsonderlik 'n besluit tot samesmelting.
- 4.1.2 Aan alle ongesensureerde belydende lidmate van die onderskeie samesmeltende gemeentes word aan die hand van 'n vraelys-stembrief geleentheid gebied om skriftelik aan te dui of hulle ten gunste van die samesmelting is al dan nie.
- 4.1.2.1 Die genoemde vraelys-stembrief word persoonlik en sonder enige stemwerwing deur die onderskeie kerkrade van die samesmeltende gemeentes aan elke ongesensureerde belydende lidmaat binne die bepaalde gemeente beskikbaar gestel.
- 4.1.2.2 Dit is elke lidmaat se eie verantwoordelikheid om toe te sien dat sy/haar voltooide vraelys-stembrief die kerkkantoor van sy/haar gemeente bereik voor/op die sperdatum wat deur die kerkrade bepaal is.
- 4.1.2.3 Goedkeuring moet van 'n meerderheid van die lidmate wat vraelys-stembriewe ingehandig het, verkry word alvorens met die proses van samesmelting voortgegaan kan word.
- 4.1.3 Nadat die goedkeuring van die lidmate volgens prosedure 4.1.2. hierbo verkry is, kom die kerkrade afsonderlik én gesamentlik ooreen tot 'n *Samesmeltingsakte* bevattende



onder andere 'n duidelike grensbeskrywing van die nuwe gemeente, die posisie van die leraar/s en kerksaatslede in die nuwe saamgestelde gemeente en reëlins in verband met die hantering van die onderskeie gemeentes se bates (roerend en onroerend), en elke kerkraad benoem 2 (twee) persone om namens hom alle nodige dokumentasie te onderteken.

- 4.1.4 Die ooreenkoms (*Samesmeltingsakte*) word vir approbasie op 2 (twee) agtereenvolgende Sondae by al die openbare eredienste van die betrokke gemeentes bekend gemaak.
- 4.1.4.1 Lidmate wat wil beswaar maak, moet dit skriftelik met gemotiveerde opgaaf van redes doen voor verstryking van die week eindigend na die tweede afkondiging.
- 4.1.4.2 Besware word aan die Ringskommissie voorgelê vir oorweging van die geldigheid daarvan.
- 4.1.4.3 Approbasie moet van ten minste 66% van die ongesensureerde belydende lidmate van elke samesmeltende gemeente verkry word.
- 4.1.5 Nadat approbasie verkry is, word die ooreenkoms aan die Ring voorgelê vir goedkeuring.
- 4.1.5.1 Die Ringskriba gee kennis aan die Skriba en Saakgelastigde van die betrokke Sinode.
- 4.1.5.2 Die Kerkraad van die nuwe gemeente gee kennis aan die Registrateur van Aktes van die oordrag van eiendomme.

## **5. KOMBINASIE VAN WERKSAAMHEDE VAN GEMEENTES, RINGE EN SINODES/KOMMISSIES VAN SINODES UIT VERSKILLENDE KERKVERBANDE**

Kombinasie beteken hier dat twee of meer kerkvergaderinge van verskillende kerkverbande, of kommissies van kerkvergaderinge, as deel van die soeke na kerklike eenheid in die NG Kerkfamilie, ten bate van die koninkryk van God en as gelyke deelgenote van mekaar, kontraktuele ooreenkomste aangaan vir die uitvoering van sekere gemeenskaplike werksaamhede.

### **5.1 Praktiese en kerkregtelike riglyne**

- 5.1.1 Die aspekte of saak ten opsigte waarvan die partye 'n kombinasie beoog, moet duidelik omskryf word.
- 5.1.2 'n Skriftelike ooreenkoms word opgestel wat alle regte, pligte en verantwoordelikhede (insluitende finansies) van die partye duidelik omskryf.
- 5.1.3 Die bestaande Reglement 9 wat handel oor Kerklike Eiendomme, Goedere en Fondse, moet by die opstel van die ooreenkoms in berekening gebring word.
- 5.1.4 Waar die standplaas of ander pos van 'n leraar kragtens die beoogde kontrak in gedrang kan kom, moet Artikel 12 van die Kerkorde in ag geneem word.
- 5.1.5 Indien dit die bedoeling is dat die gekombineerde liggaam die reg sal hê om sake te hanteer soos die beroep en indiensstelling van 'n leraar, moet aspekte soos konstituering, kworumvereistes, wyse van besluitneming, stemreg, befondsing, verantwoordelikheid vir die standplaas of aanstelling, pensioen, medies, administrasie ens. noukeurig uitgeklaar word.
- 5.1.6 Die kontrak moet dit duidelik stel dat die daarstelling van die gemeenskaplike doelwitte kragtens die kontraktuele ooreenkoms, nie die regte en verantwoordelikhede van die kontrakterende kerkvergaderinge/kommissies kan ophef of tot niet verklaar nie.

- 5.1.7 Die ooreenkoms kan voor die verstryking van die vasgestelde termyn gewysig of beëindig word indien die betrokke partye, na wedersydse kennisgewing, in hulle afsonderlike vergaderinge hulle goedkeuring daaraan heg.
- 5.1.8 Die kontrakterende party val steeds onder die regering opsig en tug van sy/haar verantwoordelike kerkvergadering.

## **5.2 Werkswyse**

- 5.2.1 Die betrokke kerkvergaderinge/kommissies moet die skriftelike ooreenkoms afsonderlik in hulle onderskeie vergaderinge goedkeur.
- 5.2.2 Nadat die instansies onderling tot 'n ooreenkoms gekom het, moet die liggaam wat vir die opsig/toesig verantwoordelik is die ooreenkoms finaal bekragtig. In die geval van 'n kerkraad is dit die ring. By 'n Ring of by 'n kommissie van 'n sinode, is dit die Sinode/Sinodale Kommissie, en by 'n sinode is dit die Algemene Sinode/Algemene Sinodale Kommissie.

## **7. REGLEMENT VIR DIE ALGEMENE KOMMISSIE VIR FONDSE (AKF)**

### **1. NAAM**

Algemene Kommissie vir Fondse (AFK).

### **2. SAMESTELLING**

- 2.1 Een lid (met sekundus) uit elkeen van die sinodes, verkieslik die voorsitter, ondervoorsitter of skriba van die betrokke sinode se ooreenstemmende kommissie;
- 2.2 Die saakgelastigdes van die sinodes, met sekundi;
- 2.3 Deskundiges beperk tot 'n maksimum van drie gekoöpteerde persone.

### **3. OPDRAG**

Die Kommissie

- 3.1 adviseer die Algemene Sinode in verband met die beleid wat gevolg moet word ten opsigte van finansies;
- 3.2 hersien jaarliks die begroting van die Algemene Sinode aan die hand van die bepaalde omstandighede wat heers;
- 3.3 gee aandag aan die realisering van die begrotings van al die kommissies van die Algemene Sinode, finansies en administrasie in die algemeen, personeelaangeleenthede;
- 3.4 kontroleer die finansiële state van al die kommissies en werksaamhede van die Algemene Sinode;
- 3.5 gee jaarliks advies in verband met die vergoedingspakket van leraars;
- 3.6 beoordeel die finansiële implikasies by die vulling van vakatures in poste vir predikante in algemene sinodale diens.

### **4. KONSTITUERING EN VERGADERINGS**

- 4.1 die Kommissie konstitueer tydens die vergadering van die Algemene Sinode en vergader hoogstens drie maal tussen twee vergaderings van die Algemene Sinode;
- 4.2 by die konstituering word 'n dagbestuur saamgestel, bestaande uit die voorsitter, ondervoorsitter en skriba;
- 4.3 die dagbestuur tree op as Kerkkantoor kommissie van die Algemene Sinode met regshandelingsbevoegdheid kragtens die Reglement vir die reëling van eiendomme, goedere en fondse;
- 4.4 die Kommissie benoem subkommissies volgens behoefte.

## **8. REGLEMENT VIR DIE ALGEMENE KOMMISSIE VIR GEMEENTEBEDIENING (AKG)**

### **1. NAAM**

Algemene Kommissie vir Gemeentebediening (AKG)

### **2. SAMESTELLING**

Die Kommissie word soos volg saamgestel:

- 2.1 een lid (met sekundus) uit elkeen van die sinodes, verkieslik die voorsitter, ondervoorsitter of skriba van die sinode se ooreenstemmende kommissie;
- 2.2 predikante met opdrag gemeentebediening in diens van die sinode (indien so 'n pos bestaan);
- 2.3 die predikant met opdrag gemeentebediening in diens van die Algemene Sinode (indien so 'n pos bestaan);
- 2.4 een verteenwoordiger van elk van die fakulteite van teologie;
- 2.5 een verteenwoordiger van die kapelaansdienste wat 'n lidmaat van die NG Kerk is;
- 2.6 een verteenwoordiger van die Algemene Kommissie vir Vrouelidmate;
- 2.7 deskundiges beperk tot 'n maksimum van drie gekoopteerde persone;
- 2.8 een verteenwoordiger uit die "Conference for multi-cultural and multi-lingual Ministries in the DRC".

### **3. OPDRAG**

Die Kommissie

- 3.1 adviseer die Algemene Sinode in verband met die beleid wat gevolg moet word ten opsigte van gemeentebediening;
- 3.2 dra sorg vir navorsing, beplanning, inligting en voorligting oor gemeentebediening;
- 3.3 besin oor die verskillende ampte en hulle funksionering in die kerk;
- 3.4 besin oor die evangelisasie-opdrag van die kerk;
- 3.5 soek skakeling met ander kommissies van die Algemene Sinode met die oog op die integrering en koördinerings van werksaamhede wat gemeentebediening raak.

### **4. KONSTITUERING EN VERGADERINGS**

- 4.1 Die Kommissie konstitueer en vergader hoogstens drie maal tussen twee vergaderings van die Algemene Sinode;
- 4.2 By die konstitueringsvergadering word 'n dagbestuur saamgestel, bestaande uit die voorsitter, ondervoorsitter en skriba;

Die Kommissie benoem subkommissies volgens behoefte.

## **9. REGLEMENT VIR DIE REËLING VAN EIENDOMME, GOEDERE EN FONDSE**

### **1. Algemene sinodale eiendomme, goedere en fondse**

- 1.1 Die Nederduitse Gereformeerde Kerk in algemene sinodale verband is 'n regs persoon en die Algemene Sinode of sy gemagtigde(s) is sy orgaan.
- 1.2 Die Nederduitse Gereformeerde Kerk is dus eienaar van alle roerende en onroerende bates wat deur die Algemene Sinode beheer en verkry word en vaste eiendom word in die naam van *Die Nederduitse Gereformeerde Kerk* geregistreer.
- 1.3 Eiendomme, goedere en fondse word geadminestreer deur die Algemene Kommissie vir Fondse (AKF) ingevolge besluite van die Algemene Sinode.
  - 1.3.1 Ten opsigte van die werksaamhede genoem in 1.3.4 (hieronder) administreer die betrokke kommissie die eiendomme, goedere en fondse, met dien verstande dat die kommissie die volgende stukke voorlê:
    - 1.3.1.1 Aan die ASK: Die reglemente en/of konstitusies van al die betrokke werksaamhede en/of regsentiteite wat aan die kommissie verslag doen, asook enige wysigings daaraan.
    - 1.3.1.2 Aan die AKF (jaarliks):
      - Goedgekeurde finansiële state van die vorige jaar
      - Die begroting van die huidige jaar
      - Bestuursinligting soos deur die AKF versoek.
    - 1.3.2 Alhoewel die Algemene Sinode nie regs aanspreeklikheid aanvaar vir die werksaamhede en verpligtinge van afsonderlike regsentiteite (bv maatskappye) wat direk of indirek deur 'n kommissie geadminestreer of beheer word nie, is dit vir die oorhoofse beplanning van die kerk se werksaamhede noodsaaklik dat die gegewens genoem in 1.3.1.1 en 1.3.1.2 ten opsigte van die aparte regsentiteite vir die Algemene Sinode beskikbaar moet wees.
    - 1.3.3 Die ASK beslis in gevalle waar die AKF en die betrokke kommissie en/of die betrokke kommissies en/of regsentiteite onderling nie eenstemmigheid kan bereik nie.
    - 1.3.4 Die bepalinge in 1.3.1 tot 1.3.3 hierbo geld ten opsigte van die volgende:
      - 1.3.4.1 die fondse en werksaamhede van die Algemene Kommissie vir die Diens van Barmhartigheid;
      - 1.3.4.2 fondse en werksaamhede van die Algemene Jeugkommissie;
      - 1.3.4.3 fondse en werksaamhede van die Algemene Sinodale Kommissie vir Getuienis;
      - 1.3.4.4 fondse en werksaamhede verteenwoordig in die Algemene Kommissie vir Kerklike Media,
      - 1.3.4.5 asook enige afsonderlike regsentiteit wat direk of indirek deur enige van die kommissies gelys in 1.3.4, bestuur of beheer word, en vir doeleindes van hierdie bepaling word geag dat 'n regsentiteit deur 'n kommissie beheer en bestuur word indien die kommissie direk of indirek die bevoegdheid het om minstens die helfte van die bestuurslede/direkteure of trustees van die betrokke regsentiteit aan te stel.

Onderhewig daaraan dat die inkomste en eiendom van die Algemene Sinode, met inbegrip van eiendom of inkomste wat deur enige kommissie bestuur word, nie aan enige persoon uitgekeer mag word nie maar uitsluitlik aangewend mag word vir die beoefening van die aktiwiteite van die Algemene Sinode en die bevordering van die oogmerke waarvoor dit ingestel is en om tussentydse belegging te maak (met dien verstande dat niks wat hierin bepaal is, die betaling ter goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die sektor en met betrekking tot die diens gelewer nie) aan enige werknemer of beampte van die Algemene Sinode vir dienste wat sodanige persoon werklik aan die Algemene Sinode gelewer het nie), is die Algemene Kommissie vir Fondse bevoeg om in opdrag van die Algemene Sinode enige regshandeling wat verband hou met die beskikking, verkryging, ontvangs van testamentêre bemakings, vervreemding, beswaring of versekering van die betrokke bates te verrig met insluiting van die volgende:

- 1.4.1 Om oordrag van alle eiendomme, goedere of fondse van die ontbinde Raad van Kerke te ontvang.
- 1.4.2 Om eiendomme, roerend en/of onroerend, te verkry deur skenking, erflating, aankoop, huur of op enige ander wyse.
- 1.4.2.1 Alle skenkings en bemakings aan die Kerk of 'n kommissie van die Algemene Sinode moet deur die Algemene Kommissie vir Fondse hanteer en beheer word. Wanneer skenkings en bemakings volgens wetlike eise anders hanteer moet word, moet die korrekte voorskrifte nagekom word met verantwoording aan die Algemene Kommissie vir Fondse. Die Algemene Sinode, met inbegrip van enige Kommissie deur die Algemene Sinode ingestel, sal nie 'n skenking wat herroeplik op aandrang van die skenker is, vir ander redes as die wesenlike versuim om aan die aangewese oogmerke en voorwaardes van bedoelde skenking te voldoen (met inbegrip van enige wanvoorstelling met betrekking tot die belastingaftrekbaarheid daarvan ingevolge artikel 18A van die Inkomstebelastingwet) aanvaar nie: Met dien verstande 'n skenker nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.
- 1.4.2.2 Indien 'n skenking/bemaking aan 'n spesifieke kommissie gedoen word, moet dit ten behoeve van daardie kommissie aangewend word.
- 1.4.2.3 Indien 'n skenking/bemaking vir 'n goedgekeurde werksaamheid gedoen word, mag die betrokke kommissie dit daarvoor aanwend.
- 1.4.2.4 Indien 'n kommissie 'n skenking/bemaking wil aanwend vir 'n doel of werksaamheid waarvoor daar nog nie goedkeuring ontvang is nie, moet die advies en goedkeuring van die Algemene Kommissie vir Fondse eers verkry word.
- 1.4.2.5 In geval die Algemene Kommissie vir Fondse nie goedkeuring gee nie, mag die kommissie hom na die Algemene Sinodale Kommissie wend.
- 1.4.3 Om eiendomme, roerend en/of onroerend, te verkoop, te verruil, te verhuur, te skenk of op enige ander manier te vervreem, te verbind, in pand, as sekuriteit te gee, of op enige ander wyse te beswaar met dien verstande dat:
  - 1.4.3.1 skenkings slegs gemaak mag word ter bevordering van die doelstellings van die Algemene Sinode of aan teologiese studente, leraars, werknemers en amptenare van die

NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalinge van die Inkomstebelastingwet van belasting vrygestel is;

- 1.4.3.2 slegs sekuriteit gegee mag word vir die verpligtinge van die Algemene Sinode.
- 1.4.4 Om gelde onder sy beheer te belê en om sodanige beleggings te gelde te maak, op te vra, te kanselleer, te sedeer, te verander of andersins daarmee te handel met dien verstande dat beleggings slegs gemaak mag word:
  - 1.4.4.1 by geregistreerde finansiële instellings, soos omskryf in Artikel 1 van die Wet op Finansiële Instellings (Belegging van Fondse), 1984 (Wet no.39 van 1984);
  - 1.4.4.2 in aandele genoteer op 'n aandelebeurs soos omskryf in artikel 1 van die Wet op Beheer van Aandelebeurse, 1985 (Wet no. 1 van 1985) omskryf; en/of
  - 1.4.4.3 in die ander versigtige beleggings in finansiële instrumente en bates wat die Kommissaris: Suid-Afrikaanse Inkomstediens bepaal, na oorlegpleging met die Uitvoerende Beampte van die Raad op Finansiële Dienste en die Direkteur van Organisasies Sonder Winsoogmerk;  
met dien verstande dat die Kommissie niteenstaande bostaande beperkings:
    - (A) 'n belegging (uitgesluit 'n besigheidsonderneming of handelsaktiwiteit) wat dit as 'n skenking, bemaking of erflating verkry, mag behou in die vorm waarin dit verkry is;
    - (B) 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating voor 1 Januarie 2001 verkry het, mag behou of voortsit in die vorm waarin dit verkry is vir 'n tydperk van 5 jaar na 1 Januarie 2001.
- 1.4.5 Om gelde uit te leen op eerste verband oor vaste eiendom of ander sekuriteit wat hy mag goeëndink aan teologiese studente, leraars, werknemers en amptenare van die NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalinge van die Inkomstebelastingwet van belasting vrygestel is.
- 1.5 In alle regsgeedinge of dispute oor eiendomme, goedere en fondse tree die Algemene Kommissie vir Fondse sonder meer bepaalde lasgewing sowel eisend as verwerend ten behoeve van die Algemene Sinode op ná raadpleging van die Algemene Regskommissie.
- 1.6 Ten einde hierdie handelinge te verrig, word alle stukke onderteken deur twee lede van die Algemene Kommissie vir Fondse wat daartoe deur die Algemene Kommissie vir Fondse gemagtig is.
- 1.7 Die Algemene Sinode het geen aanspraak op die eiendomme, goedere en fondse wat aan die samestellende sinodes, ringe of kerkrade behoort en onder aparte reglemente besit en beheer word nie.
- 1.8 Waar enige vaste eiendom aan die NG Kerk geskenk of nagelaat word ten behoeve van 'n werksaamheid of inrigting binne die gebied van 'n sinode, word dit met wedersydse instemming vir beheer en administrasie opgedra aan die betrokke sinode om vir die werksaamhede of inrigting aangewend te word.
- 1.9 Eiendomme wat voor die totstandkoming van die Algemene Sinode van die NG Kerk in gefedereerde verband gevestig was (soos byvoorbeeld die eiendomme onder die toesig en beheer van die Algemene Sondagskoolkommissie) het in 1962 met kerkvereniging die eiendomme van die NG Kerk in die algemene sinodale verband geword. Transportaktes van sodanige eiendomme wat op naam van die verskillende sinodes geregistreer staan, kan met die oog op besparing van oordragkoste, onveranderd bly.

Enige handeling in verband met sodanige eiendomme geskied egter in terme van die bepalinge van hierdie Reglement. Hierdie eiendomme kan verbind of vervreem word volgens die bepalinge van die Kerkorde van die betrokke sinode in wie se naam dit geregistreer is, slegs nadat die Algemene Kommissie vir Fondse daarvoor besluit het.

- 1.10 Die Algemene Sinode sal nie 'n besigheidsonderneming of handelsaktiwiteit bedryf nie, behalwe in die mate wat:
  - 1.10.1 die bruto inkomste uit bedoelde besigheidsonderneming of handelsaktiwiteit verkry, nie die grootste van:
    - (A) 15 persent van die bruto ontvangste van die Algemene Sinode; of
    - (B) R25 000;of sodanige hoër bedrag of persentasie as wat die Inkomstebelastingwet van tyd tot tyd mag toelaat, te bowe gaan nie;
  - 1.10.2 die onderneming of aktiwiteit:
    - (A) integraal en direk verwant is tot die oogmerk van die Algemene Sinode; en
    - (B) beoefen of uitgevoer word op 'n grondslag waarvan wesenlik die geheel gerig is op die verhaling van koste en wat nie onregverdige mededinging met betrekking tot belasbare entiteite tot gevolg sal hê nie;
  - 1.10.3 die onderneming of aktiwiteit, indien nie integraal en direk verwant aan die oogmerk van die Algemene Sinode nie, van 'n toevallige aard is en wesenlik onderneem word met vrywillige bystand sonder vergoeding; of
  - 1.10.4 die onderneming of aktiwiteit deur die Minister van Finansies by kennisgewing in die Staatskoerant goedgekeur is.
- 1.11 In geval van ontbinding van die Algemene Sinode moet alle eiendomme, goedere en fondse tussen die samestellende sinodes na verhouding van die getal belydende lidmate binne die gebied van elke sinode ten tye van die ontbinding verdeel word met dien verstande dat 'n sinode slegs in die verdeling van die Algemene Sinode se bates mag deel indien dit ingevolge artikel 30 van die Inkomstebelastingwet, no. 58 van 1962, soos gewysig, goedgekeur is as 'n openbare weldaadsorganisasie. Sien ook Basisdokument vir die Algemene Sinode, klousules 8.7 en 13.

## **2. SINODALE EIENDOMME, GOEDERE EN FONDSE**

- 2.1 Die Nederduitse Gereformeerde Kerk in sinodale verband is 'n regspersoon en die sinode of sy gemagtigde(s) is sy orgaan/organe.
- 2.2 Die Nederduitse Gereformeerde Kerk van/in ..... is dus die eienaar van alle roerende en onroerende bates wat deur die sinode beheer en verkry word en vaste eiendom word in die naam van *Die Nederduitse Gereformeerde Kerk van/in .....* geregistreer.
- 2.3 Eiendomme, goedere en fondse word geadminestreer deur 'n kommissie deur die sinode benoem met verslag aan die sinode.
- 2.4 Onderhewig daaraan dat die inkomste en eiendom van die Sinode, met inbegrip van eiendom of inkomste wat deur enige kommissie bestuur word, nie aan enige persoon uitgekeer mag word nie maar uitsluitlik aangewend mag word vir die beoefening van die aktiwiteite van die Sinode en die bevordering van die oogmerke waarvoor dit ingestel is en om tussentydse belegging te maak, (met dien verstande dat niks wat hierin bepaal is, die betaling ter goeder trou belet van redelike besoldiging (synde vergoeding



wat nie oormatig is, inaggenome wat algemeen as redelik geag word in die sektor en met betrekking tot die diens gelewer nie) aan enige werknemer of beampte van die Sinode vir dienste wat sodanige persoon werklik aan die Sinode gelewer het nie) is die kommissie soos in 2.3 aangedui, bevoeg om in opdrag van die sinode enige regshandeling wat verband hou met die beskikking, verkryging, vervreemding, bewaring of versekering van die betrokke bates te verrig met insluiting van die volgende:

- 2.4.1 Om eiendomme, roerend en/of onroerend te verkry deur skenking, erfating, aankoop, huur of enige ander wyse; Met dien verstande dat die Sinode, met inbegrip van enige Kommissie deur die Sinode ingestel, nie 'n skenking wat herroeplik op aandrang van die skenker is, vir ander redes as die wesenlike versuim om aan die aangewese oogmerke en voorwaardes van bedoelde skenking te voldoen (met inbegrip van enige wanvoorstelling met betrekking tot die belastingaftrekbaarheid daarvan ingevolge artikel 18A van die Inkomstebelastingwet) sal aanvaar nie: Met dien verstande verder dat 'n skenker nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.
- 2.4.2 Om eiendomme, roerend en/of onroerend, te verkoop, te verruil, te verhuur, te skenk of op enige ander wyse te vervreem, te verbind, in pand, as sekuriteit of as borge te gee, of op enige ander wyse te beswaar met dien verstande dat:
  - 2.4.2.1 skenkings slegs gemaak mag word ter bevordering van die doelstellings van die Sinode of aan teologiese studente, leraars, werknemers en amptenare van die NG Kerk asook aan godsdienstige, liefdadigheids en/of opvoedkundige inrigtings wat ingevolge die bepalings van die Inkomstebelastingwet van belasting vrygestel is;
  - 2.4.2.2 slegs borg gestel of sekuriteit gegee mag word vir die verpligtinge van die sinode, teologiese studente, leraars, werknemers en amptenare van die NG Kerk asook aan godsdienstige, liefdadigheids en/of opvoedkundige inrigtings wat ingevolge die bepalings van die Inkomstebelastingwet van belasting vrygestel is.
- 2.4.3 Om gelde onder sy beheer te belê en om sodanige beleggings te gelde te maak, op te vra, te kanselleer, te sedeer, te verander of andersins daarmee te handel met dien verstande dat beleggings slegs gemaak mag word:
  - 2.4.3.1 by geregistreerde finansiële instellings, soos omskryf in Artikel 1 van die Wet op Finansiële Instellings (Belegging van Fondse), 1984 (Wet no.39 van 1984);
  - 2.4.3.2 in aandele genoteer op 'n aandelebeurs soos omskryf in artikel 1 van die Wet op Beheer van Aandelebeurse, 1985 (Wet no. 1 van 1985) omskryf; en/of
  - 2.4.3.3 in die ander versigtige beleggings in finansiële instrumente en bates wat die Kommissaris: Suid-Afrikaanse Inkomstediens bepaal, na oorlegpleging met die Uitvoerende Beampte van die Raad op Finansiële Dienste en die Direkteur van Organisasies Sonder Winsoogmerk; met dien verstande dat die Sinode of Kommissie nieteenstaande bostaande beperkings:
    - (A) 'n belegging (uitgesluit 'n besigheidsonderneming of handelsaktiwiteit) wat dit as 'n skenking, bemaking of erfating verkry, mag behou in die vorm waarin dit verkry is;
    - (B) 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erfating voor 1 Januarie 2001 verkry het, mag behou of voortsit in die vorm waarin dit verkry is vir 'n tydperk van 5 jaar na 1 Januarie 2001.

- 2.4.4 Om gelde uit te leen op eerste verband oor vaste eiendom of ander sekuriteit wat hy mag goeddink aan teologiese studente, leraars, werknemers en amptenare van die NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalings van die Inkomstebelastingwet van belasting vrygestel is.
- 2.5 In alle regsgedinge of dispute oor eiendomme, goedere en fondse tree die kommissie soos in 2.3 aangedui, sonder meer bepaalde lasgewing sowel eisend as verwerend ten behoeve van die sinode op na goedkeuring van die sinodale regs kommissie.
- 2.6 Die Sinode sal nie 'n besigheidsonderneming of handelsaktiwiteit bedryf nie, behalwe in die mate wat:
- 2.6.1 die bruto inkomste uit bedoelde besigheidsonderneming of handelsaktiwiteit verkry, nie die grootste van:
- (A) 15 persent van die bruto ontvangste van die Sinode; of
- (B) R25 000;
- of sodanige hoër bedrag of persentasie as wat die Inkomstebelastingwet van tyd tot tyd mag toelaat, te bowe gaan nie;
- 2.6.2 die onderneming of aktiwiteit:
- (A) integraal en direk verwant is tot die oogmerk van die Sinode; en
- (B) beoefen of uitgevoer word op 'n grondslag waarvan wesenlik die geheel gerig is op die verhaling van koste en wat nie onregverdige mededinging met betrekking tot belasbare enteiteite tot gevolg sal hê nie;
- 2.6.3 die onderneming of aktiwiteit, indien nie integraal en direk verwant aan die oogmerk van die Sinode nie, van 'n toevallige aard is en wesenlik onderneem word met vrywillige bystand sonder vergoeding; of
- 2.6.4 die onderneming of aktiwiteit deur die Minister van Finansies by kennisgewing in die Staatskoerant goedgekeur is.
- 2.7 In geval van ontbinding van die Sinode moet alle eiendomme, goedere en fondse tussen die samestellende gemeentes na verhouding van die getal belydende lidmate in elke gemeente ten tye van die ontbinding verdeel word met dien verstande dat 'n ring slegs in die verdeling van die Sinode se bates mag deel indien dit ingevolge artikel 30 van die Inkomstebelastingwet no. 58 van 1962, soos gewysig, goedgekeur is as 'n openbare weldaadsorganisasie

### **3. RINGSEIENDOMME, GOEDERE EN FONDSE**

- 3.1 Die Nederduitse Gereformeerde Kerk in ringsverband is 'n regs persoon en die ringsvergadering of sy gemagtigde(s) is sy orgaan.
- 3.2 Die Nederduitse Gereformeerde Ring van ..... is dus die eienaar van alle roerende en onroerende bates wat deur die Ring beheer en verkry word en vaste eiendom word in die naam van *Die Nederduitse Gereformeerde Ring van .....* geregistreer.
- 3.3 Eiendomme, goedere en fondse word geadmistrateer deur 'n kommissie deur die ring benoem met verslag aan die ringsvergadering.
- 3.4 Onderhewig daaraan dat die inkomste en eiendom van die Ring, met inbegrip van eiendom of inkomste wat deur enige kommissie bestuur word, nie aan enige persoon uitgekeer mag word nie maar uitsluitlik aangewend mag word vir die beoefening van die aktiwiteite van die Ring en die bevordering van die oogmerke waarvoor dit ingestel is en om tussentydse belegging te maak, (met dien verstande dat niks wat hierin bepaal

is, die betaling ter goeder trou belet van redelike besoldiging (syne vergoeding wat nie oormatig is, inaggenome wat algemeen as redelik geag word in die sektor en met betrekking tot die diens gelewer) aan enige werknemer of beampte van die Ring vir dienste wat sodanige persoon werklik aan die Ring gelewer het nie ) is die kommissie soos in 3.3 aangedui, bevoeg om in opdrag van die ring enige regshandeling wat verband hou met die beskikking, verkryging, vervreemding, beswaring of versekering van die betrokke bates te verrig met insluiting van die volgende:

- 3.4.1 Om eiendomme, roerend en/of onroerend, te verkry deur skenking, erflating, aankoop, huur of op enige ander wyse; Met dien verstande dat die Ring, met inbegrip van enige Kommissie deur die Ring ingestel, nie 'n skenking wat herroeplik op aandrang van die skenker is, vir ander redes as die wesenlike versuim om aan die aangewese oogmerke en voorwaardes van bedoelde skenking te voldoen (met inbegrip van enige wanvoorstelling met betrekking tot die belastingaftrekbaarheid daarvan ingevolge artikel 18A van die Inkomstebelastingwet) sal aanvaar nie: Met dien verstande verder dat 'n skenker nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.
- 3.4.2 Om eiendomme, roerend en/of onroerend, te verkoop, te verruil, te verhuur, te skenk of op enige ander wyse te vervreem, te verbind, in pand, as sekuriteit of as borg te gee, of op enige ander wyse te beswaar met dien verstande dat:
  - 3.4.2.1 skenkings slegs gemaak mag word ter bevordering van die doelstellings van die ring of aan teologiese studente, leraars, werknemers en amptenare van die NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalinge van die Inkomstebelastingwet van belasting vrygestel is;
  - 3.4.2.2 slegs borg gestel of sekuriteit gegee mag word vir die verpligtinge van die ring, teologiese studente, leraars, werknemers en amptenare van die NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalinge van die Inkomstebelastingwet van belasting vrygestel is.
- 3.4.3 Om gelde onder sy beheer te belê en om sodanige beleggings te gelde te maak, op te vra, te kanselleer, te sedeer, te verander of andersins daarmee te handel met dien verstande dat beleggings slegs gemaak mag word:
  - 3.4.3.1 by geregistreerde finansiële instellings, soos omskryf in Artikel 1 van die Wet op Finansiële Instellings (Belegging van Fondse), 1984 (Wet no.39 van 1984);
  - 3.4.3.2 in aandele genoteer op 'n aandelebeurs soos omskryf in artikel 1 van die Wet op Beheer van Aandelebeurse, 1985 (Wet no. 1 van 1985) omskryf; en/of
  - 3.4.3.3 in die ander versigtige beleggings in finansiële instrumente en bates wat die Kommissaris: Suid-Afrikaanse Inkomstediens bepaal, na oorlegpleging met die Uitvoerende Beampte van die Raad op Finansiële Dienste en die Direkteur van Organisasies Sonder Winsoogmerk;met dien verstande dat die ring of 'n ringskommissie nieteenstaande bostaande beperkings:
  - (A) 'n belegging (uitgesluit 'n besigheidsonderneming of handelsaktiwiteit) wat dit as 'n skenking, bemaking of erflating verkry, mag behou in die vorm waarin dit verkry is;
  - (B) 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking,

bemaking of erflating voor 1 Januarie 2001 verkry het, mag behou of voortsit in die vorm waarin dit verkry is vir 'n tydperk van 5 jaar na 1 Januarie 2001.

- 3.4.4 Om gelde uit te leen op eerste verband oor vaste eiendom of ander sekuriteit wat hy mag goeddink aan teologiese studente, leraars, werknemers en amptenare van die NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalings van die Inkomstebelastingwet van belasting vrygestel is.
- 3.5 In alle regsgedinge of dispute oor eiendomme, goedere en fondse tree die kommissie soos in 3.3 aangedui sonder meer bepaalde lasgewing sowel eisend as verwerend ten behoeve van die ring op, met goedkeuring van die ring/ringskommissie. Die ring word egter ten sterkste aanbeveel om in sodanige situasies die advies van die sinodale regskommissie te verkry.
- 3.6 Die ring sal nie 'n besigheidsonderneming of handelsaktiwiteit bedryf nie, behalwe in die mate wat:
- 3.6.1 die bruto inkomste uit bedoelde besigheidsonderneming of handelsaktiwiteit verkry, nie die grootste van:
- (A) 15 persent van die bruto ontvangste van die ring; of
- (B) R25 000;
- of sodanige hoër bedrag of persentasie as wat die Inkomstebelastingwet van tyd tot tyd mag toelaat, te bowe gaan nie;
- 3.6.2 die onderneming of aktiwiteit:
- (A) integraal en direk verwant is tot die oogmerk van die ring; en
- (B) beoefen of uitgevoer word op 'n grondslag waarvan wesenlik die geheel gerig is op die verhaling van koste en wat nie onregverdige mededinging met betrekking tot belasbare entiteite tot gevolg sal hê nie;
- 3.6.3 die onderneming of aktiwiteit, indien nie integraal en direk verwant aan die oogmerk van die ring nie, van 'n toevallige aard is en wesenlik onderneem word met vrywillige bystand sonder vergoeding; of
- 3.6.4 die onderneming of aktiwiteit deur die Minister van Finansies by kennisgewing in die Staatskoerant goedgekeur is. .
- 3.7 by die ontbinding van die Ring, en die inlywing van die Ring by 'n ander NG ring of ringe na goedkeuring deur die Sinode, word die bates wat oorbly, na voldoening van al die Ring se verpligtinge gegee of oorgemaak aan die ander ring(e) wat ingevolge artikel 30 van die Inkomstebelastingwet goedgekeur is as 'n openbare weldaadsorganisasie(s). Sien ook klousule 13 van hierdie dokument.

#### **4. GEMEENTELIKE EIENDOMME, GOEDERE EN FONDSE**

- 4.1 Elke gemeente is 'n regs persoon en die kerkraad of sy gemagtigde(s) is sy orgaan.
- 4.2 Die Nederduitse Gereformeerde Gemeente ..... is dus die eienaar van alle roerende en onroerende bates wat deur die kerkraad beheer en verkry word en vaste eiendom word in die naam van *Die Nederduitse Gereformeerde Gemeente* ..... geregistreer.

- 4.3 Eiendomme, goedere en fondse word geadmistrateer deur die kerkraad met jaarlikse verslag aan die gemeente en ring.
- 4.4 Onderhewig daaraan dat die inkomste en eiendom van die gemeente nie aan enige persoon uitgekeer mag word nie maar uitsluitlik aangewend mag word vir die beoefening van die aktiwiteite van die gemeente en die bevordering van die oogmerke waarvoor dit ingestel is en om tussentydse belegging te maak, (met dien verstande dat niks wat hierin bepaal is, die betaling ter goeder trou belet van redelike besoldiging (synde vergoeding wat nie oormatig is, inaggenome wat algemeen as redelik geag word in die sektor en met betrekking tot die diens gelewer) aan enige werknemer, lidmaat of beampte van die gemeente vir dienste wat sodanige persoon werklik aan die gemeente gelewer het nie) is die kerkraad bevoeg om enige regshandeling wat verband hou met die beskikking, verkryging, vervreemding, beswaring of versekering van die betrokke bates te verrig met insluiting van die volgende:
- 4.4.1 Om eiendomme, roerend en/of onroerend te verkry deur skenking, erflating, aankoop, huur of op enige ander wyse; Met dien verstande dat die kerkraad nie 'n skenking wat herroepelik op aandrang van die skenker is, vir ander redes as die wesenlike versuim om aan die aangewese oogmerke en voorwaardes van bedoelde skenking te voldoen (met inbegrip van enige wanvoorstelling met betrekking tot die belastingafreikbaarheid daarvan ingevolge artikel 18A van die Inkomstebelastingwet) sal aanvaar nie: Met dien verstande verder dat 'n skenker nie enige voorwaarde mag oplê wat bedoelde skenker of enige verbonde persoon met betrekking tot bedoelde skenker in staat kan stel om enige direkte of indirekte voordeel uit die aanwending van die skenking te verkry nie.
- 4.4.2 Om eiendomme, roerend en/of onroerend, te verkoop, te verruil, te verhuur, te skenk of op enige ander wyse te vervreem, te verbind, in pand, as sekuriteit of as borg te gee, of op enige ander wyse te beswaar met dien verstande dat:
- 4.4.2.1 skenkings slegs gemaak mag word ter bevordering van die doelstellings van die gemeente of aan teologiese studente, leraars, werknemers en amptenare van die NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalings van die Inkomstebelastingwet van belasting vrygestel is;
- 4.4.2.2 slegs borg gestel of sekuriteit gegee mag word vir die verpligtinge van die gemeente, teologiese studente, leraars, werknemers en amptenare van die NG Kerk asook aan godsdienstige, liefdadigheids- en/of opvoedkundige inrigtings wat ingevolge die bepalings van die Inkomstebelastingwet van belasting vrygestel is.
- 4.4.3 Om gelde onder sy beheer te belê en om sodanige beleggings te gelde te maak, op te vra, te kanselleer, te sedeer, te verander of andersins daarmee te handel met dien verstande dat beleggings slegs gemaak mag word:
- 4.4.3.1 by geregistreerde finansiële instellings, soos omskryf in Artikel 1 van die Wet op Finansiële Instellings (Belegging van Fondse), 1984 (Wet no.39 van 1984);
- 4.4.3.2 in aandele genoteer op 'n aandelebeurs soos omskryf in artikel 1 van die Wet op Beheer van Aandelebeurse, 1985 (Wet no. 1 van 1985) omskryf; en/of
- 4.4.3.3 in die ander versigtige beleggings in finansiële instrumente en bates wat die Kommissaris: Suid-Afrikaanse Inkomstediens bepaal, na oorlegpleging met die Uitvoerende Beampte van die Raad op Finansiële Dienste en die Direkteur van Organisasies Sonder Winsoogmerk;
- met dien verstande dat die kerkraad niesteenstaande bostaande beperkings:

- (A) 'n belegging (uitgesluit 'n besigheidsonderneming of handelsaktiwiteit) wat dit as 'n skenking, bemaking of erflating verkry, mag behou in die vorm waarin dit verkry is;
- (B) 'n belegging in die vorm van 'n besigheidsonderneming of handelsaktiwiteit (of enige bate in so 'n besigheidsonderneming of handelsaktiwiteit) wat dit as 'n skenking, bemaking of erflating voor 1 Januarie 2001 verkry het, mag behou of voortsit in die vorm waarin dit verkry is vir 'n tydperk van 5 jaar na 1 Januarie 2001.
- 4.4.4 Om gelde uit te leen op eerste verband oor vaste eiendom of ander sekuriteit wat hy mag goeddink aan teologiese studente, leraars, werknemers en amptenare van die N G Kerk asook aan godsdienstige, liefdadigheids- en/of opvoedkundige inrigtings wat ingevolge die bepalings van die Inkomstebelastingwet van belasting vrygestel is.
- 4.5 In alle regsdinge of dispute oor eiendomme, goedere en fondse tree die kerkraad sonder meer bepaalde lasgewing sowel eisend as verwerend en ten behoeve van die gemeente op. Die kerkraad word egter ten sterkste aanbeveel om in sodanige situasie die advies van die sinodale regskommissie te verkry.  
(Bostaande is besluit met dien verstande dat punte 2, 3 en 4 as leidrade vir sinodes dien.)
- 4.6 Die gemeente sal nie 'n besigheidsonderneming of handelsaktiwiteit bedryf nie, behalwe in die mate wat:
- 4.6.1 die bruto inkomste uit bedoelde besigheidsonderneming of handelsaktiwiteit verkry, nie die grootste van:
- (A) 15 persent van die bruto ontvangste van die gemeente; of
- (B) R25 000;
- of sodanige hoër bedrag of persentasie as wat die Inkomstebelastingwet van tyd tot tyd mag toelaat, te bowe gaan nie;
- 4.6.2 die onderneming of aktiwiteit:
- (A) integraal en direk verwant is tot die oogmerk van die gemeente; en
- (B) beoefen of uitgevoer word op 'n grondslag waarvan wesenlik die geheel gerig is op die verhaling van koste en wat nie onregverdige mededinging met betrekking tot belasbare entiteite tot gevolg sal hê nie;
- 4.6.3 die onderneming of aktiwiteit, indien nie integraal en direk verwant aan die oogmerk van die gemeente nie, van 'n toevallige aard is en wesenlik onderneem word met vrywillige bystand sonder vergoeding; of
- 4.6.4 die onderneming of aktiwiteit deur die Minister van Finansies by kennisgewing in die Staatskoerant goedgekeur is.
- 4.7 In geval van ontbinding van 'n gemeente sonder dat die gemeente by 'n ander gemeente van die NG Kerk ingelyf word, word die bates van die gemeente wat oorbly na voldoening aan al sy verpligtinge, gegee of oorgemaak aan 'n ander gemeente of inrigting, met doelstellings soortgelyk aan die van die gemeente en wat ingevolge artikel 30 van die Inkomstebelastingwet no. 58 van 1962, soos gewysig, goedgekeur is as 'n openbare weldaadsorganisasie, wat ingevolge die prosedure voorgeskryf in die betrokke Kerkorde, Bepalings en Reglemente wat op die gemeente van toepassing is deur die Kerkraad en/of Ring aangewys is. Sien ook Basisdokument vir gemeentes klousule 8.7 en 13.

- 5. RIGLYNE VIR FINANSIËLE BESTUUR SOOS GOEDGEKEUR DEUR DIE ALGEMENE SINODE 2002**
- 5.1 Riglyne vir bestuur van kerklike fondse  
Riglyne en voorskrifte vir die bestuur van kerklike fondse word weergegee in die Kerkorde Artikels 43.2.1, Art. 57 en Regl. 7 en 9.
- 5.2 Riglyne vir bedryfsinstansies van en in belang van die kerk.  
Die volgende riglyne word goedgekeur vir die bestuur van bedryfsinstansies wat aan Kommissies van die Algemene Sinode verslag doen:
- 5.2.1 Alle werksaamhede en kommissies wat opgeneem is in die begroting van die Algemene Sinode se fondse word deur die betrokke kommissie onder leiding en toesig van die AKF bedryf en bestuur.
- 5.2.2 Kommissies wat oor die vermoë beskik om selfstandig fondse te genereer, hetsy deur handelsaktiwiteite en/of beleggingsinkomste en selfonderhoudend is (geen fondse vanaf die Algemene Sinode bekom nie) en voldoen aan die reglemente van die Algemene Sinode ten opsigte van eiendomme en finansies, administreer en bestuur hulle eie fondse en doen jaarliks verslag aan die AKF met die nodige stawende dokumente soos finansële state, begrotings, toekenningsbeleid, ens. Hierdie kommissies doen selfstandig verslag aan die Algemene Sinode.
- 5.3 Bestaande ooreenkomste of reglemente (Aktes van oprigting en statute) ten opsigte van Artikel 21-maatskappy en ander tipe regsenteite, word gehonoreer. Bogenoemde instansies wat 'n noue verbintenis met die NG Kerk het en aan die kerk dienste lewer, behoort ook jaarliks verslag te lewer aan die ASK en AKF met die voorsiening van die nodige finansiële inligting.
- 5.4 Indien 'n kerklike kommissie of instansie 'n Artikel 21-maatskappy of ander regsenteiteit wil vorm moet dit in noue samewerking en met die goedkeuring van die ASK geskied.
- 5.5 Enige oordrag van fondse of beleggings van een kerklike kommissie of werksaamheid, aan 'n ander kommissie, instansie of sinode, behoort met die nodige samewerking en konsultasie van die AKF te geskied.
- 5.6 Die gebruik van die naam van die kerk deur Art 21-maatskappy en ander instansies, behoort nie sondermeer toegelaat te word nie vanweë die latente risikos wat dit vir die Kerk skep. (vgl. *besluit Algemene Sinode 1990 Handelinge bl. 638 pt 8*).
- 5.7 Ten opsigte van korporatiewe bestuur verwag die Algemene Sinode dat kerklike instansies aan die hoogste standaard en norme sal voldoen (bv die Riglyne van die King-Kommissie 2002).

## **10. REGLEMENT VIR DIE ALGEMENE JEUGKOMMISSIE (AJK)**

### **1. NAAM**

Algemene Jeugkommissie (AJK).

### **2. SAMESTELLING**

- 2.1 Een lid (met sekundi) uit elkeen van die sinodes;
- 2.2 Die predikant(e) in diens van die Algemene Sinode met opdrag jeugbediening;
- 2.3 Een verteenwoordiger van AKTO;
- 2.4 Een verteenwoordiger van elke bediening van die AJK;
- 2.5 Gekoöpteerde deskundiges tot 'n maksimum van vyf persone;
- 2.6 Die sakebestuurder van die Algemene Jeugkommissie (adviserend).

### **3. OPDRAG**

Die Kommissie

- 3.1 adviseer die Algemene Sinode in verband met die beleid wat gevolg moet word ten opsigte van jeugbediening;
- 3.2 dra sorg vir navorsing, beplanning, inligting en voorligting in belang van die bediening aan die jeug;
- 3.3 voer opdragte van die Algemene Sinode uit;
- 3.4 benoem subkommissies/bedieninge en ad hoc-kommissies na behoefte;
- 3.5 Voorsien en bestuur hulpbronne vir jeugbediening.

### **4. KONSTITUERING EN VERGADERINGS**

- 4.1 Die Kommissie konstitueer by die eerste vergadering na die Algemene Sinode;
- 4.2 Die Kommissie vergader jaarliks;
- 4.3 By die konstituering word 'n dagbestuur van ses lede (met sekundi) saamgestel wat spoedeisende sake en die administrasie hanteer. Die dagbestuur bestaan uit die voorsitter, ondervoorsitter, skriba en drie ander persone wat elkeen een bepaalde terrein behartig. 'n Predikant in algemene sinodale diens tree amptshalwe as skriba op. Die sakebestuurder dien adviserend in die dagbestuur en kundige lede kan ad hoc betrek word.



# **11. REGLEMENT VIR DIE ALGEMENE KOMMISSIE VIR KERKLIKE MEDIA (AKKM)**

*(Hierdie Reglement bly voortbestaan totdat die ASK 'n nuwe reglement goedgekeur het)*

## **1. NAAM**

Algemene Kommissie vir Kerklike Media (AKKM).

## **2. SAMESTELLING**

- 2.1 Een lid (met 'n sekundus) uit elkeen van die sinodes. Die lede hoef nie noodwendig afgevaardigdes na die Algemene Sinode te wees nie;
- 2.2 Die hoofredakteur van kerklike tydskrifte en die uitvoerende direkteur van Bybel-Media;
- 2.3 Deskundiges beperk tot 'n maksimum van drie gekoöpteerde persone;
- 2.4 Verteenwoordigers van die AJK, AKDB, AKE, AKG, AKLAS, AKV en ASSK op eie koste met adviserende stem.

## **3. OPDRAG**

Die Kommissie

- 3.1 koördineer die mediabediening van die NG Kerk en rig hom onder meer deur die werk van die Tydskriftemaatskappy en van Bybel-Media (Bybelkor en Mema-Media) tot die lidmate van die kerke sowel as tot ander Christene en nie-Christene in ons land en elders;
- 3.2 bring deur die mediabediening aan almal die evangelie in sy volle omvang en toegepas op al hulle lewensbehoefes, met gebruikmaking van geskikte gedrukte en elektroniese media;
- 3.3 verseker dat hierdie bediening op 'n doeltreffende, ekonomiese en waar moontlik ekumeniese wyse plaasvind sodat die kerk van Christus opgebou, die koninkryk van God uitgebou en die Naam van die Here geëer word;
- 3.4 kies in sy hoedanigheid as ledevergadering van die Tydskriftemaatskappy van die NG Kerk kragtens die statute die direkteure van die maatskappy;
- 3.5 kies in sy hoedanigheid as ledevergadering van Bybel-Media kragtens die statute die direkteure en die uitvoerende direkteur van die maatskappy;
- 3.6 adviseer die Algemene Sinode insake die beleid vir kerklike media;
- 3.7 is as ledevergaderings deur die direksies van die voormelde maatskappye verantwoordelik vir die uitgee en beheer van die kerklike tydskrifte, die Jaarboek, die Bybelstudiegids en toerustingmateriaal van Bybelkor en die oudiovisuele media van Mema-Media en alle ander publikasies en media aan hom opgedra;
- 3.8 beheer as ledevergaderings deur die direksies van die maatskappye die fondse aan hom toevertrou;
- 3.9 benoem die hoofredakteur van kerklike tydskrifte.

## **4. KONSTITUERING EN VERGADERINGS**

- 4.1 Die Kommissie konstitueer na die vergadering van die Algemene Sinode;
- 4.2 Alle direkteure tree af op die eerste algemene vergadering van die maatskappye na afloop van 'n Algemene Sinode. Direkteure kan heraan gestel word;
- 4.3 Ingevolge die statute van die maatskappye vergader die lede van die maatskappye een maal per jaar vir die jaarvergadering om die geouditeerde jaarstate van die maatskappye te behandel;

- 4.4 Kragtens dieselfde statute kan lede egter deur gevolmagtigde verteenwoordigers wat namens hulle stem, die jaarstate behandel en ander geldige besluite neem sodat dit nie vir die volle Algemene Kommissie vir Kerklike Media nodig is om jaarliks te vergader nie;
- 4.5 Die direksies hanteer alle sake van die maatskappye streng volgens die bepalinge van die Maatskappyewet in die beste belang van die media van die NG Kerk.

## **12. REGLEMENT VIR KERKLIKE JEUGWERKERS**

1. In die jeugbediening maak die kerk ook gebruik van kerklike jeugwerkers. 'n Kerklike jeugwerker is 'n persoon met 'n B.Diac graad in jeugwerk of ander erkende opleiding, wat geregistreer is by die Kerklike Jeugwerkersvereniging, die Formuliere van Eenheid onderteken het en formeel deur die kerk in diens geneem is.
2. Die opleiding van kerklike jeugwerkers geskied aan die Hugenote Kollege. Die erkenning van ander opleiding word deur die kommissie vir kerklike jeugwerkers van die AJK hanteer.
3. Die aanstelling van jeugwerkers geskied ooreenkomstig die riglyne soos neergelê in die Bestuursgids vir Diensverhoudinge in die NG Kerk.
4. Die jeugwerker se bediening is gerig op die geloofs- en morele vorming asook toerusting van die jeug in samewerking met die kerkraad, kommissies en ouers. Dit omvat:
  - 4.1 Beplanning, behoeftebepaling en navorsing rakende die jeugbediening.
  - 4.2 Oorhoofse administrasie van die jeugbediening onder toesig van die kerkraad.
  - 4.3. Die kategetiese onderrig, jeugaksies en funksionering.
  - 4.4 Die behartiging van die herderlike sorg aan die jeug veral in die bou van verhoudings en pastorale begeleiding.
5. Kerklike jeugwerkers in die ring dien op die ringsjeugkommissie.
6. Kerklike jeugwerkers behoort op die Sinodale Jeugkommissie verteenwoordiging te hê.
7. Die Kerklike Jeugwerkersvereniging is 'n subkommissie van die AJK en word daarop verteenwoordig.

# **13. REGLEMENT VIR DIE ALGEMENE KOMMISSIE VIR LEER EN AKTUELE SAKE (AKLAS)**

## **1. NAAM**

Algemene Kommissie vir Leer en Aktuele Sake (AKLAS).

## **2. SAMESTELLING**

- 2.1 Vyf lede (met sekundi) wat deskundiges op die gebied van leer en aktuele sake is;
- 2.2 Die NG Kerk dosente van die departemente dogmatologie van elkeen van die teologiese fakulteite van Stellenbosch, Pretoria en Bloemfontein;
- 2.3 Die predikante in sinodale diens met opdrag leer en aktuele sake (indien so 'n pos bestaan);
- 2.4 Een verteenwoordiger van die Algemene Kommissie vir Vrouelidmate;
- 2.5 Twee eksegete benoem deur die Algemene Sinode.
- 2.6 Ander deskundiges beperk tot 'n maksimum van drie gekoöpteerde persone vir die Kommissie sowel as drie vir elk van die subkommissies.
- 2.7 Die sinodes wat nie op die Kommissie verteenwoordig is nie, kan op eie koste elk 'n lid met adviserende stem aanwys.

## **3. OPDRAG**

Die Kommissie

- 3.1 adviseer die Algemene Sinode in verband met alle sake rakende die leer en leerstellingetiese kwessies van aktuele belang in die lewe en getuienis van die kerk in hierdie wêreld;
- 3.2 dra sorg vir navorsing en beplanning, inligting en voorligting in verband met die leer en aktuele sake.

## **4. KONSTITUERING EN VERGADERINGS**

- 4.1 Die Kommissie konstitueer en vergader hoogstens drie maal tussen twee vergaderings van die Algemene Sinode;
- 4.2 By die konstituering word 'n dagbestuur saamgestel bestaande uit die voorsitter, ondervoorsitter en skriba;
- 4.3 Die Kommissie benoem subkommissies volgens behoefte.

# **14. REGLEMENT VIR DIE REËLING VAN DIE OPLEIDING EN LEGITIMASIE VAN EVANGELIEDIENAARS**

## **1. OOREENKOMS MET DIE UNIVERSITEIT**

Die opleiding van predikante vir die NG Kerk geskied aan die teologiese fakulteite van die Universiteite van Stellenbosch, Pretoria en Bloemfontein, en word by wyse van skriftelike ooreenkoms tussen die betrokke sinode(s) en universiteite bepaal, op voorwaarde dat dit nie in stryd is met die besluite van die Algemene Sinode soos in hierdie Reglement vervat nie.

## **2. SAMESTELLING EN FUNKSIES VAN DIE KOMMISSIES BETROKKE BY DIE TEOLOGIESE OPLEIDING**

### **2.1 Die Algemene Kommissie vir Teologiese Opleiding (AKTO)**

AKTO is die kommissie van die Algemene Sinode wat die oorhoofse verantwoordelikheid dra vir teologiese opleiding (sien reglement vir AKTO).

### **2.2 Die Kuratoria**

#### **2.2.1 Samestelling**

Die kuratorium word saamgestel uit verteenwoordigers van die sinode(s) binne wie se gebied die teologiese fakulteite geleë is. Die getal lede in 'n kuratorium word bepaal deur die betrokke sinodes (Wes- en Suid-Kaapland, Transvaal en Oranje-Vrystaat). Ander sinodes het die reg om op eie koste elk een verteenwoordiger in die kuratoria te benoem.

#### **2.2.2 Funksies**

##### **2.2.2.1 Opleiding**

Elke kuratorium dra sorg vir, beheer en hou toesig oor die opleiding en die voortgesette opleiding van evangeliedienaars (KO Art. 5.3).

##### **2.2.2.2 Studente**

2.2.2.2.1 Elke kuratorium dra finale verantwoordelikheid vir die keuring, begeleiding, toesighouding oor, eksaminering en aanbeveling vir toelating tot die evangeliebediening van alle teologiese studente wat by hom ingeskryf is en wat in die bediening van die NG Kerk wil gaan. Hy kan hierdie verantwoordelikheid deur 'n subkommissie(s) behartig.

2.2.2.2.2 Elke kuratorium word in hierdie taak bygestaan en geadviseer deur die begeleidingskommissie, eksamenkommissie en raad van NG Kerk-dosente as subkommissies van elke kuratorium. Saam hou hulle toesig oor studente se akademiese vordering en hulle leer en lewe.

2.2.2.2.3 Teologiese studente staan vir die duur van hulle studie onder die toesig van die betrokke kuratorium en die raad van dosente, soos in KO Art. 5.3 neergelê, en hulle hou 'n voortgaande toesig oor die studente se leer en lewe. As lidmate staan die studente onder die opsig, regering en tug van hulle plaaslike kerkraad wat deur die kuratorium geraadpleeg kan word. Die Dagbestuur van die kuratorium kan die toelating van 'n

student (met die oog op die bediening) opskort of enige ander dissiplinêre maatreël teen die studente instel, wat binne die bevoegdheid van die kuratorium val.

### 2.2.2.3 Dosente

2.2.2.3.1 Die kuratorium hou saam met die betrokke kerkraad toesig oor die leer en lewe van die dosente in teologie wat bevestig of net kerklik geakkrediteer<sup>14</sup> is. Wanneer daar 'n klag of nadelige gerugte tot hulle kennis kom, gee die kuratorium kennis daarvan aan die kerkraad waar die betrokke dosent lidmaat is of aan die kerklike liggaam wat opsig oor die dosent uitoefen.

2.2.2.3.2 Die kuratorium hou óók toesig oor die dosente in die teologie wat bevestig of kerklik geakkrediteer is wat betref die uitoefening van hulle ampspligte as teologiese dosente. Indien die kuratorium in die lig van 'n skriftelike voorlegging en 'n behoorlike ondersoek 'n dosent onbevoeg of ongeskik vind om ampspligte tot bevrediging van die Kerk uit te voer, besluit die kuratorium om kerklike akkreditering met die oog op die opleiding van die kerklike bediening terug te trek.

2.2.2.3.3 Hierdie toesig hef nie die normale toesig van die universiteitsowerheid op nie. Noue skakeling tussen die kerk en die universiteit is te alle tye 'n vereiste.

## 2.3 Subkommissies van die kuratoria

### 2.3.1 Dagbestuur

Elke kuratorium wys 'n dagbestuur aan ooreenkomstig die bepalings en reglemente van die bepaalde sinode(s).

### 2.3.2 Die Begeleidingskommissie

2.3.2.1 Elke kuratorium benoem 'n kommissie(s) wat die teologiese studente begelei en wat die kuratorium adviseer ten opsigte van die keuring, toesig en begeleiding van studente tydens die tydperk van hulle voorbereiding vir die evangeliebediening. Die kuratorium verleen op grond hiervan jaarliks toestemming aan studente om voort te gaan met hulle teologiese studie met die oog op legitimasië in hulle finale jaar.

2.3.2.2 Sinodes in wie se gebied daar teologiese opleidingsentra anders as die drie erkende sentra van die NG Kerk is, moet in oorleg met 'n kuratorium toesien dat studente wat daar studeer met die oog op die bediening die nodige begeleiding ontvang.

### 2.3.3 Die Eksamenkommissie

#### 2.3.3.1 Samestelling

Elke kuratorium benoem 'n eksamenkommissie ooreenkomstig die bepalings en reglemente van die bepaalde sinode(s).

#### 2.3.3.2 Funksies

2.3.3.2.1 Die eksamenkommissie neem die proponentseksamen asook *colloquium doctum* af en beveel die suksesvolle kandidate by die kuratorium aan vir legitimasië deur die

---

14 “Akademiese akkreditering” .. gee amptelike erkenning deur die betrokke Universiteit van die geskiktheid en die bevoegdheid van 'n persoon om as dosent klas te gee aan studente in die Fakulteit Teologie.

“Kerklike akkreditering” is die amptelike erkenning deur 'n denominasie van die geskiktheid en bevoegdheid van 'n dosent om voornemende leraars akademies te begelei met die oog op die kerklike bediening in die betrokke denominasie.

Algemene Regskommissie. In die proponentseksamen val die klem op die student se algemene gereedheid en geskiktheid vir die bediening, roepingsbewustheid, persoonlike godsvrug, innerlike gehegtheid aan die leer en die aanwending van akademiese kennis in die praktyk van die bediening.

2.3.3.2.2 Die eksamenkommissie is deurlopend betrokke by die proses van opleiding ten einde te verseker dat dié opleiding beantwoord aan die behoeftes van die NG Kerk.

## **2.4 Die Raad van NG Kerk-dosente**

2.4.1 Die NG Kerk-dosente wat kerklik bevestig is en voltyds doseer, vorm die Raad van NG Kerk-dosente.

2.4.2 Die Raad van NG Kerk-dosente is, benewens doseerwerk, onder toesig van die kuratorium verantwoordelik vir die vorming van NG Kerk-studente met die oog op die bediening in die NG Kerk.

## **2.5 Kieskollege**

2.5.1 Samestelling

Die kieskollege word saamgestel soos die betrokke sinode(s) bepaal. Ander sinodes het die reg om elkeen een verteenwoordiger op eie koste te benoem.

2.5.2 Funksie

In die geval waar NG Kerk-dosente deur die universiteit aangestel word, word die moontlike beroeping van só 'n dosent deur die kieskollege hanteer. Die kieskollege is ook verantwoordelik vir die beroeping van dosente wat op eie koste deur die kerk, ná oorleg met die universiteit, beroep en besoldig word.

## **3. DOSERENDE PERSONEEL AAN DIE TEOLOGIESE FAKULTEITE WAAR NG KERK-PREDIKANTE OPGELEI WORD**

### **3.1 Aanstelling en beroeping van dosente**

Die aanstelling van dosente in die teologiese fakulteite waar predikante vir die NG Kerk opgelei word, kan op een van twee maniere geskied.

3.1.1 Die universiteit kan 'n dosent aanstel ná inspraak deur die kerk soos bepaal in die ooreenkoms tussen die betrokke universiteit en sinode(s). Die kerk kan so 'n dosent kerklik akkrediteer of beroep.

3.1.2 Die NG Kerk sou ook, ná oorleg met die betrokke universiteit, kon besluit om op sy eie 'n NG Kerk-dosent te beroep wat deur die NG Kerk besoldig word en spesifiek die NG Kerk-studente moet onderrig. In hierdie geval word die vakature ook aan die hand van 'n posbeskrywing en profiel bekendgestel in die kerk se amptelike blad. Dit kan gedoen word indien die kerk oordeel dat daar 'n leemte is in die onderrig wat sy studente ontvang.

3.1.3 Elke kuratorium kan persone versoek om aansoek te doen na aanleiding van die adverteer van 'n vakature.

### **3.2 Vereistes by beroeping**

Waar die kerk 'n dosent wat deur die universiteit aangestel is wil beroep, of waar die kerk 'n dosent op eie koste beroep, moet die persoon aan die volgende vereistes voldoen.

- 3.2.1 Predikant- of proponente se bevoegdheid besit.
- 3.2.2 Die nodige kwalifikasies vir die betrokke pos besit.
- 3.2.3 Goeie getuienis aangaande gemeente betrokkeheid, bekwaamheid en godsvrug hê.
- 3.2.4 Onbetwyfelbare voorstander van die gereformeerde leer wees.

### **3.3 Prosedure by beroeping**

- 3.3.1 Elke kuratorium neem die leiding by die beroeping van eie dosente.
- 3.3.2 Prosedure by beroeping van dosent deur universiteit aangestel
  - Indien 'n NG Kerk-dosent reeds deur die universiteit aangestel is, sal daar net een naam voor die Kieskollege wees, en word daar óf vir óf teen die dosent gestem. Normaalweg kan só 'n beroep per omsendskrywe afgehandel word.
- 3.3.3 Prosedure by beroeping van uitsluitlik kerklike besoldigde dosente
  - 3.3.3.1 Elke lid van die kieskollege het die reg om vroegtydig skriftelik 'n nominasie vir 'n vakature in te dien.
  - 3.3.3.2 By die sluitingsdatum vir nominasies suiwer die kuratorium die lys en stel 'n nominasielys op met 'n volledige *curriculum vitae* van elke kandidaat, wat aan die universiteit voorgelê word met die oog op akademiese akkreditering, waarna dit in die hande van lede van die kieskollege gestel word. Hierdie stukke dien as vertroulike inligtingstukke met die oog op die beroeping.
  - 3.3.3.3 Die kieskollege bring 'n beroep uit met inagneming dat aan die bepalinge van die betrokke sinode(s) uitvoering gegee is en die voorwaardes van die universiteit nagekom is.
  - 3.3.3.4 Beide by die beroeping soos in 3.3.2. en 3.3.3 word die naam in die amptelike kerkblad gepubliseer met die oog op approbasie deur die hele kerkverband.
  - 3.3.3.5 Proponente wat as dosente/professore na een van die drie teologiese fakulteite van die Kerk beroep en bevestig word, verkry predikantsbevoegdheid na bevestiging met handoplegging.

## **4. TEOLOGIESE OPLEIDING**

### **4.1 Toelating**

- 4.1.1 Die begeleidingskommissie roep aan die begin van die akademiese jaar alle voornemende studente wat vir die eerste keer wil inskryf om hulle vir die bediening voor te berei op om voor die kommissie te verskyn ten einde as student met die oog op die evangeliebediening toegelaat te word.
  - Advies en inligting oor kursusse, akademiese vereistes vir toelating tot die bediening en beurse/lenings word aan voornemende studente gegee.
- 4.1.2 Die toelating geskied op grond van
  - 4.1.2.1 'n Skriftelike verklaring van die kandidaat met betrekking tot die redes waarom die evangeliebediening as roeping gekies is asook sy/haar persoonlike geloof en ondervinding van die genade van God.
  - 4.1.2.2 'n Gemotiveerde skriftelike verklaring van die kerkraad aangaande die kandidaat se kerklike meelewing.
  - 4.1.2.3. 'n Onlangse vertroulike verslag van die kandidaat se leraar.



- 4.1.2.4. 'n Skriftelike verklaring dat die kandidaat se attestaat/bewys van lidmaatskap ingelewer is by die gemeente waar hy/sy lidmaat is.
- 4.1.2.5. Deurlopende skriftelike verslae aangaande mediese en sielkundige welstand, minstens twee maal tydens studie.

## **4.2 Akademiese vereistes**

- 4.2.1 Die NG Kerk vereis van sy studente 'n sesjarige opleiding in gereformeerde teologie, wat die verkryging van die gepaardgaande grade insluit. Hierdie sesjarige opleiding moet ten minste 'n tweejarige opleiding in Grieks en Hebreeus, asook 'n praktiese gemeentejaar in die laaste jaar insluit.
- 4.2.2 Die ander minimum vereistes vir toelating tot die NG Kerk word deur AKTO geformuleer vir onderhandeling deur die onderskeie eksamenkommissies met die fakulteite met die oog op die ontwerp van die akademiese programme.
- 4.2.3 Wanneer 'n kandidaat die eerste deel van sy/haar teologiese opleiding voltooi het en hom/haar daarna by Stellenbosch, Pretoria of Bloemfontein aansluit, moet sy/haar aansoek vergesel wees van 'n bewys van akademiese kwalifikasies, kerklike meeleving en 'n mediese verslag.
- 4.2.4 Die NG Kerk vereis dat persone wat toegelaat wil word tot die bediening ten minste die laaste drie jaar van die opleiding voltyds aan een van die kerklik-erkende opleidingsentra moet voltooi. In hoogs uitsonderlike gevalle kan die kuratorium diskresie toepas met verantwoording aan AKTO.

## **4.3 Vereiste kursusse**

- 4.3.1 Die inhoud van die kursus behels die volgende
  - 4.3.1.1 Ou-Testamentiese Wetenskap
  - 4.3.1.2 Nuwe-Testamentiese Wetenskap
  - 4.3.1.3 Historiese vakke en Kerkreg, insluitende Kerkgeskiedenis van die NG Kerk en Gereformeerde Kerkreg
  - 4.3.1.4 Dogmatologiese en etiese vakke/Sistematiese Teologie
  - 4.3.1.5 Godsdienst- en Sendingwetenskap/Missiologie
  - 4.3.1.6 Praktiese (amptelike) vakke/Praktiese Teologie
  - 4.3.1.7 Spesialisering in 'n bepaalde studiegebied, insluitend 'n verhandeling oor 'n gespesialiseerde onderwerp
  - 4.3.1.8 Enige ad hoc-vereistes kan by die onderskeie fakulteite gestel word
  - 4.3.1.9 Naas bogenoemde kursusse word kandidate se kennis van die Bybel en die belydenisskrifte geëksamineer en hulle taalvaardigheid in Afrikaans getoets.
- 4.3.2 Klasbywoning  
Studente is verplig om die kursusse van die betrokke teologiese fakulteit gereed by te woon en in die eksamen te slaag.

## **4.4 Praktykopleiding**

Opleiding in bedieningspraktyk geskied hoofsaaklik in die finale studiejaar. Gedurende hierdie jaar word studente opgelei en vir hierdie doel werk studente vir die volle jaar onder toesig van 'n gemeenteleraar. Die inhoud van die gemeentejaar sowel as die

aanwysing van gemeentes en begeleiers (supervisors) word deur die fakulteit ná oorlegpleging met die betrokke kuratorium bepaal.

#### **4.5 Proefpreke**

Van elke student in die finale jaar word verwag om 'n proefpreek vóór 30 Augustus onder toesig van 'n dosent in 'n gemeente te lewer.

#### **4.6 Praktiese werk**

Teologiese studente moet die volgende onderneming onderteken voordat hulle praktiese werk in gemeentes mag doen:

Ek, die ondergetekende, onderskryf hiermee opreg en as voor die Here die leer soos vervat in die Formulare van Eenheid van die gereformeerde kerke, naamlik die sewe en dertig artikels van die Nederlandse Geloofsbelijdenis, die Heidelbergse Kategismus en die Dordtse Leerreëls. Ek verklaar met my hele hart dat ek dit aanvaar en bely as in ooreenstemming met die Woord van God; dat ek die leer getrou sal handhaaf; dat ek my op die bevordering van godsdienskennis, Christelike sedes, orde en eendrag met alle ywer sal toelê; en ek verbind my om, sou dit bevind word dat ek teen enige gedeelte van hierdie verklaring en belofte gehandel het, my aan die uitsprake van die bevoegde kerkvergadering te onderwerp.

### **5. TOELATING TOT DIE EVANGELIEBEDIENING**

Die eksamenkommissie ondersoek kandidate met die oog op toelating tot die evangeliebediening volgens onderstaande prosedures en vereistes.

#### **5.1 Proponentseksamen**

##### **5.1.1 Tyd van eksamen**

Die proponentseksamen word aan die einde van die teologiese studie afgeneem. As tegemoetkoming aan studente kan die eksamen op 'n buitengewone tyd afgeneem word, indien die kuratorium dit nodig ag.

##### **5.1.2 Omvang van proponentseksamen**

5.1.2.1 Die proponentseksamen bestaan uit 'n ondersoek na die akademiese kennis en bedieningsvaardighede van die studente en word deur die eksamenkommissie van die kuratoria afgeneem.

5.1.2.2 Die ondersoek na die bedieningsvaardigheid word deur die eksamenkommissie gedoen met die oog op die volgende:

5.1.2.2.1 die geskiktheid van die kandidaat om die Kerk ooreenkomstig die Skrif en die Belydenis te dien en sy/haar innerlike gehegtheid aan die leer van die Kerk;

5.1.2.2.2 sy/haar beweegredes om bedienaar van die Woord te word en sy/haar persoonlike godsvrug (soos onder meer verwoord in die Profiel van die Afgestudeerde student);

5.1.2.2.3 sy/haar bekwaamheid in die beoefening van die predikking, ook deur mondelinge voordrag wat, indien moontlik, voor 'n lid van die eksamenkommissie gelewer is. Met die oog hierop moet 'n voorgeskrewe proefpreek 'n maand voor die eksamen ingelewer word;

5.1.2.2.4 sy/haar bekwaamheid in die beoefening van pastorale sorg, waarvoor die eksamenkommissie insae het in die vertroulike verslag van die leraar(s) onder wie die student sy/haar praktiese werk in 'n gemeente gedoen het.

5.1.2.2.5 Verder word die geskiktheid van die kandidaat in 'n samespreking tussen die eksamenkommissie en die raad van NG Kerk-dosente bespreek. Die raad van NG Kerk-dosente bevestig skriftelik dat die kandidaat die voorgeskrewe kursusse met vrug gevolg het en die eksamen suksesvol afgelê het; dat onder toesig van 'n diensdoende leraar van die Kerk ondervinding opgedoen het van die vereiste praktiese aspekte van die gemeentelike bediening; dat onder die toesig van een van die dosente 'n proefpreek gelewer is en dat die kandidaat se gedrag onbesproke is.

### 5.1.3 **Bykomende vereistes**

5.1.3.1 'n Verklaring van die kerkraad waar die kandidaat sy/haar gemeentejaar doen aangaande kerklike meelewing, die suiwerheid van sy/haar leer, getrouheid, voorbeeldigheid van lewenswandel en die onbesprokenheid van gedrag.

5.1.3.2 'n Mediese sertifikaat op 'n voorgeskrewe vorm ten opsigte van goeie gesondheid. Bostaande stukke moet een maand voor die eksamen by die skriba van die Eksamenkommissie ingelewer wees. Die skriba lê by die aanvang van die eksamen die stukke aan die eksamenkommissie voor.

5.1.3.3 Bewys van deurlopende sielkundige evaluering soos deur die kuratorium bepaal.

### 5.1.4 **Stemming**

Oor die aanbeveling van die kandidaat vir die formele legitimasie word deur 'n volstreekte meerderheid van stemme met geslote stembriefies beslis. Die eksamenkommissie beveel die kandidate wat in die ondersoek geslaag het by die kuratorium aan vir sy beslissing. Die kuratorium lê die name van die toegelate kandidate aan die Algemene Regskommissie vir legitimasie voor.

### 5.1.5 **Afwysing van 'n kandidaat**

'n Kandidaat wat afgewys is, kan volgens die diskresie van die kuratorium weer op 'n tyd deur die kommissie bepaal, tot die eksamen toegelaat word.

## 5.2 ***Colloquium Doctum* (KO Artikel 5.5.2)**

### 5.2.1 **Vereistes vir toelating**

5.2.1.1 bewys van goeie sedelike gedrag deur middel van 'n getuigskrif uitgereik deur 'n bevoegde instansie;

5.2.1.2 bewys dat hy/sy 'n volledige teologiese kursus gelykstaande aan die sesjarige teologiese opleiding aan 'n teologiese opleidingsinrigting wat deur die NG Kerk erken word, voltooi het;

5.2.1.3 bewys dat hy/sy deur die betrokke sinode/sinodale kommissie ondersoek is met betrekking tot sy persoonlike geloofsekerheid, persoonlike ondervinding van die genade van God, roepingsbewustheid en geskiktheid vir die evangeliebediening.

5.2.1.4 Die kuratorium verwys alle persone wat vir *colloquium doctum* aanmeld, vooraf vir persoonlikheidsvaluering.

## 5.2.2 **Inhoud van *colloquium doctum***

5.2.2.1 Die *colloquium doctum* is 'n toets van die kandidaat se wetenskaplike bekwaamheid, asook sy/haar kennis van die Gereformeerde teologie en sy/haar gehegtheid aan die leer van die Kerk. Dié ondersoek kan mondeling of skriftelik afgeneem word.

5.2.2.2 Elke eksamenkommissie moet 'n voorgeskrewe bestek aan kandidate vir *colloquium doctum* voorsien, sodat die leergehegtheid en die kennisvaardigheid van die kandidate onder andere aan die hand daarvan getoets kan word.

## 5.2.3 **Afwysing by die *colloquium doctum***

Indien iemand by die *colloquium doctum* deur die betrokke eksamenkommissie afgewys word, mag hy/sy hom/haar na ses maande weer aanmeld vir herondersoek.

## 5.2.4 **Aanbeveling vir legitimasie**

Nadat *colloquium doctum* tot bevrediging van die eksamenkommissie afgelê is, word die kandidaat by die kuratorium vir sy/haar beslissing aanbeveel. Die kuratorium lê die naam van die kandidaat aan die Algemene Regskommissie voor vir legitimasie.

## 5.3 **Legitimasie**

5.3.1 Die Algemene Regskommissie behartig die legitimasie van goedgekeurde kandidate (KO Artikel 6). Hierdie kommissie sien toe dat die legitimasieverklaring afgelê en onderteken word.

## 5.3.2 **Plegtige toelating**

Die geëksamineerde word met 'n gepaste woord deur die aktuaris van die Algemene Sinode of 'n lid van die Algemene Regskommissie tot die evangeliebediening toegelaat. In die reël geskied dit by geleentheid van 'n openbare kerklike byeenkoms wat vir die doel as afsluiting van die jaar se werksaamhede in oorleg met die kuratorium gereël is. 'n Akte van Legitimasie namens die Algemene Sinode, onderteken deur twee lede van die Regskommissie, word aan hom/haar uitgereik. Die gelegitimeerde kry die bevoegdheid van proponent.

## 5.3.3 **Kennisgewing in die amptelike blad**

Van sy/haar legitimasie word in die amptelike blad van die Kerk kennis gegee.

## 5.3.4 **Die bevoegdhe van 'n proponent**

Die bevoegdheid van 'n proponent word gereël deur die reglement vir die bevoegdheid van predikante en proponente van die Algemene Sinode. (Kyk Reglement 3: 3).

## 5.3.5 **Studente wat in die buiteland studeer het**

Studente van die NG Kerk wat in die buiteland studeer het, moet ook die proponentseksamen aflê voordat hulle gelegitimeer kan word.

## 5.3.6 **Eise vir legitimasie van predikante of proponente uit ander kerke**

'n Predikant van 'n ander kerk wat begeer om tot die bediening in die NG Kerk toegelaat te word, dien skriftelik 'n gemotiveerde aansoek in by die kuratorium van een van die teologiese fakulteite waar predikante vir die NG Kerk opgelei word. Hierdie aansoek moet vergesel wees van die getuienis van die ring van die NG Kerk binne wie se grense hierdie persoon as predikant in die bediening is, of woon (indien nie meer in die aktiewe bediening nie) en/ of van die kerk of gemeente van waaruit hy kom. Die kuratorium bepaal watter aanvullende opleiding nodig is, indien enige. Lidmaatskap van 'n gemeente van die NG Kerk word vereis voor enige verdere handeling. In die geval van aanvullende opleiding word so 'n persoon normaalweg saam met ander

studente en na suksesvolle voltooiing van die vereiste studie gelegitimeer. Indien geen verdere aanvullende opleiding vereis word nie, word die persoon na *colloquium doctum* op die gebruikelike wyse gelegitimeer.

### 5.3.7 **Persone uit inrigtings van erkende kerke**

'n Persoon wat 'n volledige of gedeeltelike teologiese opleiding aan inrigtings van erkende kerke gevolg het, en wat na die eise van lidmaatskap van 'n gemeente van die NG Kerk gehandel het, word deur die kuratorium in oorleg met die raad van NG Kerkdosente aanbeveel nadat bewys gelewer is dat die opleiding van die betrokke kandidaat beantwoord aan vereistes wat gelykstaande is aan die standaard van opleiding van die NG Kerk. 'n Sodanige aansoeker word dan toegelaat om die deel van die opleiding wat nog ontbreek, aan te vul om te voldoen aan die vereistes van 'n volledige kursus en mag, na aflegging van die proponentseksamen (gewysig volgens die bepaalde omstandighede) gelegitimeer word.

### 5.3.8 **Persone uit inrigtings van nie-erkende kerke**

Van persone wat 'n volledige of gedeeltelike teologiese opleiding aan inrigtings van nie-erkende kerke gevolg het, word vermag om die vereiste teologiese studie aan een van die fakulteite waar predikante van die NG Kerk opgelei word, te voltooi.

### 5.3.9 **Persone uit nie-kerklike inrigtings of fakulteite**

'n Persoon wat sy teologiese opleiding geheel of gedeeltelik aan 'n inrigting/fakulteit wat nie aan die Kerk verbind is nie en waar die NG Kerk geen inspraak by die aanstelling van dosente of by die keuring, toetsing, dissipline, opleiding en begeleiding van studente het nie, moet die vereiste teologiese kursus aan een van die teologiese fakulteite waar predikante van die NG Kerk opgelei word, voltooi alvorens hy/sy gelegitimeer kan word.

## 6. **BYKOMENDE SINODALE BEPALINGE**

Die betrokke sinode(s) wat kerklike beheer oor die teologiese opleiding uitoefen, kan na gelang van plaaslike omstandighede en verhoudinge met die universiteite verdere bepalinge neerlê, op voorwaarde dat dit nie in stryd is met die besluite van die Algemene Sinode soos in hierdie Reglement vervat nie.

## 7. **PLEGTIGE LEGITIMASIE-VERKLARING DIE NEDERDUITSE GEREFORMEERDE KERK**

Ek, die ondergetekende, ....., oortuig van my roeping deur die Here en toegelaat tot die openbare bediening van die Woord in die Nederduitse Gereformeerde Kerk, verklaar hiermee voor die Here

1. dat ek glo dat die leer soos vervat in die drie algemene belydenisskrifte en die drie Formuliere van Eenheid - naamlik die Nederlandse Geloofsbelijdenis (Confessio Belgica), die Heidelbergse Kategismus en die Dordtse Leerreëls, ooreenkom met die Woord van God;
2. dat ek hierdie leer getrou sal verkondig en uitleef;
3. dat ek alle dwalinge wat met hierdie leer in stryd is, sal weerlê en alles in my vermoë sal doen om dit uit die Kerk te weer;
4. dat, indien ek later enige beswaar of ander insig oor die leer ontwikkel, ek dit nie sal leer of bevorder voordat ek dit aan 'n bevoegde kerkvergadering vir 'n beslissing voorgelê het nie;

5. dat ek my aan die orde van die NG Kerk sal hou;
6. dat ek, om beroep te word, volgens die Kerkorde en besluite van die Nederduitse Gereformeerde Kerk sal optree;
7. dat ek my op die uitbreiding van die Koninkryk van God sal toelê deur die bevordering van die kennis van, vertrouwe in en gehoorsaamheid aan die Drie-enige God;
8. dat ek myself verbind tot voortgesette teologiese opleiding.

Ek verbind my deur my handtekening tot al die voormelde.

\_\_\_\_\_

Geteken te \_\_\_\_\_ op hierdie \_\_\_\_\_ dag  
van 20\_\_\_\_\_

Geteken in my teenwoordigheid: \_\_\_\_\_

(Namens die Algemene Regskommissie)

## **8. VOORTGESETTE TEOLOGIESE OPLEIDING (VTO)**

- 8.1 Die kommissie wat voortgesette teologiese opleiding koördineer en die Algemene Sinode ten opsigte van Beleid adviseer, is AKTO.
- 8.2 Op grond van die besluite van die Algemene Sinode is dit onontbeerlik vir alle predikante om gereeld kursusse en programme in voortgesette teologiese opleiding te volg.
- 8.3 Elke kuratorium sien toe dat voortgesette teologiese opleiding tot bevrediging van die kerk aangebied word.
- 8.4 'n Verteenwoordiger van die VTO-Forum dien in AKTO.

## **15. REGLEMENT VAN ORDE**

### **1. OPENING EN KONSTITUERING**

- 1.1 Die afgevaardigdes kom byeen op die plek en tyd soos vooraf bepaal. Die afgevaardigde leraar met die langste diens, wat die oudste in jare is, soos vooraf deur die Kommissie vir die Agenda (AKAG) aangewys, gaan voor in Skriflesing, gebed en konstituering, en tree as waarnemende voorsitter op totdat die vergadering sy eie voorsitter verkies het. By 'n buitengewone Algemene Sinode tree die voorsitter van die Algemene Sinodale Kommissie op as voorsitter.
- 1.2 Die geloofsbriewe van afgevaardigdes moet minstens drie maande voor die aanvang van die vergadering in die hande van die skriba van die Algemene Sinode wees, wat dit tesame met wysigings, wat tot voor die vergadering ingedien is, vir goedkeuring ter tafel lê. By 'n buitengewone Algemene Sinode word geloofsbriewe en verslae ingedien soos deur die Algemene Sinodale Kommissie bepaal en dien alleen die sake waarvoor die buitengewone Algemene Sinode byeengeroep is.
- 1.3 Die vergadering word deur die voorsitter as wettig gekonstitueer verklaar uit die afgevaardigdes wie se geloofsbriewe ingedien is. Die meerderheid van die afgevaardigdes na die vergadering ingevolge Artikel 38.1 van die Kerkorde, vorm 'n kworum.
- 1.4 Nadat die vergadering gekonstitueer is, word kragtens Artikel 39, ooreenkomstig die reglement van orde en onder leiding van die waarnemende voorsitter genoem in 1.1.1 hierbo, eers 'n moderator verkies (wat die leiding van die vergadering oorneem), daarna 'n assessor (wat as voorsitter optree wanneer die voorsitter afwesig is, hom/haar daartoe versoek of in die vergadering 'n spreekbeurt waarneem)'n aktuaris, 'n skriba en 'n assistent-skriba. Daar word dadelik tot stemming oorgegaan, sonder dat vooraf 'n nominasielys gevorm word. Die opneem en tel van die stemme word aan 'n kommissie opgedra wat vooraf deur die Kommissie vir die Agenda benoem is.
- 1.4.1 Die moderatuur van die Algemene Sinode bestaan uit 'n moderator, 'n assessor, 'n aktuaris en 'n skriba.
- 1.4.2 Dieselfde persoon mag nie by twee agtereenvolgende vergaderings as moderator verkies word nie. Hy/Sy mag wel in een van die ander poste in die moderatuur verkies word.
- 1.4.3 Dieselfde persoon mag nie by twee agtereenvolgende vergaderings as assessor verkies word nie. Hy/Sy mag wel in een van die ander poste in die moderatuur verkies word.
- 1.5 'n Vergadering van Algemene Sinode word met oop deure gehou, tensy die betrokke vergadering anders besluit.
- 1.6 Elke sittingsdag word deur die voorsitter, of deur 'n lid daartoe versoek, met gebed geopen en gesluit.
- 1.7 'n Kerkvergadering is slegs wettig wanneer meer as die helfte van die lede teenwoordig is. Die lede van 'n kerkvergadering is verplig om die vergadering by te woon en, indien hulle verhinder word, daarvan kennis te gee. Geen lid mag sonder verlof van die voorsitter 'n vergadering verlaat nie.

### **2. STEMMING**

- 2.1 Elke lid van 'n vergadering moet stem. Vir 'n beslissing word 'n volstreekte meerderheid van stemme van die aanwesige lede vereis, behalwe in die gevalle waar die Kerkorde 'n tweederdemeerderheid vereis (Artikel 44.1, 44.2 en 70.4). Persone wat die vergadering in adviserende hoedanigheid bywoon, mag aan die bespreking deelneem, maar nie stem nie.
- 2.2 Wanneer daar vir persone gestem word, geskied dit op geslote stemwyse soos volg:
  - 2.2.1 Eers word 'n nominasielys gevorm. Daarvoor plaas elke stemgeregtigde nie meer name op die stembriefie as die getal persone wat gekies moet word nie.
  - 2.2.2 Uit die name in die nominasielys stem elke stemgeregtigde vir soveel name as die getal persone wat gekies moet word.
  - 2.2.3 Die persoon op wie die meeste stemme verenig word, is gekies indien die getal stemme op hom/haar uitgebring die volstreekte meerderheid van die aanwesige lede uitmaak.
  - 2.2.4 Indien een of meer van die vereiste aantal nie die volstreekte meerderheid van stemme van die aanwesige lede op hom/haar of hulle verenig nie, vind daar 'n nuwe stemming plaas uit die name wat die hoogste getal stemme gekry het en saam 'n volstreekte meerderheid vorm.
  - 2.2.5 Indien 'n gelyke getal stemme op twee of meer name op die stemlys uitgebring is op so 'n wyse dat daardeur meer name verkry is as wat vereis word, word deur die lot die benodigde getal gevind.
- 2.3 Oor omstrede sake kan daar ook op 'n geslote stemwyse gestem word.
- 2.4 Dit staan 'n lid vry om met of sonder opgaaf van redes te laat aanteken dat hy/sy met 'n besluit wat geneem is nie instem of dat hy/sy nie teenwoordig was toe die besluit geneem is nie.
- 2.5 Die stemming verloop soos volg:
  - 2.5.1 Oor alle sake, wat nie algemene instemming ontvang nie, word daar gestem óf deur opsteek van hande, óf in die geval van kontensieuse sake op 'n geslote stemwyse indien die voorsitter so reël. Die meerderheid van stemme bepaal die besluit.
  - 2.5.2 In die geval van voorstelle en amendemente, word die amendemente eers tot stemming gebring in opgaande orde vanaf die laaste wat ingedien is en daarna die voorstel soos deur die aanvaarde amendemente gewysig. Slegs indien al die amendemente verwerp word, stem die vergadering oor die oorspronklike voorstel.
  - 2.5.3 Na elke stemming oor 'n amendement of 'n voorstel word die uitslag van die stemming aangekondig – nie noodwendig die getal nie, maar of dit aanvaar of verwerp is.
  - 2.5.4 Persone wat die vergadering in adviserende hoedanigheid bywoon, mag aan die bespreking deelneem, maar nie stem nie.

### **3. BEHANDELING VAN SAKE**

- 3.1 Die Kommissie vir die Agenda word saamgestel uit die moderatuur van die vorige Algemene Sinode, asook die moderatuur en saakgelastigde van die sinode deur die Algemene Sinodale Kommissie as gasheer vir die Algemene Sinode aangewys. Die Kommissie vir die Agenda stel die agenda vir die vergadering op en dra sorg dat dit, indien enigsins moontlik, ses weke voor die vergadering in die hande van die afgevaardigdes gestel word. Aan alle diensdoende predikante van die NG Kerk, sowel as amptenare en belanghebbende instansies, word die agenda voor en die acta ná die sitting van die Algemene Sinode gestuur.



- 3.2 Die verslag van die Kommissie vir die Agenda word eerste in behandeling geneem.
- 3.3 Die skriba van die Kommissie vir die Agenda maak aantekeninge van sake wat op meer as een plek in die agenda voorkom en stel hierdie aantekeninge tot beskikking van die voorsitter van die Algemene Sinode.
- 3.4 By die behandeling van sake neem die voorsitter die orde in ag wat vir hom/haar die geskikste voorkom. Hy/Sy dra die sake wat behandel moet word, duidelik voor, gee by die behandeling die nodige inligting en kan, as die saak dit vereis, wenke aan die hand doen om die vergadering te help om tot 'n beslissing te kom, en bring sy/haar stem gelyktydig uit saam met die ander lede.
- 3.5 Die voorsitter stel hom/haar ten doel om 'n saak wat op meer as een plek in die agenda voorkom, die saak op die mees sinvolle plek in behandeling te neem en, indien enigsins moontlik, finaal af te handel.
  - 3.5.1 Waar dieselfde saak elders voorkom, word slegs die opskrif aangegee en deur middel van die betrokke bladsyverwysing aangedui dat dit reeds afgehandel is.
  - 3.5.2 Die voorsitter het nie 'n beslissende stem nie.
- 3.6 Die voorsitter dra die sake wat behandel moet word duidelik voor en gee by die behandeling daarvan die nodige inligting. As die geleentheid dit vereis, mag hy/sy wenke aan die hand doen om die vergadering te help om tot 'n besluit te kom.
- 3.7 In gevalle wat op die orde van die vergadering betrekking het en waarvoor geen voorsiening in hierdie reglement gemaak word nie, handel die voorsitter volgens gebruik en eie oordeel. As enige lid teen hierdie handelswyse beswaar het, word dit aan die oordeel van die vergadering onderwerp.
- 3.8 Elke lid van 'n vergadering moet by deelname aan die bespreking die voorsitter aanspreek.
  - 3.8.1 By die behandeling van sake is elke lid op 'n spreekbeurt geregtig tensy die vergadering anders besluit. Niemand mag buite sy/haar beurt of anders as met verlof van die voorsitter praat nie. As twee of meer lede gelyk opstaan, beslis die voorsitter wie die eerste aan die beurt kom.
  - 3.8.2 Geen lid van die vergadering is geregtig op meer as een spreekbeurt oor dieselfde saak nie, behalwe wanneer hy/sy die aandag van die voorsitter wil vestig op 'n afwyking van die reglement van orde, óf met die verlof van die vergadering óf om as voorsteller repliek te lewer.
- 3.9 Die voorsitter het die reg om, wanneer na sy/haar oordeel die saak onder behandeling genoegsaam bespreek is, dit aan die vergadering te stel of laasgenoemde nie tot stemming wil oorgaan nie.

#### **4. VOORSTEL**

- 4.1 Die voorstel en die amendement(e) moet skriftelik ingedien en deur die voorsteller en die sekondant geteken word. Aanbevelings van 'n permanente of 'n tydelike kommissie word as voorstelle aan die vergadering beskou. Indien 'n tydelike kommissie 'n aanbeveling doen wat 'n aanbeveling van 'n permanente kommissie raak, het die permanente kommissie die voorstel en moet die tydelike kommissie amendeer. Indien meer as een permanente kommissie 'n voorstel oor dieselfde saak voor die vergadering het, reël die voorsitter watter een die voorstel is.
- 4.2 Geen spreekbeurt mag aangevra word, of voorstel of amendement deur die voorsitter ontvang word, voordat hy die saak aan die orde stel nie. Die voorsitter behoort reg aan

die begin van die vergadering, voordat die eerste verslag aan die orde gestel word, dit baie duidelik as 'n vaste reëling aan te kondig dat geen spreekbeurt aangevra mag word alvorens 'n saak aan die orde gestel is nie. Die reëling moet konsekwent gehandhaaf word.

- 4.3 'n Voorstel of amendement wat reeds ter tafel is, mag nie sonder die verlot van die vergadering teruggetrek word nie.
- 4.4 Die inleier van 'n beskrywingspunt of die indiener van 'n voorstel word beperk tot 8 minute, met 5 minute tyd vir repliek, en ander sprekers tot 5 minute. Die vergadering mag in bepaalde gevalle van hierdie tydsbeperking afsien.
- 4.5 In die geval van voorstelle en amendemente, word die amendemente eers tot stemming gebring in opgaande orde vanaf die laaste wat ingedien is, en daarna die voorstel soos deur die aanvaarde amendemente gewysig. Na elke stemming kondig die voorsitter die uitslag aan.

## **5. MOSIE VAN ORDE**

- 5.1 'n Mosie van orde is 'n voorstel wat betrekking het op:
  - 5.1.1 die volgorde waarin sake ter tafel moet kom,
  - 5.1.2 of dat die bespreking van 'n bepaalde saak opgeskort
  - 5.1.3 of beëindig word of verwys word,
  - 5.1.4 of dat van 'n bepaalde saak afgestap word.
- 5.2 'n Ordemosie kan op enige tydstip gedurende die voortgang van die bespreking ingedien word. Daarvoor word dadelik sonder bespreking gestem. Dit word egter aan die oordeel van die voorsitter oorgelaat om die mosie terug te hou as hy/sy van mening is dat dit aangewend word om 'n behoorlike bespreking van die onderwerp te voorkom.

## **6. VERSLAE EN BESKRYWINGSPUNTE**

- 6.1 Alleen 'n sinode, of sy sinodale kommissie of sy moderatuur/dagbestuur, permanente kommissies van die Algemene Sinode, en die kuratoria oor die beleid ingevolge KO Artikel 5.2, mag beskrywingspunte en sake vir behandeling indien.
- 6.2 Beskrywingspunte en sake vir behandeling is alleen ontvanklik as dit in ooreenstemming met KO Artikel 43 is en minstens drie maande voor die vergadering in die hande van die skriba is.
- 6.3 Spoedeisende sake mag deur die vergadering in behandeling geneem word indien die vergadering daartoe besluit na raadpleging en aanbeveling van die moderatuur.
- 6.4 Verslae van kommissies moet minstens 4 maande voor die vergadering in die hande van die skriba wees (vgl ook 1.2 hierbo).
- 6.5 Dringende sake wat in die vier-maande-tydperk voor die vergadering voorkom en deur kommissies behandel is, mag by wyse van addendumverslae, met verlot van die Kommissie vir die Agenda, ter tafel gelê word.
- 6.6 Die Kommissie vir die Agenda het die bevoegdheid om verslae deur die kommissies ingedien, te laat verkort indien dit onnodig lank is.
- 6.7 Aanbevelings van permanente kommissies wat wysigings aan die Kerkorde en reglemente behels, word in die agenda gemerk: Vir die aandag van die Tydelike Regskommissie. Hierdie voorstelle word dan voor die Sinode deur die Tydelike Regskommissie nagegaan vir kerkregtelik, bevredigende formuleringe sonder uitspraak

oor die beginsel van die kommissievoorstel. Tydens die behandeling van die betrokke punt in die permanente kommissie se verslag lewer die Tydelike Regskommissie onmiddellik advies oor die formele aspekte.

## **7. KOMMISSIES**

- 7.1 Tydelike kommissies, soos deur die Kommissie vir die Agenda aangewys, mag voor die aanvang van die Sinode met hulle werksaamhede begin.
- 7.2 Die benoeming van tydelike kommissies gedurende die sitting van die Algemene Sinode word op voordrag van die moderatuur, deur die vergadering met opsteek van hande gedoen.
- 7.3 Predikante/amptenare in diens van die sinodes en van die Algemene Sinode, het sitting met adviserende stem in die betrokke tydelike kommissie, mits hulle magtiging verkry het van die kommissie in wie se diens hulle staan. Ter wille van kostebesparing dien slegs een predikant in sinodale diens per sinode in die betrokke tydelike kommissie. Indien 'n sinode nog iemand wil stuur, moet toestemming van sy kommissie verkry word wat ook die koste dra. Sodanige adviseurs kan nie voorsitters of skribas van tydelike kommissies wees nie.
- 7.4 Amptenare/predikante in algemene sinodale diens wat afgevaardigdes na die sinode is, het 'n keurstem in hul betrokke tydelike kommissie. Hierdie persone kan ook voorsitters of skribas van tydelike kommissies wees.
- 7.5 Beskrywingspunte wat betyds ontvang word, word deur die skriba van die Algemene Sinodale Kommissie na permanente kommissies verwys vir verslag aan die Algemene Sinode. Ander beskrywingspunte word deur tydelike kommissies hanteer. Insenders van beskrywingspunte mag dit by die kommissies toelig.
- 7.6 Tydelike kommissies maak nie aanbevelings oor die verslae van permanente kommissies nie, tensy daar 'n beskrywingspunt oor dieselfde saak is wat nuwe aspekte na vore bring, of wanneer 'n saak deur die sinode na hulle verwys is.
- 7.7 Tydelike kommissies moet so ver moontlik uit die lede van die ooreenstemmende permanente kommissie bestaan.
- 7.8 Permanente kommissies, en waar nodig *ad hoc*-kommissies, word deur die vergadering met die opsteek van hande benoem op voordrag van 'n tydelike kommissie vir kommissies waarin die assessor van die Algemene Sinode tesame met die assessors van die sinodes en skribas van aftredende kommissies dien.
- 7.9 Die Algemene Sinode wys vir elkeen van sy permanente kommissies en vir elke *ad hoc*-kommissie 'n sameroeper aan, wat dan die betrokke kommissie vir sy eerste vergadering vir konstituering en werksaamhede byeenroep. Hierdie sameroeper tree op as voorsitter totdat die vergadering gekonstitueer is en die ampsdraers gekies is.
- 7.10 Die Algemene Sinode kan van enige lidmaat gebruik maak om in 'n kommissie te dien.
- 7.11 Vakatures in kommissies wat tussen sinodes ontstaan, word aangevul deur die sinode of instansie waaruit die verteenwoordiger moet kom. Die sinode/sinodale kommissie of ander instansie gee kennis van die benoeming aan die skriba van die Algemene Sinodale Kommissie en aan die skriba van die betrokke kommissie.

## **8. NADAT BESLUIE GENEEM IS**

- 8.1 Dit staan elke lid van die vergadering vry om sonder opgaaf van redes te laat aanteken dat hy/sy in die minderheid gestem het, of dat hy/sy nie teenwoordig was toe die besluit geneem is nie.
- 8.2 Besluite wat eenmaal geneem is, mag alleen na voorafgaande kennisgewing en met die toestemming van die vergadering op 'n tyd deur die moderatuur bepaal, in revisie geneem word.
- 8.3 Kennisgewing van revisie
  - 8.3.1 Revisie kan toegestaan word indien oortuigend aangevoer word dat
  - 8.3.1.1 in die bespreking van die saak waarom dit gaan in die vergadering aan sekere aspekte daarvan glad nie of nie voldoende aandag gegee is nie;
  - 8.3.1.2 daar later inligting na vore gekom het wat hersiening van die besluit noodsaaklik maak.
  - 8.3.2 Elke kennisgewing van revisie word na die Tydelike Regskommissie verwys.
  - 8.3.3 Die aansoeker stel sy/haar redes vir die aansoek om revisie aan die Tydelike Regskommissie.
  - 8.3.4 Die Tydelike Regskommissie doen 'n aanbeveling ten opsigte van elke kennisgewing van revisie aan die sinode.

## **9. NOTULE**

- 9.1 Voorstelle word woordeliks genotuleer.
- 9.2 Die voorstelle en amendemente wat deur lede ingedien word, ook die wat nie aanvaar word nie, word in die notule opgeneem.
- 9.3 Die notule van elke sittingsdag word deur 'n notulekommissie versorg en op die volgende sittingsdag deur die vergadering goedgekeur en deur die moderatuur onderteken.
- 9.4 Die notule van die laaste sitting word deur die notulekommissie geredigeer en deur die dagbestuur van die Algemene Sinodale Kommissie goedgekeur en onderteken.

## **10. TOT WIE DIE ALGEMENE SINODE HOM RIG**

- 10.1 Indien die Algemene Sinode beleidsbesluite neem, is hy bevoeg om die Kerk in sy geheel aan te spreek, dit wil sê mindere kerkvergaderings, ampsdraers en lidmate.
- 10.2 Indien die Algemene Sinode beleidsbesluite neem wat opgevolg of in die praktyk uitgevoer moet word, werk hy deur die kanaal van konstituerende sinodes.

## **11. SLUITING**

Die vergadering word met Skriflesing en gebed deur die moderator of iemand deur hom/haar daartoe versoek, afgesluit.

## **16. REGLEMENT VIR DIE ALGEMENE REGSKOMMISSIE (ARK)**

### **1. NAAM**

Algemene Regskommissie (ARK).

### **2. SAMESTELLING**

- 2.1 Die aktuaris van die Algemene Sinode;
- 2.2 Die aktuarii of die aangewese verteenwoordigers van die sinodes (met sekundi);
- 2.3 Een NG Kerk dosent in Kerkreg uit elk van die fakulteite vir teologie van Stellenbosch, Pretoria en Bloemfontein.

### **3. OPDRAG**

Die Kommissie

- 3.1 adviseer die Algemene Sinode in verband met sake ten opsigte van die Kerkorde en reglemente;
- 3.2 dra sorg vir navorsing, inligting en voorligting op die terrein van die kerkreg;
- 3.3 behartig die toelating (legitimاسie) van teologiese studente tot die bediening van die Woord;
- 3.4 besluit oor aansoeke om behoud van bevoegdheid van bedienaars van die Woord met verslag aan die Algemene Sinode (vgl Reglement 3: 10).
- 3.5 tree op as appélkommissie van die Algemene Sinode (vgl. KO Art. 23 en Besluite by Art. 23 23b 5) en wys uit sy geledere so 'n kommissie aan om die appél aan te hoor;
- 3.6 hanteer die verlening of verlies van ampsbevoegdheid namens die Algemene Sinode (vgl. KO Art. 12.3);
- 3.7 beslis, na oorweging van 'n aanbeveling van 'n kerkvergadering of 'n predikant/proponent se reg om beroep te word, opgeskort moet word (vgl. KO Art. 64.5.4.2) of dat sy/haar ampsbevoegdheid beëindig moet word (vergelyk art. 64.5.4.3). Persone wat geraak word deur die aanbevelings van tugvergaderings wat betref die opskorting/verlies van hulle ampsbevoegdheid, kan hulle by wyse van skriftelike versoë tot die ARK rig voordat die ARK 'n besluit neem.

### **4. KONSTITUERING EN VERGADERINGS**

- 4.1 Die Kommissie konstitueer tydens die vergadering van die Algemene Sinode en vergader hoogstens een maal per jaar;
- 4.2 By die konstituering word 'n dagbestuur saamgestel, bestaande uit die voorsitter, ondervoorsitter, skriba en die skriba bevoegdheidsregister.

## **17. REGLEMENT VIR DIE ALGEMENE SINODALE KOMMISSIE VIR GETUIENIS (ASKG)**

### **1. NAAM**

Algemene Sinodale Kommissie vir Getuienis (ASKG).

### **2. SAMESTELLING**

- 2.1 Een lid (met sekundus) uit elkeen van die sinodes, verkieslik die voorsitter, ondervoorsitter of skriba van die betrokke sinode se ooreenstemmende kommissie;
- 2.2 Predikante in diens van sinodes met opdrag sending/getuienis.
- 2.3 Die predikant(e) in diens van die Algemene Sinode met opdrag Getuienis/Sending (indien sodanige pos[te] bestaan);
- 2.4 Een verteenwoordiger van elk van die teologiese fakulteite waar predikante vir die NG Kerk opgelei word;
- 2.5 Een verteenwoordiger van die Algemene Kommissie vir Vrouelidmate.
- 2.6 Deskundiges beperk tot 'n maksimum van drie gekoöpteerde persone vir die Kommissie sowel as drie vir elk van die subkommissies.

### **3. OPDRAG**

Die Kommissie

- 3.1 adviseer die Algemene Sinode in verband met die beleid wat gevolg moet word ten opsigte van sending;
- 3.2 dra sorg vir navorsing, beplanning, inligting, voorligting en statistiek oor sending;
- 3.3 skakel met ander lidkerke van die NG Kerkfamilie in verband met gesamentlike sending;
- 3.4 skakel met ander sendinginstansies in verband met gesamentlike sending.

### **4. KONSTITUERING EN VERGADERINGS**

- 4.1 Die Kommissie konstitueer en vergader hoogstens drie maal tussen twee vergaderings van die Algemene Sinode.
- 4.2 By die konstituering word 'n dagbestuur saamgestel, bestaande uit die voorsitter, ondervoorsitter en skriba.
- 4.3 Die Kommissie benoem subkommissies volgens behoefte.

# 18. REGLEMENT VIR DIE SENDING/GETUIENIS VAN DIE NG KERK

## 1. DEFINISIE

1.1 Sending is die heilshandeling van die drie-enige God, Vader, Seun en Heilige Gees met die wêreld, waardeur Hy uit die ganse menslike geslag vir Hom 'n gemeente deur sy Woord en Gees vergader.

Deur dié gemeente

- \* laat God sy Woord aan die gevalle wêreld verkondig,
- \* bring Hy die gemeenskap van die heiliges uit alle nasies tot stand,
- \* laat Hy diens aan die wêreld in nood lewer,
- \* laat Hy sy opdrag om die skepping te bewaar en te bewerk sigbaar tot uitdrukking kom;
- \* en word sy geregtigheid aan die samelewing en die wêreld verkondig.

So laat Hy sy koninkryk kom tot by die voleinding van die wêreld.

1.2 Daarom aanvaar die NG Kerk dit as die bestaansin en -bestemming om deur God gebruik te word in sy handeling met die mens en die wêreld.

1.3 Gelowiges uit elke taal en nasie wat sodoende vergader word, vorm met al die gelowiges 'n eenheid in die ware geloof in Christus.

1.4 Deur getuienis bedien die Kerk die evangelie in al sy dimensies aan mense buite die Kerk.

1.5 Getuienis is die roeping van elke lidmaat asook van die plaaslike gemeente. Waar die omvang en ander omstandighede van die werk dit vereis, word dit in kerkverband van ringe en sinodes onderneem.

1.6 Waar binne een geografiese gebied meer as een kerkverband van die NG Kerkfamilie bestaan, word getuieniserk in oorleg en samewerking met mekaar gedoen.

## 2. UITVOERING

### 2.1 Kerklike sendingbetrokkenheid

2.1.1 Waar sending die heilshandeling van God met die wêreld is met die oog op die koms van sy koninkryk, is die Kerk as sy dienaar wesenlik daarby betrokke.

2.1.2 Dit is die plig van die kerkraad om die gemeente te motiveer en toe te rus om as missionêre gemeente betrokke te wees by die heilshandeling van God met die wêreld. Hierdie betrokkenheid sluit in persoonlike getuienis deur woord en lewe, die beoefening van geloofsgemeenskap, voorbidding, rentmeesterskap, die diens van barmhartigheid en die ywer vir reg en geregtigheid in die samelewing.

2.1.3 Vir die koördinerende, stimulerende en uitvoerende van die getuienistaak benoem die kerkraad 'n getuieniskommissie.

2.1.4 Elke kerkraad onderneem getuieniserk binne sowel as buite eie gemeentegrense na gelang van omstandighede. In alle gevalle geskied hierdie werk in oorlegpleging met, en waar moontlik in samewerking, met ander lede van die NG Kerkfamilie (gemeente, ring of sinode) wat belang mag hê by die betrokke werksaamheid.

2.1.5 Waar die omvang van die getuienistaak dit vereis, kan die kerkverband deur ringe en sinode die plaaslike kerkraad in die uitvoering van die getuienistaak steun.

2.1.6 Die Ringsendingkommissie (RSK) / Ringskommissie vir Getuienis (RKG) en die Sinodale Sendingkommissie (SSK) / Sinodale Kommissie vir Getuienis (SKG) neem respektiewelik

die verantwoordelikheid vir die sending-/ getuienisaangeleenthede in die rings- en sinodale gebiede.

- 2.1.7 Waar getuieniswerk buite die grense van die gemeente geskied, moet waar moontlik, skakeling en samewerking wees met ander kerke en getuienis/sendinginstansies wat reeds daar bestaan.
- 2.1.8 Waar 'n sinode 'n getuienisaksie begin met spontane bydraes van lidmate vanuit die hele Kerk ('n "geloofsending"), moet ander sinodes wie se lidmate daarby betrokke word, ook in die saak geken word.
- 2.1.9 Die Algemene Sinode bepaal die getuienis/sendingbeleid van die NG Kerk. Die Algemene Sinodale Kommissie vir Getuienis (ASKG) dien die sinode met advies in dié verband.
- 2.1.10 Deur middel van bedienings op die terreine van byvoorbeeld mediese werk, onderwys, lektuurvoorsiening, tegniese hulpmiddels, sosio-ekonomiese opheffing, getuienis teenoor die owerheid en missionêre barmhartigheidsdiens streef die NG Kerk daarna om die koninkryk van God op omvattende wyse met woord en daad te bedien.

## **2.2 Toerusting vir Getuienis**

Die NG Kerk aanvaar dit as taak en verantwoordelikheid om lidmate en ander werkkragte op te lei en toe te rus met die oog op eie getuienisverantwoordelikheid asook met die oog op beskikbaarstelling van werkkragte, waar verlang of benodig, vir diens by ander lede van die NG Kerkfamilie.

Die opleiding en toerusting geskied op die volgende wyse:

- 2.2.1 deur lidmate te skool en te aktiveer vir getuienis met woord en daad;
- 2.2.2 deur getuieniswerkkragte op te lei en toe te rus vir 'n bepaalde deelydse of heelydse taak waarvoor hulle 'n roeping het, of vir die dienswerk wat hulle gevra mag word om by ander lede van die NG Kerkfamilie te verrig.
- 2.2.3 deur die opleiding van bedienaars van die Woord vir missionêre diens op die volgende terreine:
  - 2.2.3.1 die opbou van gemeentes tot missionêre gemeentes;
  - 2.2.3.2 die bediening as sendelinge op 'n bepaalde sendingakker;
  - 2.2.3.3 die bediening as heelydse leraar by 'n ander lid van die NG Kerkfamilie waarheen hy/sy beroep mag word;
  - 2.2.3.4 'n bediening van spesialiteitswerk op bepaalde terreine as gesekondeerdes na 'n ander lid van die NG Kerkfamilie indien daarvoor 'n behoefte bestaan;
  - 2.2.3.5 'n bediening in die wêreldsending.

## **2.3 Lidmate vir getuienisdiens onder die vleuels van ander kerke en getuienis/sendingorganisasies**

Die NG Kerk keur dit goed dat lidmate hulle by kerke en sendingorganisasies wat vir die Kerk aanvaarbaar is, kan aansluit vir getuienisdiens, veral in ander wêrelddele, mits hulle by hul Belydenis bly en die NG Kerk se sending/getuienisbeleid daardeur gedien word. Vir hierdie soort diens word die volgende bepaal:

- 2.3.1 Die sinodale sendingkommissie(s)/kommissie(s) vir getuienis bepaal met watter kerke en organisasies ooreenkomste in dié verband aangegaan mag word.
- 2.3.2 Wanneer lidmate begerig is om by 'n erkende kerk of organisasie te gaan werk, word 'n ooreenkoms met die werkgewers aangegaan oor aangeleenthede soos lewensonderhoud, reiskoste, verblyf, pensioenvoordele en kerklike lidmaatskap van en toesig oor die betrokke werker.
- 2.3.3 Lidmate wat begerig is om getuieniswerk buite 'n arbeidsterrein van die NG Kerk te doen, verkry, indien nodig, 'n buitelandse reisattestaat van hul kerkraad.



- 2.3.4 Lidmate wat voornemens of begerig is om by so 'n erkende kerk of organisasie in te skakel, tree met die betrokke sinodale sending/getuieniskommissie in verbinding.
- 2.4 Basis waarvolgens met ander kerke en organisasies saamgewerk kan word**
- 2.4.1 Die kerke en organisasies moet van Protestants-Christelike belydenis wees;
- 2.4.2 NG Kerkwerkers moet die vryheid hê om hul geloofsbeskouing ooreenkomstig die Drie Formuliere van Eenheid te behou;
- 2.4.3 Lidmate moet eweneens die vryheid behou om in beskouing waaroor daar verskille tussen gelowiges bestaan, hul eie standpunt daarop na te hou;
- 2.4.4 Van NG Kerk werkers word verwag om getrou te bly aan die leer van hulle kerk.
- 2.5 Gelegitimeerdes in getuienisdienste onder die vleuels van ander kerke en sending(getuienis) organisasies**
- 2.5.1 Ten opsigte van hul bedieningsbevoegdheid is daar drie kategorieë waarvolgens gelegitimeerdes in sending/getuienisdienste gebruik kan word.
- 2.5.1.1 Evangeliedienaars van die NG Kerk wat in erkende kerke vir getuienis/sendingwerk beroep en bevestig word. Omdat hulle bevoegdheid in daardie kerk kry, verloor hulle bevoegdheid in die NG Kerk (predikante van die lidkerke van die NG Kerkfamilie en kerke waarmee die ASKG of 'n SSK/SKG 'n bedienings/ sekonderingsooreenkoms het, uitgesluit).
- 2.5.1.2 Predikante en proponente van die NG Kerk wat deur kerkvergaderings of hul gemagtigdes uitgestuur word vir getuieniswerk saam met ander kerke en organisasies behou hul bevoegdheid solank hulle met hierdie opdrag besig is.
- 2.5.1.3 Predikante en proponente van die NG Kerk wat 'n werk saam ander kerke of organisasies wil aanvaar wat
- \* na die oordeel van die Algemene Regskommissie 'n geestelike karakter dra,
  - \* met die verkondiging van die Woord in regstreekse verband staan en
  - \* ten bate van die NG Kerk geag word, kan by die Algemene Regskommissie aansoek doen vir die behoud van proponentbevoegdheid. Indien proponentbevoegdheid aan hulle toegeken word, moet hulle elke jaar voor 30 Junie by die Algemene Regskommissie aanmeld ten einde aan te dui of hulle steeds beskikbaar is vir beroeping.
- 2.5.2 Pensioen van hierdie gelegitimeerdes
- 'n NG Kerk-instansie wat 'n gelegitimeerde beroep en uitstuur, moet in belang van so 'n persoon deelhebbende word van een van die sinodale pensioenfondse.
- 2.5.3 Lewensonderhoud van hierdie gelegitimeerdes
- Waar 'n NG Kerk-instansie 'n proponent of predikant vir 'n eie getuienisaksie beroep en uitstuur, kan die lewensonderhoud op een van die volgende wyses gereël word: (volgens 2.5.1.2)
- 2.5.3.1 Die beroepende instansie is verantwoordelik vir pensioen en ander verpligtinge (KO Artikel 13)
- 2.5.3.2 Die pensioen word deur die beroepende instansie in stand gehou terwyl die verdere ondersteuning van die pos op 'n vrywillige bydrae-basis gevind word met die goedkeuring van die betrokke sinodale kommissie of ring.
- 2.5.3.3 Die pensioenaandeel en diensvoordele word deur die beroepende instansie in stand gehou en oor die verdere lewensonderhoud word met die samewerkende kerk of organisasie ooreengekom.

(Vgl ook Riglyne vir die bevoegdheid van leraars van die NG Kerk wat saam met ander organisasies of kerke werk, Handeling Algemene Sinode 1998, bl.421, 3.5.4)

2.5.4 Kerklike inskakeling van geëgteerde volgens 2.5.1.2

2.5.4.1 Gestuurde skakel kerkregtelik volledig in by die gemeente wat hulle stuur, en is ook deel van die kerkregering van die sturende gemeente.

2.5.4.2 Waar gestuurde ver van die sturende gemeente woon, gaan die sturende gemeente 'n ooreenkoms aan met 'n gemeente waar die gestuurde woonagtig is. Die ooreenkoms reël onder andere dat die gestuurde sy/haar lidmaatsregte daar geniet, wat deelname aan die kerkregering kan insluit.

## **2.6 Lidmaatskap en kerkverband**

2.6.1 Gelowiges uit elke taal en nasie wat deur die getuïensaksie van die NG Kerk vergader word, en deur doop en belydenis lidmate word van die kerk van Christus, vorm met alle gelowiges 'n eenheid in die ware geloof in Christus as lidmate van sy liggaam.

2.6.2 Sulke lidmate sal waar moontlik inskakel by 'n gemeente van die NG Kerkfamilie. By gebrek aan sodanige gemeente kan hulle, ná onderhandeling, by 'n ander kerkverband inskakel of kan daar, wanneer genoegsaam getalle bestaan, tot selfstandige gemeentevorming oorgegaan word.

2.6.3 Ter wille van meer doeltreffende Woordbediening is dit wenslik dat elkeen "in sy eie taal praat oor die groot dinge wat God gedoen het" (Handeling 2:11). Daarom behoort daarvoor ruimte te bestaan dat Woordbediening en aanbidding kan geskied met inagneming van eiesoortige taal- en kultuuragtergrond en bedieningsbehoefes.

2.6.4 Indien 'n bepaalde groep gelowiges dit mettertyd sou verlang en omstandighede dit regverdig, kan daar ruimte vir hulle geskep word om in eie gemeenteverband op te tree ooreenkomstig hul eie bedieningsbehoefes binne die verband van eie taal en kultuur, maar verkieslik word aansluiting gesoek by die bestaande kerk in die streek waarmee die NG Kerk die nouste bande het.

2.6.5 Eie gemeentevorming impliseer ook die moontlikheid van eie breër verbande van ring en sinode. Hier sal faktore soos geografiese verwyderdheid, staatkundige bestel en die behoefte aan inkleding van die evangelie in eie kulturele konteks 'n rol speel. Voorop bly egter staan dat die eenheidsband met die bestaande kerk in die NG Kerkfamilie in die streek sover moontlik behoue bly en steeds uitdrukking sal vind op die mees sinvolle en effektiewe wyse.

## **2.7 Die NG Kerkfamilie**

2.7.1 Die NG Kerk aanvaar dat die eenheid van die kerk 'n onmisbare toetssteen is vir die egtheid en geloofwaardigheid van die kerk se getuïenis in die wêreld (Kerk en Samelewing, par 83).

2.7.2 Daarom onderskryf die NG Kerk die ideaal van één kerkverband binne die NG Kerkfamilie (Kerk en Samelewing, par 236).

2.7.3 Met die oog op die opbou van die kerk tot getuïenislewering in die wêreld, onderskryf die NG Kerk die beginsel van wederkerige hulp en bystand ten opsigte van behoeftes binne die hele NG Kerkfamilie.

2.7.4 Solank die hele NG Kerkfamilie nog nie in een kerkverband verenig is nie, geld die volgende ten opsigte van die wedersydse beskikbaarstelling van werkkragte binne die NG Kerkfamilie:

2.7.4.1 Die NG Kerk kan bedienaars van die Woord vir ander lede beskikbaar stel as hulle dit versoek. Hierdie leraars word in ooreenstemming met die kerkordes en bepalinge van die onderskeie kerkverbande beroep en bevestig, of soos ooreengekom in die ooreenkomste tussen die betrokke sinodes.

- 2.7.4.2 Bedienaars van die Woord wat deur die NG Kerk beskikbaar gestel word en beroep en bevestig is in 'n ander kerkverband van die NG Kerkfamilie, se bevoegdheid en opsig en tug word bepaal deur die kerkorde van daardie kerkverband.
- 2.7.4.3 Die NG Kerk kan kundiges op die gebied van teologiese opleiding, jeugwerk, sending, evangelisasie, kerklike administrasie, diakonaat, ensovoorts op versoek van 'n ander lid van die NG Kerkfamilie vir tydelike diens in daardie kerkverband beskikbaar stel. Hulle posisie met betrekking tot die strukture van die ander kerkverband word by wyse van onderlinge ooreenkomste gereël.
- 2.7.4.4 Ander werkkragte uit die NG Kerk wat volgens ooreenkoms dienswerk in 'n lidkerk van die NG Kerkfamilie verrig, word lidmate van die betrokke kerk. In 'n gebied waar nie 'n gemeente van die NG Kerkfamilie bestaan nie, bly hulle lidmate van die NG Kerk.

## **2.8       Gesamentlike Getuieniswerk**

- 2.8.1 Die NG Kerk aanvaar gesamentlike getuienis/sending as verantwoorde benadering. Indien getuieniswerk in 'n gebied of land gedoen word waar daar reeds 'n kerk uit die NG Kerkfamilie bestaan, word samewerking gesoek.
- 2.8.2 Indien die NG Kerk in 'n gebied of land werk waar daar nog nie 'n gemeente van een van die lidkerke van die NG Kerkfamilie is nie, kan die NG Kerk self of saam met ander lidkerke sendelinge beroep, bevestig en uitstuur.
- 2.8.3 Waar geleentheid tot gesamentlike getuienis voorkom, kan gesamentlike kommissies vir getuienis van die betrokke lidkerke van die NG Kerkfamilie in die lewe geroep word om verantwoordelikheid vir die werk te aanvaar.
- 2.8.4 Gesamentlike getuienisaksies word gereël volgens onderlinge ooreenkoms tussen die betrokke kerklike liggame.

## **2.9       Skakeling met die owerheid**

- 2.9.1 Die kerk se roeping tot getuienis behels ook skakeling met die owerheid op alle vlakke oor aangeleenthede op die terrein van getuienis.
- 2.9.2 Skakeling met die owerheid wat betref die terrein van die getuienis geskied volgens Art 67 van Die Kerkorde.

## **19. REGLEMENT VIR TENTMAKERBEDIENING**

### **1. BESTAANDE POSTE**

- 1.1 Indien 'n gemeente nie finansiële in staat is om 'n bestaande predikantspos langer ten volle te dra nie, mag daar met inagneming van Artikel 7.6 en die besluite by Kerkorde Artikel 12 (bedryfsvereistes) tot 'n tentmakerbediening oorgegaan word.

### **2. NUWE POSTE**

- 2.1 Indien 'n gemeente 'n behoefte het aan 'n verdere leraarspos in die gemeente, maar nie in staat is om 'n volle predikantspos te dra nie, mag daar tot die beroeping van 'n leraar vir tentmakerbediening oorgegaan word.

### **3. PROSEDURE VIR IMPLEMENTERING**

- 3.1 Indien 'n kerkraad 'n bestaande gevulde pos na 'n tentmakerbediening wil omskep, beding die kerkraad 'n gewysigde diensoreenkoms met die betrokke leraar. 'n Verteenwoordiger van die ring is in adviserende hoedanigheid deel van hierdie onderhandelinge.
- 3.2 Indien 'n kerkraad oorgaan tot die omskepping van 'n bestaande vakante pos na tentmakerbediening of die skepping van 'n nuwe pos vir tentmakerbediening, vervat die kerkraad die vereistes, voorwaardes en diensvoordele verbode aan die pos in 'n konseporeenkoms. 'n Verteenwoordiger van die ring adviseer die kerkraad hierin.
- 3.3 Die Kerkraad bring 'n beroep in ooreenstemming met die voorgeskrewe kerklike bepalings en by wyse van 'n groslys uit. Die kerkraad sien toe dat die vereistes van die plegtige legitimasiieverklaring nagekom word en dat daar geen ooreenkoms of afspraak is nie. By oorweging en aanvaarding van die beroep, word uitvoering gegee aan Kerkorde Artikel 7.4 - 7.8.

### **4. SAKE WAT DIE AANDAG VAN DIE KERKRAAD MOET GENIET BY DIE IMPLEMENTERING VAN TENTMAKERBEDIENING**

- 4.1 'n Tentmakerspos moet die karakter van 'n gewone leraarspos vertoon. 'n Tentmaker is 'n gemeenteleraar wat deelyds, soos ooreengekom, die ampspligte van Artikel 9 van die Kerkorde onder lidmate van die gemeente of onder ander persone binne die gemeentegrens vervul.<sup>15</sup>
- 4.2 Die kerkraad moet te alle tye daarteen waak dat 'n tentmakerspos geskep en/of misbruik word bloot vir die verkryging/behoud van predikantsbevoegdheid of om sitting in kerklike vergaderinge te verkry.
- 4.3 Tentmakersposte mag nie meer wees as die voltydse leraarsposte van die gemeente nie, tensy die gemeente slegs 'n tentmakerspos het.<sup>16</sup>
- 4.4 By die oorweging van 'n tentmakerspos, bepaal die kerkraad of dit nie eerder 'n pos vir pastorale hulp moet wees nie.<sup>17</sup>

---

<sup>15</sup> Die begrip 'deelyds' verwys na die bediening van 'n leraar wat in 'n bepaalde gemeente bevestig is en wat volgens diensoreenkoms vir 'n vasgestelde gedeelte van sy tyd slegs 'n gedeelte van sy lewensonderhoud van die gemeente ontvang.

<sup>16</sup> Die begrip 'voltyds' verwys na die bediening van 'n leraar wat in 'n bepaalde gemeente bevestig is en wat volgens dienskontrak sy volle lewensonderhoud van die gemeente ontvang.

- 4.5 Die kerkraad lewer voor die implementering van tentmakerbediening waarborg van genoegsame finansiële voorsiening vir die gemeente se kontraktuele deel van die tentmaker se lewensonderhoud. As 'n bedienaar van die Woord binne of buite die gemeente ondersteuners moet werf om in die gemeente se kontraktuele bydrae tot sy/haar lewensonderhoud te voorsien, kan dit nie as tentmakerbediening geag word nie (vgl. KO Art. 13).
- 4.6 Tentmakerbediening staan met die werksaamhede van die gemeente in direkte verband. Dit mag nie gebruik word as dekmantel om 'n eie bediening of gevestigde praktyk of afsonderlike werksaamheid buite gemeenteverband te vestig of voort te sit nie.
- 4.7 Die tentmaker beoefen sy/haar bediening deurentyd ooreenkomstig KO Art. 9 van die Kerkorde.
- 4.8 Die Kerkraad sien toe dat 'n tentmaker se pensioenvoorsiening in orde is.
- 4.8.1 Indien 'n tentmaker ook in diens van 'n ander werkgewer staan, kan hy/sy met vooraf toestemming van die trustees van die sinodale pensioenfonds ten volle by die ander werkgewer se wetlik-goedgekeurde pensioenskema, groeplewensdekking en/of mediese fonds inskakel.
- 4.8.2 Indien 'n tentmaker nie in diens van 'n ander werkgewer staan nie, of in diens staan van 'n ander werkgewer wat nie oor 'n wetlik-goedgekeurde pensioenskema, groeplewensdekking en/of mediese fonds beskik nie, moet die tentmaker by die betrokke sinodale pensioenfonds, groeplewensdekking en/of mediese fonds inskakel. Die pensioenaandeel en/of lidmaatskap van die groepversekerings- en/of mediese fonds word deur die kerkraad geadministreer.

#### 4.9 **Die wyse van diensbeëindiging**

Soos enige voltydse predikant in kerkdien word 'n tentmaker se verbintenis met 'n gemeente kontraktueel vasgestel tot op die datum waarop 'n beroep na 'n ander gemeente/werkkring aanvaar (demissie) word of totdat die vasgestelde aftree-ouderdom (emeritaat) bereik is. Ander wyses van diensbeëindiging, soos van toepassing op 'n predikant wat ten volle deur 'n gemeente versorg word, is ook op 'n tentmaker van toepassing.

#### 4.10 **Dienskontrakte met die ander werkgewer(s)**

By die aangaan van 'n diensooreenkoms met 'n tentmaker, bepaal die kerkraad sy voorwaarde(s) vir die tentmaker se diens aan die ander werkgewer(s). Die aangaan van alle toekomstige diensooreenkomste met ander werkgewers, moet vooraf deur die kerkraad goedgekeur word.

### 5. **AFVAARDIGING NA MEERDERE VERGADERINGS**

Kerkrade behoort nie onderskeid te maak tussen 'n tentmaker en 'n ander leraar wanneer die afvaardiging van 'n gemeente na meerdere vergaderings aangewys word nie, tensy verpligtinge deur die ander werkgewer opgelê, dit verhinder.

---

<sup>17</sup> 'n Pos vir pastorale hulp, byvoorbeeld proponent of emeritus, moet nie beskou word as 'n tydelike leraarspos nie, maar as 'n pos vir 'n kontrakwerker met 'n vooraf vasgestelde dienstermyn. Sodanige werkkragte word nie beroep en in die gemeente bevestig nie.

## **20. REGLEMENT VIR DIE ALGEMENE KOMMISSIE VIR TEOLOGIESE OPLEIDING (AKTO)**

### **1. NAAM**

Algemene Kommissie vir Teologiese Opleiding (AKTO).

### **2. SAMESTELLING**

- 2.1 Twee verteenwoordigers (met sekundi) van elke kuratorium;
- 2.2 Die voorsitters van die NG Kerk-dosenterade aan die onderskeie sentra met sekundi.
- 2.3 Die aktuaris van die Algemene Sinode (met sekundus).
- 2.4 Een verteenwoordiger (met sekundus) deur die Algemene Kommissie vir Gemeentebediening benoem.
- 2.5 'n Deskundige op die gebied van tersiêre onderwys deur die Kommissie gekoöpteer.

### **3. OPDRAG EN VERSLAG**

- 3.1 Die Kommissie adviseer die Algemene Sinode in verband met die beleid wat gevolg moet word ten opsigte van teologiese opleiding.
- 3.2 Die Kommissie koördineer en bespreek sake van gemeenskaplike belang vir die onderskeie teologiese opleidingsentra soos deur die Algemene Sinode en/of deur die kuratoria na hom verwys en gee daarvoor leiding.
- 3.3 Elke kuratorium behou selfstandigheid soos deur die betrokke sinode(s) bepaal en lewer verslag aan die betrokke sinode(s).
- 3.4 Die onderskeie kuratoria dien hul verslae met die oog op die voorlegging van een samevattende verslag aan die Algemene Sinode by die Algemene Kommissie vir Teologiese Opleiding in. Hierdie samevattende verslag mag redaksionele en formele veranderinge in die verslae van kuratoria aanbring, maar mag dit nie inhoudelik wysig nie.

### **4. KONSTITUERING EN VERGADERINGS**

- 4.1 Vergaderings word minstens een maal per jaar gehou.
- 4.2 Die voorsitterskap en skribaats van die vergadering roteer na elke vergadering van die Algemene Sinode volgens die ouderdom van die fakulteite.

## **21. DIE NEDERDUITSE GEREFORMEERDE KERK EN ANDER CHRISTELIKE KERKE EN GROEPE**

### **1. BEPALING VAN DIE VERHOUDING TOT ANDER KERKE EN GROEPE**

- 1.1 Die Woord van God is die primêre maatstaf en basis by die bepaling van die NG Kerk se houding teenoor en verhouding tot ander kerke en godsdienstige groepe.
- 1.2 Hoe 'n kerk die Bybel verstaan, die hoofsaak van die boodskap van die Bybel interpreteer en dit op die lewe toepas, staan uitgedruk in die kerk se belydenisskrif(te).
- 1.3 Die belydenisgrondslag wat die NG Kerk onderskryf en waaraan hy hom gebonde ag, is:
- 1.3.1 Die drie ekumeniese belydenisse, nl. die Apostoliese Geloofsbelijdenis, die Geloofsbelijdenis van Nicea en die Geloofsbelijdenis van Athanasius, wat die NG Kerk met die meeste ander Christelike kerke deel.
- 1.3.2 Die drie Formuliere van Eenheid, nl. die Nederlandse Geloofsbelijdenis, die Heidelbergse Kategismus en die Dordtse Leerreëls, wat die NG Kerk met 'n aantal gereformeerde kerke deel en wat die eiendommlike van die NG Kerk is.
- 1.4 Die NG Kerk se belydenisgrondslag is ondergeskik aan die Bybel en moet steeds daaraan getoets word.
- 1.5 Dit is nie voldoende dat 'n belydenis op papier staan of dat iemand dit op 'n stadium in die verlede onderskryf het nie. Daar moet ook gevra word of 'n bepaalde kerk en sy lidmate hulle daardeur gebonde ag en of die belydenis in 'n godvrugtige lewe konkreet word.
- 1.6 Die gesamentlike kriteria vir bepaling van die NG Kerk se houding teenoor en verhouding tot ander kerke en groepe is dus die wil van God Drie-enig soos in die Bybel weergegee, en weerspieël in
- \* die Belydenis
  - \* die Kerkorde
  - \* die erediens
  - \* die Christelike lewenswandel, diens en getuienis.

(Vgl. Agenda van die Algemene Sinode 1994 bl 66 punt 14.2.1 tot 14.2.5 vir 'n bespreking van dié kriteria).

### **2. GROEPERINGE VAN DIE CHRISTENDOM**

- 2.1 Om kerke en Christelike groepe in te deel, is moeilik omdat sekeres in meer as een kategorie pas en ander nêrens. Verder moet daar rekening gehou word met die feit dat kerke nie staties is nie, maar gedurig besig is om te verander en dat sekere kerke gekenmerk word deur 'n patroon van wyduiteenlopende modaliteite wat onder een struktuur gehuisves word. Oor die aard en graad van die NG Kerk se verhouding tot onderstaande kerke word deur die Algemene Sinode beslis (vgl ook 3.1.2, 3.1.4, 3.2 en 3.3).
- 2.2 Hier word uitgegaan van die groot groeperinge van die Christendom soos dit in die geskiedenis ontvou het, nl.
- 2.2.1 **Gereformeerde kerke**  
Waaronder die Familie van NG Kerke, die Gereformeerde Kerke in Suid-Afrika, die Nederduitsch Hervormde Kerk van Afrika, die Afrikaanse Protestantse Kerk, die Presbiteriaanse Kerke, die Church of England in Southern Africa en die Congregational Church.
- 2.2.2 **Ander Protestantse kerke**

Waaronder die Lutherse kerke, die Church of the Province of South Africa (die Anglikaanse Kerk), die Methodist Church, die Baptiste Kerke (in onderskeiding van die Hatfield Christian Church/Centre) en die Evangelies Gereformeerde Kerk.

### 2.2.3 **Pinkster en Charismatiese kerke**

Die pinkstergroepe, bv. die Apostoliese Geloofsending van Suid-Afrika, die Volle Evangelie Kerk, die Pinkster Protestantse Kerk en die Assemblies of God. Charismatiese groepe, bv. die Hatfield Christian Church/Centre en Rhema. Ander, bv. die Kerk van die Nasarener en die Sewende Dag Adventiste.<sup>18</sup>

### 2.2.4 **Nie-Reformatoriese Kerke**

Waaronder die Rooms Katolieke Kerk en die Oosters Ortodokse Kerke.

### 2.2.5 **Afrika Onafhanklike Kerke**

### 2.2.6 **Ander groepe**

Waaronder die Jehovasgetuies, die Christian Science, die Church of Jesus Christ of the Latter Day Saints (die Mormone) en die Apostelkerke (die Ou Apostel Kerk, die Nuwe Apostel Kerk, die Apostel Eenheid, die Twaalf Apostels, ensovoorts).

## **3. PRAKTIESE TOEPASSING VAN DIE KRITERIA**

### 3.1 **Samewerking met ander Christelike kerke**

3.1.1 Die NG Kerk stel hom ten doel om op verantwoordelike wyse, sonder prysgawe van die eie standpunt, met ander Christelike kerke saam te werk ter bevordering van die Koninkryk van God.

3.1.2 Die graad en wyse van samewerking sal in elke geval bepaal word deur die graad van ooreenstemming ten opsigte van belydenis, kerkorde, erediens en die Christelike lewenswandel van die betrokke kerk (vgl 1.6 hierbo).

3.1.3 Ekumene moet deur alle kerkvergaderinge beoefen word te wete die Algemene Sinode, sinodes, ringe en kerkrade. Dit is nodig om te beklemtoon dat plaaslike ekumene op die agenda van elke kerkraad moet bly.

3.1.4 Die Algemene Sinode bepaal die beleid oor die aard en graad van ekumeniese verhoudinge (vgl KO Artikel 70 en gepaardgaande Besluit).

### 3.2 **Verlening van kerklike voorregte sonder oordrag van lidmaatskap**

#### 3.2.1 **Die doop**

3.2.1.1 Die doop word aan kinders van lidmate van kerke uit die eerste vier groeperinge, wat nie die verbondsdooop verwerp nie, bedien, mits hulle skriftelike verlof daartoe van die betrokke kerkraad of instansie van die kerk waaraan hulle behoort, ontvang het.

3.2.1.2 Lidmate van kerke uit die eerste vier groeperinge wat nie die verbondsdooop verwerp nie, kan, met toestemming van hulle eie kerkraad en na die dooponderhoud, toegelaat word om saam met hulle eggenoot/eggenote, wat lidmaat van die NG Kerk is, by te staan by die doopbediening van hulle kinders en ook op die vrae te antwoord.

3.2.1.3 Lidmate van kerke wat die verbondsdooop verwerp, persone uit groepering 5 en 6, asook mense wat Christus bely, maar nie formeel aan 'n kerk behoort nie, kan na die dooponderhoud toegelaat word om saam met hulle eggenoot/eggenote, wat lidmaat van die NG Kerk is, by te staan by die doopbediening van hulle kinders sonder dat die vrae aan hulle gestel word en hulle daarop moet antwoord.

3.2.1.4 Die kerkraad van 'n NG gemeente kan aan lidmate toestemming verleen om hulle kinders in 'n gemeente van 'n kerk uit die eerste twee groeperinge (vgl 2.2.1 en 2.2.2 hierbo) te laat doop.

---

<sup>18</sup> Hierdie twee kerke word vir praktiese redes hier geplaas.



### 3.2.2 **Die nagmaal**

3.2.2.1 In gemeentes van die NG Kerk mag besoekers die nagmaal gebruik op voorwaarde dat hulle toegang en vrymoedigheid daartoe in hulle eie gemeentes het.

3.2.2.2 Die volgende sou as moontlike voorbeeld kon dien van 'n uitnodiging tot deelname aan die nagmaal:

'Aangesien die kerk van Christus meer omvattend is as slegs hierdie gemeente word elkeen van u wat u persoonlike verlossing in Jesus Christus gevind het, in u eie gemeente toegang tot die nagmaal en vrymoedigheid daartoe het en wat u kan vereenselwig met die leer oor die nagmaal, soos dit in die formulier aan u voorgehou is, uitgenooi om aan hierdie nagmaalsfees deel te neem. Wie egter die genadewerk van God minag en tog deelneem, eet en drink 'n oordeel oor hulle self.

3.2.2.3 In ekumeniese verhoudinge op sowel gemeentelike as sinodale vlak word wedersydse toeganklikheid al dan nie van die betrokke kerke bespreek en dienooreenkomstige gedragswyses bepaal.

3.2.2.4 Lidmate van 'n NG gemeente kan op besoek in 'n ander kerk nagmaal gebruik indien daardie kerk dit toelaat. Lidmate behoort dus voortdurend ingelig te word oor die sin van die nagmaal en die implikasies wat dit het vir die wyse waarop 'n mens as nagmaalsgas in ander gemeentes en kerke optree. Hierdie inligting kan verskaf word deur die prediking, die inkleding van die liturgie en die kategeese.

### 3.3 **Oorkoms na 'n Nederduitse Gereformeerde Gemeente**

#### 3.3.1 **Algemeen**

3.3.1.1 Geloof in die God van die Heilige Skrif soos dit in die Formuliere van Eenheid tot uitdrukking kom, is die enigste voorwaarde om aan 'n NG gemeente as gemeente van Christus te behoort.

3.3.1.2 Lidmaatskap van alle NG gemeentes is oop vir enige gelowige wat die belydenis van hierdie kerk aanvaar.

3.3.1.3 Die opneem van lidmate uit ander kerke is in beginsel en praktyk 'n gemeentelike aangeleentheid wat onder die toesig van die kerkraad en in ooreenstemming met die amptelike ordereëlings plaasvind.

3.3.1.4 In elke geval waar iemand uit 'n ander kerk of groep na 'n NG gemeente wil oorkom/terugkom, moet 'n deeglike pastorale gesprek gevoer word oor alle aspekte van die leer en lewe van so iemand (vgl hier ook 1.6 hierbo) en oor die beweegredes vir die aansoek.

3.3.1.5 Tydens hierdie pastorale gesprek moet rekening gehou word met die feit dat nie alle lede van 'n bepaalde kerk dieselfde geestelike ingesteldheid en geestelike peil het of dieselfde opvattinge huldig nie.

#### 3.3.2 **Aanvaarding van doop**

3.3.2.1 Die doop van persone uit ander kerke word aanvaar mits dit

- \* geskied het in die Naam van die Vader en die Seun en die Heilige Gees;
- \* met water bedien is, en
- \* bedien is deur 'n persoon wat afgesonder is vir die bediening van die Woord en die sakramente.

3.3.2.2 Die doop van persone wat in een van die Apostelkerke (waaronder die Ou Apostel Kerk, die Nuwe Apostel Kerk, die Apostel Eenheid en die Twaalf Apostels) gedoop is, word nie aanvaar nie.

#### 3.3.3 **Belydende lidmaatskap**

- 3.3.3.1 In die pastorale gesprek met persone wat uit kerke uit die eerste twee groeperinge van kerke na 'n NG gemeente wil oorkom, word gelet op punte van verskil in leer en lewe sodat die persoon die leer van die NG Kerk heelhartig kan onderskryf.
- 3.3.3.2 Van persone uit kerke uit groepering 3 en 4 word naas die pastorale gesprek ook gedeeltelike of volledige onderrig met belydenis van geloof voor 'n kommissie van die kerkraad of voor die gemeente vereis.
- 3.3.3.3 Persone uit die vyfde en sesde groeperinge moet 'n deeglike kategetiese deurloop en openbare belydenis van geloof aflê.

## 22. REGLEMENT VIR DIE VERLOF VAN PREDIKANTE EN SINODALE AMPTENARE

(Sinodale amptenare hierna predikante genoem)

### 1. JAARLIKSE VERLOF

- 1.1 Kerkrade/kommissies reël en notuleer verlof waarop die predikant soos ooreengekom jaarliks geregtig is, met inagneming van die besondere omstandighede van die gemeente en advies wat van tyd tot tyd deur die AKDV gegee word. Ongereelde werksure, werksdruk en gesinsomstandighede word ook in ag geneem. 'n Minimum van 30 dae en 'n maksimum van 42 kalenderdae verlof per jaar kan toegeken word.
- 1.2 Verlof val 'n predikant *pro rata* vanaf bevestiging (diensaanvaarding) toe.<sup>19</sup>
- 1.3 Verlof kan oorgedra word na 'n volgende jaar, onderhewig aan die bepaling dat:
  - 1.3.1 'n predikant in enige stadium slegs 30 dae opgehoopte verlof tot krediet mag hê;
  - 1.3.2 'n maksimum van 30 dae opgehoopte verlof<sup>20</sup> by diensbeëindiging uitbetaalbaar is. Vir die berekening van die waarde van die verlof geld lewensonderhoud en alle toelaes, met die uitsondering van behuisingsvoordele.<sup>21</sup>

### 2. SIEKTEVERLOF

- 2.1 Kerkrade/kommissies kan aan predikante siekteverlof met volle lewensonderhoud en toelaes toestaan:
- 2.2.1 120 dae siekteverlof word in siklusse van 3 jaar toegestaan.
- 2.2.2 In die geval van oorskryding van toegekende siekteverlof binne 'n siklus van drie jaar, kan 'n werknemer kies om enige vakansieverlof tot sy/haar beskikking aan te wend vir siekteverlof. Indien geen toegekende siekteverlof of vakansieverlof meer vir 'n werknemer beskikbaar is nie en die werknemer steeds deur swak gesondheid verhinder word om sy/haar werksaamhede doeltreffend te verrig, kan so 'n werknemer aansoek doen vir verdere siekteverlof en in die geval waar so 'n aansoek goedgekeur word neem die werkgever 'n besluit oor vergoeding vir daardie tydperk.
- 2.2.3 In die geval van 'n werknemer wat aansoek doen om verdere siekteverlof soos hierbo bedoel kan die werkgever, benewens deur te oorweeg om die aansoek vir verdere siekteverlof goed te keur of af te keur, ook oorweeg om 'n gepaste alternatiewe reëling te tref.
- 2.2.4 By 'n aansoek om siekteverlof vir meer as 3 dae kan die werkgever aandrang op 'n verslag van 'n geregistreerde mediese praktisyn in sodanige bewoording wat die werkgever in staat stel om:
  - \* te bepaal dat die applikant nie in 'n geskikte toestand van gesondheid verkeer om sy/haar pligte te verrig nie; en
  - \* dat die tydperk van verlof waarvoor aansoek gedoen word, vir die herstel van sy/haar gesondheid nodig is.

---

<sup>19</sup> Dit beteken dat 'n predikant na een jaar diens reeds 12 dae verlof moes geneem het, sodat daar nie meer as 30 dae opgehoop word nie.

<sup>20</sup> sien die Wet op Basiese Diensvoorwaardes, 1997, hoofstuk 3, artikel 20. In ander state geld die wetgewing wat daar van toepassing is.

<sup>21</sup> Opgehoopte verlof is ongebruikte verlof van die vorige jaar of jare. Ander regs geldige verlof is die *pro rata*-deel van die huidige jaar se verlof wat nog nie gebruik is nie. Albei is uitbetaalbaar by diensbeëindiging.

- 2.2.5 Die werkgewer sal die reg hê om 'n mediese sertifikaat deur 'n geneesheer, op koste van die werkgewer te verkry, voordat siekteverlof goedgekeur word, indien hy van mening is dat die omstandighede dit regverdig.
- 2.2.6 Indien die siekteverlof 120 dae oorskry, word die advies van die ringskommissie ingewin met die oog op die voortgang van die Evangeliebediening in die gemeente.

### **3. LANGVERLOF**

- 3.1 Predikante is bo en behalwe verlof, met goedkeuring van die kerkraad/kommissie, geregtig op langverlof onderhewig aan die volgende voorwaardes:
  - 3.1.1 Ná verloop van drie jaar in dieselfde werkkring is 'n predikant geregtig op 30 dae langverlof;
  - 3.1.2 Langverlof word daarná bereken op die basis van 10 dae per jaar diens;
  - 3.1.3 'n Predikant mag in enige stadium slegs 90 dae langverlof tot krediet hê;
  - 3.1.4 Langverlof kan nie van een gemeente/werkkring na 'n ander oorgedra word nie;
  - 3.1.5 Langverlof kan slegs in periodes van 30 dae of langer geneem word, tensy met die kerkraad/kommissie anders gereël word.
  - 3.1.6 Die waarde van die helfte van uitstaande regsgeldige langverlof (lewensonderhoud en toelaes) is met die goedkeuring van die kerkraad/kommissie, slegs by diensbeëindiging uitbetaalbaar.

### **4. STUDIEVERLOF**

- 4.1 Studieverlof is 'n vergunning en werkgewers en predikante moet in die lig van plaaslike omstandighede ooreenkom oor studieverlof.
- 4.2 Indien die studietydperk langer as ses maande duur, is 'n predikant verplig om demissie by die werkgewer aan te vra.
- 4.3 Die predikant tref self reëlings met die Algemene Regskommissie met betrekking tot behoud van bevoegdheid indien van toepassing.
- 4.4 Predikante is verplig om eers opgehoopte verlof te gebruik voordat hulle kan aanspraak maak op studieverlof. 'n Werknemer kan aansoek doen om 'n terugskrywing op verlof, vir verlof wat hy/sy vir toepaslike studiedoeleindes gebruik het, mits in 'n kursus(se) wat vooraf deur die werkgewer goedgekeur is, geslaag is.
- 4.5 Wanneer die werkgewer 'n predikant verplig om opleiding te ondergaan (bv. VTO) of om 'n kursus/predikantekonferensie by te woon, geld dit nie as studieverlof of gewone verlof nie.

### **5. KRAAMVERLOF**

- 5.1 'n Vrou in die amp as predikant is geregtig op minstens 4 opeenvolgende maande kraamverlof. So 'n predikant kan met kraamverlof begin vanaf 4 weke voor die verwagte datum van geboorte, tensy anders ooreengekom.
- 5.2 Die predikant ontvang gedurende kraamverlof volle lewensonderhoud en toelaes, minus die bedrag wat sy uit die Werkloosheidsversekeringsfonds kan verkry.

### **6. OPENBARE VAKANSIEDAE**

'n Predikant is geregtig op openbare vakansiedae. Indien die predikant 'n diensverpligting het, kom die predikant en werkgewer ooreen op 'n gepaste reëling.

**7. VERLOF VIR GESINSVERANTWOORDELIKHEID**

'n Predikant is, met die oog op gesinsverantwoordelikhede, geregtig op 3 dae menslikheidsverlof per jaar, wat nie ooploopbaar is nie.

## **23. REGLEMENT VIR DIE ALGEMENE KOMMISSIE VIR VROUDELIDMATE (AKV)**

### **1. NAAM**

Algemene Kommissie vir Vrouelidmate (AKV).

### **2. SAMESTELLING**

- 2.1 Twee verteenwoordigers van/namens elke sinode, verkieslik die voorsitter, ondervoorsitter of sekretaresse van die betrokke sinode se sinodale leiersgroep.
- 2.2 Die aktuaris van die Algemene Sinode (of sekundus).
- 2.3 'n Verteenwoordiger uit elke kommissie van die Algemene Sinode waarin die Algemene Kommissie vir Vrouelidmate verteenwoordig is met adviserende stem.

### **3. OPDRAG**

Die Kommissie

- 3.1 dra medeverantwoordelikheid vir die geestelike begeleiding van vrouelidmate;
- 3.2 dra sorg dat vroue op die hoogte gehou word van die jongste tendense, behoeftes en moontlikhede ten opsigte van die vrou in die Kerk;
- 3.3 bied die geleentheid dat die verteenwoordigers van die sinodale leiersgroepe vir Vrouelidmate saam kan besin en van mekaar kan leer met die oog op dienswerk en meeewing van vroue in die Kerk;
- 3.4 sorg vir die gesonde skakeling met:
  - 3.4.1 die kommissies wat die verskillende diensterreine van die Kerk bedien;
  - 3.4.2 die leiersgroepe vir Vrouelidmate van die verskillende sinodes;
  - 3.4.3 ander vroue-organisasies op nasionale vlak;
- 3.5 doen verslag aan en adviseer die Algemene Sinode in verband met die beleid wat gevolg moet word ten opsigte van Vrouelidmate;
- 3.6 dra sorg vir navorsing, beplanning, inligting en voorligting ten opsigte van die arbeid aan en van die vrou in belang van die koninkryk van God;
- 3.7 Benoem verteenwoordigers in die bedieningskommissies van die Algemene Sinode.

### **4. KONSTITUERING EN VERGADERINGS**

- 4.1 Die Kommissie konstitueer so gou moontlik na die vergadering van die Algemene Sinode en vergader daarna jaarliks.
- 4.2 By die konstituering word 'n dagbestuur saamgestel bestaande uit die voorsitster, ondervoorsitster en sekretaresse.
- 4.3 Die Kommissie benoem subkommissies volgens behoefte.

## **24. REGLEMENT VIR DIE ALGEMENE KOMMISSIE VIR GETUIENISAKSIE (AKGA)**

### **1. UITGANGSPUNTE**

- 1.1 Een Algemene Kommissie
  - 1.1.1 Die Algemene Kommissie vir Getuienisaksie word as een kommissie gestruktureer as uitdrukking van die belydenis van die eenheid van die betrokke kerke en die ideaal van één kerkverband wat reeds deur al die deelnemende kerke aanvaar is.
  - 1.1.2 Die reglement maak voorsiening vir die realiteit dat daar nog verskillende kerkverbande bestaan, máár dit word slegs gedoen as 'n tussentydse maatreël totdat die kerke verenig in een ampelike kerkstruktuur.
  - 1.1.3 Met die oog op die duidelike ondersteuning vir so een kerkverband word hierdie kommissievereniging reeds onderneem.
  - 1.1.4 In die uitvoering van die roeping tot getuienis, tree die getuienisfunksies van die onderskeie kerkverbande deur hierdie kommissie op as 'n eenheid en word daar 'n gesamentlike getuienis gelewer, gesamentlike aksies onderneem en met een stem na die ledekerke, ander kerke en die wêreld gekommunikeer.
- 1.2 Doel van Getuienisaksie

Die getuienistaak van die Kerk het ten doel om die heerskappy van Jesus Christus in die Kerk en samelewing te verkondig en effektief uit te leef.
- 1.3 Getuienisaksie teenoor kerkvervreemdes

Die getuienisaksie van die kerk word deur gespesialiseerde gemeentebediening gerig op die kerkvervreemdes wat formeel nog lidmate is ten einde hulle daadwerklik te bereik en hulle tot gemeenskap met Christus te bring.
- 1.4 Getuienisaksie teenoor buitelanders en ongelowiges

Sending is die heilshandeling van die drie-enige God, Vader, Seun en Heilige Gees met die wêreld, waardeur Hy uit die hele menslike geslag vir Hom een gemeente deur sy Woord en Gees vergader.
- 1.5 Gemeente en opdrag

Getuienisaksie is die roeping van die hele gemeente, elke lidmaat asook die kerkraad. Deur dié een gemeente:

  - \* laat God sy Woord aan die gevalle wêreld verkondig;
  - \* bring Hy die gemeenskap van die heiliges uit alle nasies tot stand;
  - \* laat Hy diens aan die wêreld in nood lewer;
  - \* laat Hy sy opdrag om die skepping te bewaar en te bewerk sigbaar tot uitdrukking kom; en
  - \* word sy geregtigheid aan die samelewing en die wêreld verkondig.

Só laat Hy sy koninkryk kom tot by die voleinding van die wêreld.
- 1.6 Samewerking in Getuienisaksie binne en buite eie kerkverband

Waar die omvang en ander omstandighede van die getuienisaksie dit vereis, word dit in die kerkverband van ring en sinode onderneem en waar nodig ook in samewerking met ander kerke.

## **25. REGLEMENT VIR DIE ALGEMENE KOMMISSIE VIR DIENSVERHOUDINGE**

### **1. NAAM**

Algemene Kommissie vir Diensverhoudinge (AKDV)

### **2. SAMESTELLING EN VAKATURES**

- 2.1 Die kommissie bestaan uit die Dagbesture of aangewese verteenwoordigers van die Algemene Regskommissie, die Algemene Kommissie vir Predikantebediening, die Algemene Kommissie vir Fondse en ander kundige lede.
- 2.2 Vakatures word aangevul uit die betrokke kommissies met kennis aan die skriba van die ASK.

### **3. OPDRAG**

- 3.1 Die Kommissie formuleer beleid vir goedkeuring deur die Algemene Sinode in sake diensverhoudinge in die NG Kerk.
- 3.2 Die Kommissie hanteer beleidsnavrae in sake diensverhoudinge in die NG Kerk.
- 3.3 Personeelbeleid en die uitvoering daarvan:
  - 3.3.1 Die Kommissie is verantwoordelik vir die personeelbeleid van die Algemene Sinode.
  - 3.3.2 Die uitvoer van die beleid en die administrasie van diensverhoudinge van die personeel in diens van die Algemene Sinode word deur die betrokke kommissie van die Algemene Sinode, as gevolmagtigde van die Algemene Sinode hanteer.
- 3.4 Die Kommissie koördineer die uitvoering van die Algemene Sinode se personeelbeleid.
- 3.5 Die Kommissie is verantwoordelik vir die samestelling, opdatering en beskikbaarstelling van die *Bestuursgids vir Diensverhoudinge*.
- 3.6 Die Kommissie verskaf riglyne vir die bestuur van diensverhoudinge.
- 3.7 Die Kommissie fasiliteer samewerking tussen die onderskeie sinodes se kommissies wat diensverhoudinge hanteer.

### **4. BEGROTING**

Die Kommissie se befondsing geskied deur die AKF na voorlegging van 'n begroting.

### **5. KONSTITUERING EN VERGADERINGS**

- 5.1 Die Kommissie (lede uit samestellende kommissies) konstitueer tydens 'n vergadering van die Algemene Sinode. Die Aktuaris van die Algemene Sinode tree as sameroeper op.
- 5.2 Die Kommissie wys 'n Dagbestuur van drie lede aan (voorsitter, ondervoorsitter en skriba).
- 5.3 Die Kommissie vergader normaalweg drie keer tussen twee vergaderings van die Algemene Sinode. Die Dagbestuur kan meer kere vergader.



## **26. REGLEMENT VIR DIE ALGEMENE KOMMISSIE VIR DIE EREDIENS (AKE)**

### **1. NAAM**

Algemene Kommissie vir die Erediens (AKE) (AKDV)

### **2. SAMESTELLING**

- 2.1 Sewe deskundige lede (met vyf sekundi)
- 2.2 Een NG Kerkvertegenwoordiger van elk van teologiese fakulteite waar predikante vir die NG Kerk opgelei word.
- 2.3 Een verteenwoordiger van die Algemene Kommissie vir Vrouelidmate.
- 2.4 Een verteenwoordiger van elke sinode (op eie koste).

### **3. OPDRAG**

Die Kommissie

- 3.1 adviseer die Algemene Sinode in verband met die beleid wat gevolg moet word ten opsigte van die erediens;
- 3.2 dra sorg vir navorsing, beplanning, inligting en voorligting in belang van die erediens;
- 3.3 voer opdragte van die Algemene Sinode uit.

### **4. KONSTITUERING EN VERGADERINGS**

- 4.1 Die Kommissie konstitueer by die eerste vergadering na die Algemene Sinode.
- 4.2 By die konstituering word 'n dagbestuur saamgestel, bestaande uit die voorsitter, ondervoorsitter en skriba.
- 4.3 Die Kommissie vergader jaarliks.
- 4.4 Die Kommissie benoem subkommissies volgens behoefte.

# KERKORDELIKE RIGLYNE EN FUNKSIONELE BESLUIE

## RIGLYNE

### 1. **BEGINSELS, BESLUIE, RIGLYNE EN HANDLEIDINGS**

1. As gereformeerdes aanvaar ons die Skrif as hoogste *norm*.
2. Uit die Skrif lei ons sekere beginsels af.
3. Wanneer 'n *beginsel(s)* en die daaruit voortvloeiende *standpunt* tot 'n geheel saamgevoeg word om 'n program/gedragslyn vir optrede in die kerklike lewe aan te dui, kan van 'n *beleid* gepraat word.
4. Daar kan tussen twee soorte besluite deur kerkvergaderings onderskei word, naamlik:
  - \* besluite wat gebiedend/voorskriftelik van aard is; en
  - \* besluite wat aanwysend/rigtinggewend van aard is.
- 4.1 **Voorskriftelike besluite (waaronder Kerkorde, bepalinge en reglemente)**
- 4.1.1 Voorskriftelike besluite kom dikwels voor in die vorm van Kerkorde-artikels, bepalinge by die Kerkorde en reglemente, maar besluite wat nie spesifiek aandui dat dit 'n "reglement" is nie, is nie daarom nie-voorskriftelik of van enige mindere gesag nie. 'n Spaarsamige gebruik van bewoordinge soos "die sinode keur die volgende as reglement/riglyn/beleid goed" ten gunste van "die sinode besluit" sal help om groter duidelikheid te bring en sal voorkom dat "gewone" besluite gesien word as "mindere" besluite.
- 4.1.2 Alle besluite is voorskriftelik, tensy die woordgebruik of algemene samehang die teendeel aandui.
- 4.2 **Aanwysende besluite (waaronder riglyne en handleidings)**
- 4.2.1 Riglyne vir die uitvoering van 'n kerklike beleid word deur aanwysende besluite gegee. (Vgl DCG Fourie: *Die Gesag van kerkvergadering* in Die Kerkbode 24 Desember 1980, bl 805).
- 4.2.2 'n *Riglyn* dui die weg aan waarlangs/wyse waarop 'n saak/beleid prakties toegepas of uitgevoer kan word. *Daar is ruimte vir diskresie om aanpassings te maak*, mits daar nie afgewyk word van die beginsels waarvan uitgegaan word of die beleid wat vasgelê is nie. (Tussen 'n riglyn en 'n leidraad is daar nie 'n werklike verskil nie).
- 4.2.3 'n *Handleiding* is die uiteensetting van 'n reeks riglyne, reëls of prosedurestappe wat gevolg moet word by die hantering van 'n sekere soort saak. Waar 'n handleiding egter nie elke stap wat gevolg moet word voorskryf nie, kan daar ruimte vir aanwending van diskresie wees mits die doelwit wat gestel word bevredigend bereik word en geeneen van die neergelegde reëls oortree word nie. (Handelinge 1994, bl 457, 2)

### 2. **RIGLYNE VIR DIE BESLEGTING VAN KERKLIKE GESKILLE**

1. Ampsdraers en lidmate poog allereers om onderlinge konflik op 'n persoonlike en pastorale wyse op te los.
2. 'n Kerkvergadering kan, waar konflik onder sy aandag kom, persone benoem om die oplossing daarvan te begelei.
3. Oplossing word bereik wanneer:

- 3.1 'n alternatief as oplossing vir die probleem gevind is wat vir al die betrokkenes aanvaarbaar is, of
  - 3.2 die betrokkenes ooreenkom om ruimte vir mekaar te maak om van mekaar te kan verskil en met mekaar versoen.
  - 4. In die hantering van konflik geld onder meer die volgende:
    - 4.1 duidelikheid moet verkry word oor die presiese aard en omvang van die konflik.
    - 4.2 Alle betrokkenes moet volle geleentheid kry om hulle siening van die saak te stel.
    - 4.3 Die begeleier(s) tree altyd so op dat hy/sy nie by die konflik betrokke raak nie.
    - 4.4 Alle betrokkenes behoort hulle volle samewerking te gee om 'n oplossing te bereik.
    - 4.5 Die begeleiers rapporteer aan die kerkvergadering wat hulle benoem het.
    - 4.6 'n Kerkvergadering kan ook 'n ander kerkvergadering vra om die hantering van die konflik oor te neem.
- (Handelinge 1998, bl 462, 2.10)

### **3. RIGLYNE VIR DIE BEDIENING VAN DIE NAGMAAL BUITE DIE EREDIENS**

- 1. Dit is die verantwoordelikheid van die plaaslike kerkraad om toe te sien dat die nagmaal ordelik en in ooreenstemming met die Skrif geskied.
  - 2. Die nagmaal word, behalwe by hoë uitsondering, in 'n erediens bedien.
  - 3. Die kerkraad besluit oor die bediening van die nagmaal in sulke uitsonderlike gevalle.
  - 4. Die volgende algemene riglyne word deur die kerkraad gehandhaaf in die bediening van die nagmaal buite die erediens:
    - 4.1 Die kerkraad evalueer die meriete van elke aansoek.
    - 4.2 Die Woord moet bedien word.
    - 4.3 Die ware betekenis van die nagmaal word verduidelik sodat bygeloof uitgeskakel kan word hetsy deur die formulier of andersins.
    - 4.4 Minstens een ampsdraer, verkieslik die wyksouderling, woon die nagmaalbediening by. Waar moontlik word gereël dat ander medegelowiges dit ook bywoon sodat die gemeenskapskarakter van die nagmaal bewaar kan bly.
- (Handelinge 1994, bl 514-515, 4.2)

### **4. RIGLYNE VIR SAMEWERKING MET ANDER SENDING-ORGANISASIES**

(Agenda 1998, bl 178-179, 3.5.2; Handelinge 1998, bl 421)

### **5. RIGLYNE VIR DIE BEVOEGDHEID VAN LERAARS VAN DIE NG KERK WAT SAAM MET ANDER ORGANISASIES OF KERKE WERK**

- 1. Waar 'n geordende deur 'n gemeente (of gemeentes saam), of ring of sinode beroep word en dan onder toesig van 'n ander kerk of genootskap gaan werk as sendeling van die NG Kerk en sy lidmaatskap behou, moet daar by die Algemene Regskommissie aansoek gedoen word vir behoud van predikants- of proponentebevoegdheid.
- 2. Waar 'n geordende van die NG Kerk deur 'n ander kerk beroep word en daarvan lidmaat word, moet vooraf by die Algemene Regskommissie toestemming gevra word om beroepbaarheid in die NG Kerk te behou (vgl Reglement vir die Reëling van die bevoegdheid van predikante en proponente, bepaling 4.2).

3. Prosedure wat gevolg moet word deur geordendes vir aansoeke om behoud van bevoegdheid in die NG Kerk
- 3.1 Die Sinodale Sendingkommissie (SSK), in oorleg met die betrokke ring, beveel die organisasie aan. Dit word gedoen aan die hand van 'n vraelys wat deur die Algemene Sinodale Sendingkommissie (ASSK) goedgekeur is.
- 3.2 Die ASSK hou 'n lys van sendingorganisasies wat reeds aan die hand van die vraelys goedgekeur is. Wat hierdie organisasies betref, hoef die vraelys dus nie elke keer weer ingevul te word nie. Die SSK vergewis hom vooraf van hierdie lys goedgekeurde organisasies.
- 3.3 Die SSK beveel die behoud van bevoegdheid aan by die Algemene Regskommissie. 'n Afskrif van die voltooië vraelys of 'n verklaring deur die ASSK dat die betrokke organisasie reeds geëvalueer en goedgekeur is, word saam met die aanbeveling aan die Algemene Regskommissie voorsien.  
(Agenda 1998, bl 179, 3.5.3; Handeling 1998, bl 421)

## **6. RIGLYNE VIR VERGOEDING AAN WERKGEWERS**

1. Vanweë die aard van die NG Kerk as 'n kerkverband en nie net losstaande gemeentes nie, kan van kerkrade en gemeentes verwag word om hulle leraars en ook kerkraadslede beskikbaar te stel vir diens in die kerkverband (ring, sinode en Algemene Sinode).
2. Wanneer 'n predikant 'n buitengewone deel van sy/haar dienstyd in die diens van die kerkverband bestee, kan die kerkrade en die betrokke kommissie(s) met mekaar in gesprek tree oor kompenserende vergoeding aan die kerkrade of moontlike ander reëlings – die kerkrade of die betrokke kommissie neem die inisiatief. Onderhandelinge oor kompenserende vergoeding moet vroegtydig gereël word.
3. Vergaderinge en kommissies van die kerkverband moet toesien dat die werk wat deur 'n predikant in kerkverband gedoen word nie ten koste van sy/haar gemeentewerk geskied nie. Indien dit wel gebeur, moet die kommissie(s) eers 'n poging aanwend om die werk te verdeel alvorens daar om kompenserende vergoeding gevra word en met 'n behoorlike motivering die nodige goedkeuring verkry word.
4. Kommissies kan in oorleg met die verantwoordelike kommissie reël om 'n spesiale vergoeding aan 'n persoon te betaal vir die verrigting van besondere dienste aan 'n kommissie. Hiervoor moet voorsiening gemaak word in die begroting van die kommissie.
5. Waar nodig, behoort persone wat dienste vir 'n kommissie van die kerkvergadering lewer, deur die kerkvergadering van 'n administratiewe infrastruktuur voorsien te word, waaronder die vergoeding vir sekretariële dienste, fotokopieerkoste, telefoon- en faks-koste.
6. Billike vergoeding vir reis- en verblyfkoste en daggelde aan persone wat in kommissies van die kerkverband dien, behoort betaal te word. (Handeling AS 2002, bl. 570: 8.10.2.3).

# **KERKORDELIK-FUNKSIONELE BESLUIE**

## **7. ARGIEF**

### **7.1 Elektroniese Bewaring**

Die praktyk om dokumente wat elektronies geskep is slegs elektronies te bewaar, word nie aanbeveel nie.

Kommissies van die Algemene Sinode, sinodes, ringe, kerkrade, inrigtings en alle argiefskeppende instansies word versoek om, naas die elektroniese bewaring van dokumente, alle dokumentasie - notules en ander argivalia - in gedrukte vorm te bewaar en volgens die goedgekeurde riglyne vir bewaring (Agenda AS 1998:142) na die verskillende bewaarplekke oor te plaas. (Handelinge AS 2002, bl. 531:1.2.4).

### **7.2 Elektroniese oorplasing**

Die Algemene Sinode besluit dat alle elektroniese oorplasing van lidmaatskap vergesel/bevestig moet word deur die oorspronklik-getekende dokument. (Handelinge AS 2002, bl. 531:2.1.3).

## **8. BESLUIE OOR DIE FUNKSIONERING VAN DIE ALGEMENE SINODE**

### **8.1 Besluitnemingsproses van die Algemene Sinode**

(Handelinge 1994, bl 439, 2.6.4)

### **8.2 Beter skakeling tussen kommissies van die Algemene Sinode**

(Handelinge 1982, bl 1179, 2.5.6.8.2; Kerkordeboek 1990, bl 87, 1)

### **8.3 Geldigheid van besluite**

(Handelinge 1994, bl 426, 11.4)

### **8.4 Gesag en status van die Algemene Sinode**

(Handelinge 1994, bl 439, 2.5.3.4; Handelinge 1998, bl 446, 4.2)

### **8.5 Ontvanklikheid van sake by kommissies van die Algemene Sinode**

(Handelinge 1982, bl 1358, 4; Kerkordeboek 1990, bl 88, 3)

### **8.6 Oorvleuelende opdragte aan ad hoc-kommissies**

(Handelinge 1998, bl 423, 1.6.1; Handelinge 1998, bl 445, 4.1)

### **8.7 Opdragte aan kommissies van die Algemene Sinode "van die vloer af"**

(Handelinge 1994, bl 437, 2.1).

### **8.8 Predikante wie se locus standi verander**

(Handelinge 1994, 454, 3.1.3)

- 8.9      Prosedure by vulling van 'n vakante pos vir 'n predikant in Algemene Sinodale Diens**  
(Handelinge 1990, bl 637, 4.1.10.4; Handelinge 1994, bl 483, 2.60)
- 8.10     Sittingsreg van ouderling wat predikantsbevoegdheid verkry**  
(Handelinge 1994, bl 452, 2.11.6)
- 8.11     Stilword en meditasie**  
(Handelinge 1994, bl 426, 7.3)
- 8.12     Verlofreelings tydens Sinode**  
(Handelinge 1994, bl 424, 6)
- 9.        BEDIENING VAN DOOPLIDMATE IN SKOOLKOSHUISE**  
(Handelinge 1990, bl 605, 2.1.9.4)
- 10.      BEDIENING VAN SAKRAMENTE DEUR PROPONENTE**  
(Handelinge 1998, bl 463, 1.7)
- 11.      BEROEPBAARHEID VAN LERAARS BINNE DIE FAMILIE VAN NG KERK**  
(Handelinge 1994, bl.452, 2.8.6)
- 12.      BRITS-ISRAELSE BEWEGING**  
(Handelinge 1990, bl 559, 6.2)
- 13.      BYBEL**
- 13.1     Bybelsondag**  
Die Algemene Sinode besluit die laaste Sondag in Augustus word as Bybelsondag in die Jaarboek van die NG Kerk aangeteken. (Handelinge AS 2002, bl. 570:7.4.1.2).
- 13.2     Nuwe Bybelvertalings**
1.      Die Algemene Sinode neem met waardering kennis van die bereidheid van uitgewers en individue om mee te werk aan die daarstel van verskillende nuwe vertalings van die Bybel of dele van die Bybel.
  2.      Die Algemene Sinode bevestig opnuut dat lidmate opgeroep word tot intensiewe bestudering van die Woord en dat alle moontlike sinvolle hulpmiddele hiervoor benut behoort te word.
  3.      Die Algemene Sinode wys lidmate en gemeentes daarop dat die 1933(1953)- en 1983-vertalings die Bybels in Afrikaans is wat amptelik deur die kerk vir gebruik in die erediens aanvaar is. Die Bybelvertalerspaneel van die Nuwe Afrikaanse Bybel (1983-vertaling) is vooraf deur die betrokke kerke goedgekeur en hierdie Bybel is op 2 November 1983 as amptelike Bybel deur die NG Kerk aanvaar. Alternatiewe vertalings kan daarom baie waardevol en nuttig wees, maar behoort nie die amptelik goedgekeurde Bybel op die kansel te vervang nie. Dit sluit egter nie uit dat selfs in die

erediens by geleentheid op verantwoordelike wyse na ander vertalings verwys kan word nie.

## **14. DOOP**

### **14.1 Doop van kinders in pleegsorg**

Die Algemene Sinode besluit dat kinders in pleegsorg gedoop kan word en lê die volgende riglyne neer:

1. Die finale besluite berus by die betrokke kerkraad wat in alle gevalle moet waak teen die misbruik van die sakramente.
2. Waar die doop van 'n kindjie gewoonlik die resultaat is van die besluite van 'n ouer(s) en 'n kerkraad, kom in die geval van 'n pleegkind ook ander instansies wat die pleegplasing bestuur, ter sprake. Daar kan eers tot die doop oorgegaan word nadat die kerkraad deur samesprekinge met pleegouers en die pleegsorginstansie homself daarvan vergewis het dat die betrokke pleegplasing na alle waarskynlikheid van 'n langtermyn aard is.  
(Handelinge 1994, bl 474, 10.2.2.1)

### **14.2 Doop van Kinderhuiskinders**

1. Die Algemene Sinode 2002 oordeel dat die besluit van die Algemene Sinode 1998 oor die bediening van die doop aan 'n kinderhuiskind ouer as 7 jaar wat dit begeer, die implikasie het dat 'n persoon of persone naas die eie, pleeg- of aanneemouers by die doop op die formulier kan antwoord en vir die geestelike opvoeding van 'n kinderhuiskind verantwoordelikheid kan neem. Die moontlikheid bestaan dus dat 'n ongedoopte kinderhuiskind van 7 jaar en ouer, wie se kinderhuisplasing 'n min of meer permanente vorm aangeneem het, gedoop kan word.
2. Die Algemene Sinode handhaaf die besluit dat die kinderhuis of gemeente nie korporatief as pleegouer kan optree vir doeleindes van die aflê van en die uitvoering van die doopgelofte nie. Kerkrade kan wel, nadat die biologiese ouers, waar moontlik, daarvoor geraadpleeg is, lidmate van die gemeente wat bereid is om verantwoordelikheid te neem vir die verbondsoopvoeding, aanwys om as doopgetuies of geestelike voogde op die formulier te antwoord by die bediening van die doop aan 'n kinderhuiskind ouer as 7 jaar.
3. Die Algemene Sinode oordeel dat by die doop van en daarna by die nagmaalbediening aan 'n kinderhuiskind die begeerte eers van die kinderhuiskind self moet kom en dat kerkrade daarteen moet waak dat ander oorweginge nie 'n aanleidende rol speel nie. Net soos alle kinderhuiskinders bo 7 jaar nie sonder meer gedoop kan word nie, kan alle dooplidmate nie sonder meer tot die nagmaaltafel toegelaat word nie. Dit is dus nie besluite wat kerkrade sonder die uitgesproke begeerte van die ongedoopte of dooplidmate en sonder die versekering van behoorlike ouerlike of plaasvervangende begeleiding en sorg kan neem nie. (Handelinge AS 2002, bl. 567: 3.3.2).

### **14.3 Doop van kinders uit buiteland**

1. As lidmate wat net tydelik in die buiteland woon, hul kind in 'n ander gemeente as hul tuisgemeente in Suid-Afrika wil laat doop, moet hulle die skriftelike toestemming van hul tuisgemeente verkry.

2. As lidmate wat permanent in die buiteland woon en daar by 'n gemeente inskakel, hul kind hier wil laat doop, is die prosedure soos volg:
  - 2.1 Hulle moet toestemming van hul gemeente in die buiteland kry;
  - 2.2 Daar word met hulle 'n doopgesprek gevoer.
3. As lidmate wat permanent in die buiteland woon nie daar by 'n gemeente kan inskakel nie, maar hier wil laat doop, word die volgende prosedure gevolg:
  - 3.1 Die kerkraad van die gemeente waar hulle wil laat doop, vra hulle attestaat aan van die gemeente waar hulle lidmate was totdat hulle geëmigreer het;
  - 3.2 Daar word met hulle 'n doopgesprek gevoer;
  - 3.3 Hulle word tydens die gesprek gevra na die redes waarom hulle nie by 'n gemeente kan inskakel nie, en hulle word aangespoor om wel by 'n gemeente in die buiteland in te skakel. (Handelinge AS 2002, bl. 560: 5.1.2).

#### **14.4 Oordoop en herdoop**

(Handelinge 1998, bl 417, 10.5 en bl 469-470, 1.3.6)

#### **15. GELOFTEDAG AS VERSOENINGSDAG**

(Handelinge 1994, bl 560, 694; Handelinge 1994, bl 437)

#### **16. KAPELANE**

1. Kapelane vir diens in die SANW, SAPD, DKD en NIA word as predikante benoem deur die Algemene Sinode/ASK op aanbeveling van die Subkommissie vir Kapelaansdienste en verkry/behou op hierdie wyse predikantsbevoegdheid. Hierdie benoeming impliseer NIE dat die Algemene Sinodale verband enige huidige of toekomstige finansiële verantwoordelikheid teenoor kapelane het of dat enige diens-ooreenkoms tussen die kapelane en die Algemene Sinode tot stand kom nie.
2. Kapelane kan ook na 'n gemeente beroep word. Die Subkommissie vir Kapelaansdienste kan gevra word om hierin behulpsaam te wees.
3. Dit bly die gewenste keuse dat 'n kapelaan aan 'n gemeente gekoppel sal wees. Die keuse van die verbintenis aan 'n gemeente lê by die kapelaan self. Indien hy teen 'n verbintenis aan 'n gemeente besluit, moet hyself die groepversekeringspremie betaal.
4. Kapelane wat graag gekoppel/beroep wil wees, maar dit vind om een of ander rede nie plaas nie, se premie moet deur die ring waarbinne hy/sy bly, gedra word of deur die sinode totdat hy/sy weer gekoppel word aan 'n gemeente of beroep word na 'n gemeente.
5. Die Algemene Sinode besluit dat alle huidige kapelane deur 'n eenmalige besluit van die Algemene Sinode /ASK op voorlegging deur die Subkommissie vir Kapelaansdienste benoem word as kapelane vir die onderskeie kapelaansdienste en verkry/behou op dieselfde wyse as in punt 1 hierbo hulle predikantsbevoegdheid. (Handelinge AS 2002, bl. 568: 6.3.4 en 569: 6.3.8.2).



## **16. KERKLIED**

### **16.1 Amptelike Liedbundel**

Die Algemene Sinode bevestig sy besluit dat die nuwe *Liedboek van die Kerk* die amptelike liedbundel van die NG Kerk is en doen 'n beroep op al die gemeentes om dit met ywer te benut. (Handelinge AS 2002, bl. 536: 2.1.1.3).

## **17. KERKLIKE LIDMAATSKAP**

### **17.1 Besluite 1998**

1. Die Algemene Sinode bevestig dat dooplidmate en belydende lidmate op grond van die verbond volledig lidmate van die kerk is.
2. Die Algemene Sinode handhaaf die praktiese onderskeiding van dooplidmate en belydende lidmate om uitdrukking te gee aan die verskil in verantwoordelikhede rondom lidmaatskap.
3. Die Algemene Sinode besluit dat oordrag van lidmaatskap van een gemeente na 'n ander by wyse van attestaat sal geskied. Die attestaat is 'n getuigskrif van die kerkraad oor die lewe en leer van 'n belydende lidmaat tydens sy/haar verblyf in die gemeente. Die naam van 'n lidmaat wat gedoop is, word saam met dié van sy/haar ouer(s) op die attestaat vermeld. Indien dit nie moontlik is nie, word 'n dooppattestaat uitgereik as getuienis dat die lidmaat gedoop is en, indien moontlik, te getuig oor die lewe en leer van die lidmaat.
4. Die Algemene Sinode besluit dat die kerkraad die attestaat van die lidmaat in ontvangs neem en die pastorale verantwoordelikheid vir die lidmaat moet aanvaar. As sodanig het die kerkraad toesig oor die lewe en leer van die lidmaat. Die kerkraad moet toesien dat die lidmaat aktief meeleeft in die gemeente deur sy/haar gawes beskikbaar te stel tot opbou van die gemeente en die uitbou van die koninkryk van God in die wêreld.  
(Handelinge 1998, bl 454, 4).

### **17.2 Besluite 2002**

1. Die Algemene Sinode aanvaar die volgende uitgangspunte vir die hantering van kerklike lidmaatskap:
  - 1.1 Insluiting in die verbond (soos deur die doop bekragtig) is die grond vir volledige lidmaatskap.
  - 1.2 Lidmaatskap van 'n gemeente (nie noodwendig die een binne wie se geografiese grense gewoon word nie) is verpligtend.
  - 1.3 By watter gemeente ingeskakel word, is *primêr* die verantwoordelikheid van die lidmaat.
  - 1.4 Gemeentes bly geografies ingedeel sover die geografiese gebied verstaan word as daardie gebied waarvoor die gemeente die institusionele verantwoordelikheid aanvaar om daar die koninkryk van God op elke terrein te bevorder.
2. Die Algemene Sinode handhaaf die gebruik om gemeentes geografies af te baken.
3. Die Algemene Sinode besluit dat die formele aflegging van geloofsbelydenis ingeklee word as 'n getuienis van persoonlike geloof in Jesus Christus, onderskrywing van die Gereformeerde leer soos vervat in die Ou- en Nuwe Testament en die artikels van die Christelike geloof en gereedheid om leiding te neem in die gemeente.
4. Die Algemene Sinode gee opdrag aan die Algemene Jeugkommissie om toe te sien dat die kategetiese materiaal doelgerig aandag gee aan leerstellinge en praktiese toerusting

van lidmate om hulle diens verantwoordelikheid in die gemeente en gemeenskap te kan aanvaar.

5. Die Algemene Sinode besluit dat die onderskeid tussen doop- en belydende lidmaatskap nie dui op dubbele lidmaatskap nie, maar slegs 'n onderskeid in die proses van lidmaatskap ontwikkeling aandui.
6. Omdat die ontwikkeling na belydende lidmaatskap gepaard gaan met die gereedheid om meerdere verantwoordelikheid tot diens leiding in die gemeente te aanvaar, besluit die Algemene Sinode dat slegs belydende lidmate tot die ampte (diens leierskap) gekies word.
7. Die Algemene Sinode gee opdrag aan die AKG om 'n studie te doen oor die faktore wat 'n rol speel in die besluitnemingsproses van lidmate wanneer by 'n gemeente ingeskakel moet word. Aan die hand hiervan word die AKG opdrag gegee om so gou moontlik riglyne aan gemeentes beskikbaar te stel aan die hand waarvan lidmate gelei kan word om op verantwoordelike en sinvolle wyse by gemeentes in te skakel.
8. Die Algemene Sinode besluit om punte 3.2.2.1 tot 3.2.2.4 te aanvaar as praktiese riglyne vir die hantering van lidmaatskap en attestasie.

Die bewoording in die laaste paragraaf van 3.2.2.2 word vervang met:

- (1) Kerkrade wat 'n lidmaat van buite die gemeente grense ontvang, gee daarvan kennis aan die kerkraad van die gemeente waar die lidmaat woon. Dieselfde bewoording geld ook wat 3.2.2.3 betref.
- (2) Die ARK kry opdrag om die riglyne te integreer en in die Kerkorde op te neem in plek van die huidige beleidsbesluit 14.

Die Sinode besluit dat die praktiese hantering van attestate en spesifiek die prosedure met betrekking tot lidmaatskap oor grense heen, onmiddellik van krag is.

9. Lidmate van ander kerke wat versoek om in te skakel, word hanteer in terme van bestaande besluite van die Algemene Sinode. Waar sulke persone se doop erken word, kan hulle inskakel in die gemeente en deelneem aan die sakramente.
10. Die Algemene Sinode besluit om die volgende Begripverklaring oor kerklike lidmaatskap in Die Kerkorde op te neem: Die term *kerklidmaat* of *lidmaat* is 'n aanduiding van 'n bepaalde band tussen 'n gemeente en 'n individu waarvolgens die gemeente van Jesus Christus die individu as deel van daardie gemeente se verbondsverhouding met die drie-enige-God aanvaar en waarvolgens die individu deelneem aan die diens van die gemeente aan God, medemens en skepping. 'n *Dooplidmaat* in hierdie verband is 'n lidmaat wat gedoop is, maar nog nie belydenis van geloof afgelê het nie. 'n *Belydende lidmaat* is 'n lidmaat wat in 'n erediens belydenis van geloof afgelê het. Hierdie onderskeiding dui nie op dubbele lidmaatskap nie, maar is slegs aanduiding van 'n lidmaat se gereedheid tot aanvaarding van meerdere verantwoordelikheid in leidinggewende verband in 'n gemeente as belydende lidmaat.
11. Die Algemene Sinode besluit dat belydende lidmaatskap deur 'n tughandeling beëindig kan word as uiterste stap van tug. So 'n persoon kan slegs deur belydenis van geloof weer belydende lidmaat word nadat die tug opgehef is.
12. Vanweë die implikasie van hierdie besluit van die Algemene Sinode in die lig van Art. 10 van die Kerkorde (1998) en die NGB art. 16, besluit die Algemene Sinode om die hele verslag van die Ad Hoc-kommissie vir Kerklidmaatskap (Agenda bl. 306-311 punt 2.6) na die ARK te verwys om opnuut te kyk na al die aanbevelings. (Handelinge AS 2002, bl. 559: 2.6.4 en 560).

### **17.3 Riglyne vir Praktiese hantering van lidmaatskap**

1. Persone kan binne geografiese grense van 'n bepaalde gemeente *intrek* en lidmaatskap van daardie gemeente verlang.
  - 1.1 Lidmate handig self hulle attestate by die nuwe gemeente in of versoek die administratiewe amptenaar van die gemeente om dit van die vorige gemeente aan te vra.
2. Persone kan binne die geografiese grense van 'n gemeente *intrek en lidmaatskap van 'n ander gemeente verlang*.
  - 2.1 Gemeentes behoort nie sonder meer sulke lidmate te verwelkom as die motivering vir hulle keuse om in te skakel verband hou met slegte verhoudings tussen die persoon(-ne) en iemand anders in die gemeente vanwaar hulle kom nie. In so 'n geval moet die kerkraad deur pastorale begeleiding die saak hanteer en in die reïne bring.
  - 2.2 Gemeentes behoort net lidmate van buite hulle geografiese grense te aanvaar indien dit prakties moontlik is om sulke lidmate te bedien waar hulle won en dit vir sulke lidmate prakties moontlik is om aktiewe lidmate te wees van die geloofsgemeenskap. (’n Uiterste voorbeeld illustreer dit: Dit sal bv. onprakties en onaantoonbaar wees as ’n lidmaat van Laingsburg sou besluit om by Roodepoort in te skakel. Die kerkraad van Roodepoort sou in die geval van so ’n versoek om erkenning as lidmaat dit alleen kon aanvaar as die kerkraad die vermoë het om die lidmaat in Laingsburg te versorg en as die lidmaat in Laingsburg die vermoë het om in te skakel by die gemeente-aktiwiteit in Roodepoort.)
  - 2.3 Lidmate versoek skriftelik die gemeente waar hulle wil inskakel om as lidmate aanvaar te word en verskaf die nodige dokumentasie soos attestate en doopbewyse waar nodig. Die gemeente wat so ’n aansoek ontvang kan lidmate help met die verkryging van hierdie dokumente.
  - 2.4 Kerkrade wat 'n lidmaat van buite die gemeentegrense ontvang, gee daarvan kennis aan die kerkraad van die gemeente waar die lidmaat woon.
3. Persone kan binne die geografiese grense van 'n bepaalde gemeente *intrek en verlang om lidmaat te bly van die gemeente waar hulle lidmaat was*.
  - 3.1 Kerkrade wat 'n lidmaat van buite die gemeentegrense ontvang, gee daarvan kennis aan die kerkraad van die gemeente waar die lidmaat woon.
4. Persone kan vir 'n *tydperk lidmaat van 'n bepaalde gemeente wees* (hetsy omdat hulle binne die grense woon of oor grense lidmaatskap bekom het) *en besluit om lidmaat van 'n ander gemeente te word*.
  - 4.1 Lidmate moet die kerkraad waar hulle lidmaat is daarvan in kennis stel met opgaaf van redes. Indien die kerkraad bevind dat die redes vir verandering van lidmaatskap nie kwaadwillig is nie, kan die attestaat na die nuwe gemeente oorgeplaas word.

### **18. KERKRADE WAT DIT NIE KAN BEKOSTIG OM TE BEROEP NIE**

(Handelinge 1994, bl 510,3.4

### **19. LEGITIMASIE MET BEPERKTE OPDRAG**

Die Algemene Sinode keur goed dat:

1. 'n Aansoek om legitimasie met beperkte opdrag vanaf 'n kerkraad, met goedkeuring van die plaaslike ring, aan die ARK gerig word.
2. Die gronde vir die aansoek, in terme van die vereistes van legitimasie (Art 5) deur die ARK beoordeel moet word alvorens die ARK 'n besluit daarvoor neem, met verslag aan die Algemene Sinode.

3. Dat die beperking slegs betrekking het op die opdrag van die kandidaat (dws 'n beperking van beroepbaarheid tot 'n besondere streek, of kategoriale bediening) en nie op bevoegdheid as sulks nie. (Volle predikantsbevoegdheid bly 'n vereiste).
4. Dat beroeping slegs mag plaasvind nadat die ARK skriftelike toelating tot die bediening gegee het (= legitimasie).
5. Kandidate uit nie-lidkerke van die NG Kerk-familie *colloquium doctum* voor 'n Eksamenkommissie van die NG Kerk moet aflê. (Handelinge AS 2002, bl. 556: 1.3.3).

## **20. MISBRUIKE RONDONOM DIE BEROEPSTELSEL**

1. Die Algemene Sinode oordeel dat daar talle misbruike rondom die "advertering" van vakatures van leraarsposte en die samestelling van groslyste in die huidige beroepstelsel ontstaan het.
2. Die Algemene sinode wys beroepende vergaderinge, ringe en sinodes daarop dat die vergunning wat die Algemene Sinode in 1990 gemaak het ten opsigte van bekendstelling van vakatures en 'n alternatiewe wyse van samestelling van groslyste slegs die volgende behels:
  - 2.1 Die kerkraad kan die vakature in Die Kerkbode bekendstel met 'n aanduiding van die besondere vereistes wat ten opsigte van die vakature gestel word. Predikante en proponente kan dan op die bekendstelling reageer deur hulle name tesame met 'n *curriculum vitae* aan die kerkraad voor te lê.
  - 2.2 Kerkrade het die reg om predikante te versoek om hulle *curriculum vitae* met die oog op beroeping te voorsien.  
(Handelinge 1998, bl 406, 1.3.2).

## **21. NG KERKSEEL**

Die Algemene Sinode bevestig die volgende as sy standpunt tov die NG Kerkseel: Die kerkseël is die eiendom van die Algemene Sinode; dit is 'n seel van "amptelikheid" en is beperk tot die Algemene Sinode se werksaamhede; persone/instansies kan die seël slegs gebruik met die verlof van die ASK; hulle moet skriftelik daarvoor aansoek doen. (Handelinge AS 2002, bl. 568: 3.5.2).

## **22. NAGMAAL**

### **22.1 Oop of geslote**

(Handelinge 1994, bl 434, 27.6)

### **22.2 Gereelde viering van nagmaal**

1. Die Algemene Sinode bevestig 'n vorige besluit dat die volledige Christelike erediens beide Woordbediening en Nagmaalviering insluit.
2. Die Algemene Sinode moedig gemeentes weer eens aan om nader te beweeg aan die rigting van 'n weeklikse viering van die nagmaal. Die Algemene Sinode doen dit met die oortuiging dat dit die beste Bybelse praktyk is, dat die sakramente maniere is waarop God na ons kom en dat dit ook die Woordbediening kan versterk.
3. Die Algemene Sinode is daarvan oortuig dat die meer gereelde viering van die nagmaal 'n onbereikte ideaal sal bly indien die gemeente nie die geloofversterkende nut daarvan beleef nie. Gemeentes en liturge word aangemoedig om die volgende paar jaar besondere erns te maak met die inkleding van die nagmaal.

4. Die Algemene Sinode aanvaar dat wat betref die hoe van die viering van die nagmaal die gereformeerde tradisie nooit voorskriftelik was nie. Daar is in die gereformeerde tradisie byvoorbeeld verskillende praktyke rondom die kommunie van die gemeente gangbaar. Die Algemene Sinode handhaaf die beginsel van vryheid, en versoek gemeentes om hulle in hul besluite hieroor te laat lei deur die beginsels van die Skrif en die wens dat die gemeente opgebou en gestig sal word deur die viering van die nagmaal. (Handelinge AS 2002, bl. 537: 2.2.4.2).

### **22.3 Nagmaal in kleingroepe**

Aangesien daar by 'n toenemende aantal lidmate 'n behoefte is aan 'n nagmaalsbeleving in kleiner, meer intieme groepe, en daar geen Bybelse beswaar daarteen is nie, besluit die Sinode dat nagmaal voortaan ook in kleingroepe in die gemeente bedien mag word onder dieselfde voorwaardes as wat in die gemeentes as geheel geld. (Handelinge AS 2002, bl. 537).

### **22.4 Toelating van kinders tot Nagmaal**

1. Die Algemene Sinode besluit dat
  - \* gedoopte kinders wat in Jesus Christus glo,
  - \* aan die vereistes van 1 Kor 11 voldoen, en
  - \* die begeerte het om nagmaal te gebruik tot die nagmaal toegelaat mag word.
2. **Praktyk van toelating van kinders by die Nagmaal**

Die Algemene Sinode besluit dat ter wille van die goeie orde en eenheid van die kerk die toelating van kinders tot die nagmaal op die volgende wyse geskied:
- 2.1 Kerkrade besluit wanneer die gemeente daarvoor gereed is. Die Algemene Sinode besluit om kerkrade te versoek om die gemeentes te begelei en toe te rus, en so tot gereedheid te voer vir toelating van kinders tot die gebruik van nagmaal as 'n gesinsmaal. Hierdie leiding moet op 'n pastorale wyse met groot liefde en toewyding gedoen word.
- 2.2 **Ouers se verantwoordelikheid**

Ouers het die verantwoordelikheid om hulle kinders voortdurend te begelei en te onderrig in die volle rykdom van die betekenis van die nagmaal, net soos kerkrade die plig het om volwassenes te begelei.
- 2.3 Dit is die verantwoordelikheid van elke kerkrade om spesifieke reëlings te tref oor die wyse waarop die toelating plaasvind.
- 2.4 Die Algemene Sinode beklemtoon dat ouers hulle kinders moet begelei met die oog op die kinders se deelname aan die nagmaal en om die besondere geleentheid te benut om saam met hulle kinders die nagmaal te gebruik.
- 2.5 Die Algemene Sinode versoek kerkrade om deurlopend aandag te gee aan die toerusting en begeleiding van ouers sodat hulle hulle kinders kan begelei in die deelname aan die nagmaal.
- 2.6 Die Algemene Sinode besluit:
  - 2.6.1 By die toelating van kinders tot die nagmaal verval belydenisaflegging as toelatingsvoorwaarde vir die nagmaal.
  - 2.6.2 Die praktyk van katelese en belydenisaflegging word gehandhaaf in ooreenstemming met die vorige besluite van die Algemene Sinode.  
(Handelinge 1998, bl 432, 4)

### **22.5 Kinders aan die Nagmaalstafel**

1. Die Algemene Sinode handhaaf sy besluit van 1998 dat gedoopte kinders wat in Jesus Christus glo, aan die vereistes van 1 Kor 11 voldoen, en die begeerte het om nagmaal te gebruik, tot die nagmaal toegelaat mag word.
2. Die Algemene Sinode keur die volgende aanbevelings van die ASK (Agenda 2002 bl 344) as beginsel-standpunt goed:
  - 2.1 Kerkrade het 'n deurlopende verantwoordelikheid om doop- en belydende lidmate toe te rus en te begelei vir die Christelike leer en lewe.
  - 2.2 Kerkrade het daarom ook 'n verantwoordelikheid om die besluit van die Algemene Sinode 1998 oor die toelating van kinders tot die nagmaal uit te voer. In hierdie proses moet daar deurlopende begeleiding van ouers en kinders plaasvind, omdat die ouers so 'n belangrike rol by die kind se sinvolle gebruik van die sakrament speel. Kerkrade kan hiervoor die prediking, kategese, die pastorale werk van predikant, ouderling en diaken en ander vorme van begeleiding, inligting en voorligting gebruik.
  - 2.3 Met betrekking tot die toelating van dooplidmate tot die nagmaal tref elke kerkrade toepaslike reëlings in die lig van plaaslike omstandighede. Wykskerkeraadslede en/of kategete kan ook in die opsig saam met die ouers betrek word. (Handelinge AS 2002, bl. 552: 15/16).

## **23. OMRUILING VAN STANDPLASE**

### **23.1 Besluite 1994**

1. Leraars wat weens buitengewone omstandighede daartoe verplig word of wat 'n omruiling van standplaas begeer, kan in oorleg met die betrokke kerkrade reëlings tref vir die omruiling van hulle standplase.
2. Sodanige reëlings moet in 'n geskrewe ooreenkoms deur die betrokke kerkrade goedgekeur word waarna dit vir goedkeuring aan die ring/ringskommissie voorgelê word.
3. Hierdie ooreenkoms tot omruiling moet eers deur die betrokke ringskommissies goedgekeur word voordat uitvoering daaraan gegee mag word.
4. Kennisgewing hiervan word in die amptelike blad van die Kerk gegee.
5. Die bepalings ten opsigte van die bevestiging van 'n leraar in 'n gemeente is ook hier van toepassing. (Handelinge 1994, bl 516, 14)

### **23.2 Besluite 2002**

1. Die NG Kerk aanvaar steeds die beroepstelsel as die normale en gewenste praktyk vir die plasing en wisseling van predikante.
2. In die lig van navorsing (Kerkspieël 6) moet erken word dat die groot oorvoorsiening van leraars en weinig vakatures, veroorsaak het dat die beroepstelsel tans nie die nodige gesonde rotasie van predikante te weeg bring nie. Daar is dus behoefte aan 'n aanvullende meganisme wat gesonde wisseling kan help bevorder.
3. Die Algemene Sinode het reeds die beginsel van standplaasruiling goedgekeur as 'n aanvullende meganisme (vgl oa. 1994). Standplaasruiling as 'n aanvullende stelsel kan help om die huidige probleme te hanteer, mits dit as volg gewysig word:
  - 3.1 Die Algemene Sinode benoem 'n kommissie met die bevoegdheid om die omruiling van leraarstandplaas met verskillende sinodale gebiede te inisieer, te onderhandel en te finaliseer. Die Algemene Sinode adviseer sinodes om kommissies binne die Sinodale gebiede saam te stel wat standplaasruilings binne die streke kan inisieer, onderhandel en

finaliseer. Die Algemene Kommissie word saamgestel met een verteenwoordiger van elke streek sinode. Die voorsitter van die AKPB tree op as sameroeper.

- 3.2 Die Algemene Sinode versoek die kommissie om binne die raamwerk van die volgende uitgangspunte riglyne op te stel vir die implementering van die stelsel:
  - 3.2.1 *Roeping*: In die proses van standplaasverwisseling moet die roeping van die leraar en die werk van die Heilige Gees in ag geneem word. Hierdie proses word gesien as een van die maniere waarop die Here leraars na gemeentes kan roep.
  - 3.2.2 *Bona fides*: Bedieningsvernuwing en persoonlike omstandighede dien (onder andere) as bona fide redes vir verwisseling. Die betrokke partye oorweeg die meriete van die saak. Dit gaan om bona fide redes vir verwisseling van standplase. Die proses mag bv nie gebruik word om dreigende tughandeling te ontduik nie.
  - 3.2.3 *Ooreenkoms*: Aangesien die leraar en kerkrad in 'n werksverhouding staan wat amptelik by wyse van Kerkordebepalings gereguleer word, sal dit in die handeling rondom verwisseling van standplase verreken moet word. Die regte en voorregte van albei partye, die kerkrad en die leraar, sal in ag geneem moet word. Dit bied egter wel die geleentheid dat verwisseling by wyse van ooreenkoms gereël kan word (na analogie van Art.7 van die Kerkorde 1998). 'n Proses waarvolgens kerkrade en leraars 'n ooreenkoms tot verwisseling aangaan, waarvoor albei partye eienaarskap aanvaar, moet moontlik gemaak word.
- 3.2. *Verwisseling*: Die kerkverband en sinodale begeleiers dwing nie verwisseling af nie maar skep 'n geleentheid vir die partye tot verwisseling. Dit vervang nie die huidige beroepstelsel nie.
  - 3.2.5 *Die Kerkverband*: Die kerkverband speel in die verband 'n bemiddelende en fasiliterende rol. Hier het ringe, sinodes en die Algemene Sinode elk 'n eie rol te vervul.
  - 3.2.6 *Beroeping*: Die skriftelike ooreenkoms waartoe deelnemende partye kom om van standplaas te verwissel, is 'n geldige beroep en vereis nie 'n aparte beroepshandeling nie. Die ooreenkoms moet voor finale ondertekening vir twee agtereenvolgende Sondae vir approbasie aan die betrokke gemeentes voorgelê word. (Vgl. die analogie in Reglement 6: 3.1.3)
  - 3.2.7 *Multilaterale verwisseling*: In gevalle waar 'n bilaterale passing nie bewerkstellig kan word nie, sou multilaterale passings oorweeg kon word.
- 3.3 Ter wille van die verdere ondersteuning van die nuwe stelsel versoek die Algemene Sinode die kommissie om ondersoek in te stel na 'n sisteem waarvolgens alle predikante in die reël na 7 jaar in 'n gemeente op 'n standplaasverwisselingslys kom. Die kommissie lewer hieroor verslag met aanbevelings aan die ASK in die interim. (Handeling AS 2002, bl. 444: 7.3.1).

## **24. OUTEURSREG EN SANGBUNDELS**

Die Algemene Sinode betuig instemming met die besluit van die ASK, nl.

1. dat die algemeen-aanvaarde beginsel van tantieme by die gebruik van publikasies ook in die geval van kerklike sangbundels gehandhaaf word omdat dit onder andere die uitgewers geldelik in staat stel om voort te gaan om hierdie diens aan die kerk te lewer;
2. dat enige gemeente wat 'n seleksie van kerklidere publiseer, hulle aan moontlike geregtelike vervolging blootstel;

3. dat gemeentes wat liedere op skerms wil vertoon, aan die volgende voorwaardes moet voldoen:
  - 3.1 hulle moet verlof by die uitgewer kry om die betrokke kerklied te mag vertoon op skerms of vertoonapparaat;
  - 3.2 gemeentes en ander kerklike gebruikers moet elektroniese pakkette of truprojektor-materiaal, indien beskikbaar, vir die vertoon van liedere by die uitgewer aankoop;
  - 3.3 gemeentes en ander kerklike gebruikers moet jaarliks 'n lisensiegeld aan die uitgewer betaal vir die voortgaande vertoonreg van kerkliedere wat self gereproduseer word. (Handelinge 1998, bl 403, 2.5.4)
4. Die Algemene Sinode versoek:
  - 4.1 gemeentes om nie onwettige bundels saam te stel uit bestaande bundels van die kerk of uit ander bundels nie; om waar dit wel bestaan, dit nie langer te gebruik nie; om kopie- en outeursregte te eerbiedig;
  - 4.2 gemeentes om die aangewese weg te volg vir die keuse en gebruik van nuwe of ander liedere en om nie ongekeurde liedere te sing nie. (Handelinge 1998, bl 433, 6.5)
5. die Algemene Sinode bevestig sy besluit dat die nuwe *Liedboek van die Kerk* die amptelike liedbundel van die NG Kerk is en doen 'n beroep op al die gemeentes om dit met ywer te benut.
  - 5.1 die Algemene Sinode moedig gemeentes aan wat liedere elektronies projekteer, om te verseker dat die nodige lisensie(s) uitgeneem is en jaarliks hernu word. (Handelinge AS 2002, bl. 536: 2.1.1.3 en bl. 573: 8.3).

## **25. PREDIKANTE**

### **25.1 Jaarlikse aanmelding**

Die Algemene Sinode besluit dat alle dienende predikante jaarliks via hulle gemeenteskriba die skriba (bevoegdheidsregister) van die ARK moet inlig oor hulle huidige gemeente en posisie. (Handelinge AS 2002, bl. 562: 3.1).

## **26. PROPONENTE**

### **26.1 Proponente wat medies ongeskik raak**

(Handelinge 1994, bl 452, 2.9.4)

### **26.2 Simboliese gebare**

Die Algemene Sinode besluit dat proponente die simboliese gebare by die seëngroet en seën, wat gepaard gaan met die Woordbediening in liturgie en prediking, kan uitvoer.



**27. SAMESTELLING VAN KERKRADE**

Die Algemene Sinode besluit om al die sinodes en al die ringe dringend te versoek om toe te sien dat alle kerkrade saamgestel is soos neergelê deur die Belydenisskrifte en die Kerkorde. (Handelinge 1998, bl 464).

**28. SINODALE GRENSWYSIGINGE**

(Handelinge 1994, bl 455, 7.2.1.2)

**29. VRYMESSELARY**

(Handelinge 1990, bl 718, 4)

# INDEKS

<b>A</b>	
Afstigting van gemeente .....	51
Akte van legitimasie .....	
Deur Algemene Regskommissie uitgereik .....	83
Nietigverklaring .....	28
Algemene Jeugkommissie .....	
Konstituering en vergaderings .....	71
Naam, samestelling, opdrag .....	71
Algemene Kommissie vir die Erediens .....	
Reglement, naam, samestelling, opdragte en verslag .....	112
Algemene Kommissie vir Argief en Inligting .....	
Konstituering en vergaderings .....	39
Reglement, naam, samestelling, opdrag .....	39
Rekordbeheer .....	39
Algemene Kommissie vir die Diens van Barmhartigheid .....	
Opdrag en bevoegdhede .....	49
Reglement, naam, doelstelling .....	49
Samestelling .....	49
Vakatures .....	49
Algemene Kommissie vir die Erediens .....	
Reglement, naam, samestelling, opdrag .....	112
Algemene Kommissie vir Diensverhoudinge .....	
Reglement, naam, samestelling, opdrag .....	111
Algemene Kommissie vir Fondse .....	
Reglement, naam, samestelling, opdrag .....	19, 47, 58, 60, 61, 62, 63
Algemene Kommissie vir Gemeentebediening .....	
Konstituering en vergaderings .....	59
Naam, samestelling en opdrag .....	4, 59, 101
Algemene Kommissie vir Getuienisaksie .....	
Reglement, naam, samestelling, opdragte en verslag .....	110
Algemene Kommissie vir Kerklike Media .....	
Konstituering en vergaderings .....	72
Naam, samestelling en opdrag .....	72
Algemene Kommissie vir Leer en Aktuele Sake .....	
Konstituering en vergaderings .....	75
Reglement, naam, samestelling en opdrag .....	75
Algemene Kommissie vir Teologiese Opleiding .....	
Reglement, naam, samestelling, opdragte en verslag .....	76, 101
Algemene Kommissie vir Vrouelidmate .....	
Konstituering en vergaderings .....	109

Reglement, naam, samestelling, opdrag.....	109
Verteenwoordiging op ander kommissies.....	37, 49, 59, 75, 93, 109, 112
Algemene Regskommissie.....	3, 6, 7, 29, 42, 43, 44, 45, 62, 78, 82, 83, 85, 92, 96, 107, 111, 114, 115
Behartig legitimasie.....	92
Kennisgewing i.v.m. diensbeëindiging van predikant.....	3, 7
Konstituering en vergaderings.....	92
Reglement, naam, samestelling en opdrag.....	92
Toelating tot die bediening van die Woord.....	29
Verlening van bevoegdheid.....	3, 29, 44
Algemene Sinodale Kommissie	
Appèl i.v.m. verlies van bevoegdheid.....	10
Buitengewone Algemene Sinode.....	18
Konstituering en vergaderings.....	37
Opdrag.....	37
Reglement, naam, samestelling en vakatures, opdrag.....	37
Samestelling.....	17
Algemene Sinodale Kommissie vir Getuienis	
Konstituering en vergaderings.....	93
Opdrag.....	60, 93, 95
Reglement, naam, samestelling, opdrag.....	93
Algemene Sinode	
Agenda.....	86, 87, 88, 89, 90
Appèl.....	13
Appèl i.v.m. verlies van bevoegdheid.....	10
Assessor nie herkiesbaar.....	86
Beëindiging van bevoegdheid.....	28
Behandeling van sake.....	88
Beskrywingspunte.....	89
Gekonstitueer.....	86
Geloofsbriewe.....	86
Geloofsbriewe en verslae by buitengewone vergadering.....	86
Kommissie vir kommissies.....	90
Kworum.....	86
Moderator nie herkiesbaar.....	86
Moderatuur.....	17, 86
Moderatuur verkies.....	17, 86
Mosie van orde.....	89
Notule.....	91
Reglement van orde.....	50
Samestelling.....	17
Skriba.....	13, 86, 89, 90
Sluiting.....	17, 91
Spoedeisende sake.....	89
Spreekbeurt.....	86, 88, 89
Stemming.....	87
Taak van die.....	18
Tot wie hy hom rig.....	91

Tydlike kommissies .....	90
Vakatures in kommissies .....	90
Verslae.....	86, 89
Voorster by buitengewone vergadering.....	86
Voorstel of amendement teruggetrek.....	89
Voorstelle en amendemente.....	89
<b>Ampte</b>	
Algemene bepalinge .....	1
Bedienaars van die Woord.....	1
Besondere .....	1
Gelykwaardig.....	2
Ander Christelike kerke en groepe .....	102
Groeperinge van die Christendom .....	102
<b>Appèl</b>	
Beslissing van die Sinodale Appèlriggaam is finaal .....	12
By diensbeëindiging .....	10
Kennis van.....	12, 13
Na die Algemene Sinode .....	18
Op grond van die Skrif, die Belydenis of die Kerkorde.....	12
Ring of sy gevolmagtigde appèlkommissie .....	12
Teen besluite van kerkrade .....	12
Teen besluite van ringe en ringsappèlkommissies .....	12
Teen besluite van sinodes.....	12
Teen tugmaatreëls.....	28
Verlies van bevoegdheid .....	10
<b>Appèlriggaam</b>	
Middele tot beskikking van .....	14
Appèlriggaam: .....	12, 13, 14
<b>B</b>	
<b>Bedienaar van die Woord</b>	
Ampsplygte binne grense van ander gemeente.....	6
Bediening van die Woord.....	19
Beroep - rol van die Ring/Ringskommissie .....	3, 5
Beroep vir diens in kerkverband.....	3
Deur 'n kerkraadsvergadering beroep.....	3, 4
Leiding van eredienste.....	19
Lewensonderhoud .....	10
Onbekwaam vir diens .....	7
Onbevredigende diens .....	7
Ondersoek na ongeskiktheid of onbekwaamheid vir diens.....	7
Ongeskik vir diens.....	7
Opheffing van tugmaatreëls.....	29
Summiere ontslag .....	28
Toelating tot die bediening.....	2
Toepaslike evaluering, toerusting, begeleiding van.....	7
Tugmaatreëls .....	28
Uit diens van die gemeente ontslaan met behoud van bevoegdheid .....	28

Uittrede weens verswakte gesondheid of ouderdom.....	10
Belydende lidmate	
Tugmaatreëls .....	27
Belydenis	
Formuliere van eenheid .....	1, 2, 74, 81, 84, 96, 102, 104
Vasstelling .....	18
Wysiging van die.....	18
Beroepbaarheid	
Van predikante binne die familie van NG Kerke.....	117
Beroeping	
Prosedure by dosente.....	79
Van dosente.....	78
Beroepsbrief	
Bepalings van.....	4
Diensaanbod.....	3
Pro forma.....	4
Bevestiging	
Akte van legitimasie .....	5
Approbasie van die gemeente.....	3
Met oplegging van hande .....	5
Bevoegdheid van predikante en proponente	
Algemene uitgangspunte .....	41
Beperkte bevoegdheid .....	41
Jaarlikse aanmelding voor 30 Junie .....	42, 43, 45, 96, 127
Leraars wat saam met ander kerke werk. ....	114
Reglement vir die reëling van.....	41
Bybel	
Bybelsondag.....	117
Nuwe vertalings.....	117
Bybelgenootskap van Suid-Afrika	
Predikante van die NG Kerk in diens van.....	47, 48
Verteenwoordig op Algemene Kommissie vir Bybelvertaling .....	47
<b>C</b>	
Colloquium doctum	
Afnem van .....	3, 45
Afwysing by die.....	83
Inhoud .....	83
<b>D</b>	
Diens van Barmhartigheid	
Algemene Kommissie vir .....	49
Algemene omskrywing.....	22
Diensbeëindiging	
Advies van die Ring se Kommissie vir Fondse .....	8
Akte van demissie.....	9
Alternatiewe wat oorweeg is.....	8
Appel.....	10

Behuisingsvoordele .....	9
Finansiële onvermoë.....	7, 8, 10
Finansiële onvermoë (bedryfsvereistes).....	8, 99
Geleentheid vir vertoë .....	9
Lewensonderhoud en toelaes.....	9, 10
Mediese ongeskiktheid .....	9
Onbekwaamheid of ongeskiktheid.....	9
Ooreenkoms.....	9
Oorlegpleging .....	9
Prosedures vir.....	7
Redes vir die beoogde .....	8
Summiere ontslag .....	9, 28
Uitstaande verlof .....	9, 10
Verlies van bevoegdheid .....	28
Voorsiening .....	9, 54, 55
Wangedrag.....	7
<b>Diensverhouding</b>	
Kerkradskommissee.....	7, 8
Tussen predikant en kerkrad (werknemer en werkgewer).....	7, 8
<b>Dienswerk</b>	
Van al die gelowiges .....	22
Van die drie besondere ampte .....	1
<b>Doop</b>	
Aanvaarding van doop van ander kerke.....	104
Kind ouer as sewe jaar.....	20
Kinderhuiskinders .....	118
Kinders in pleegsorg.....	118
Kinders uit die buiteland .....	118
Kinders van lidmate van ander kerke.....	103
Oordoop of Herdoop .....	119
<b>Dooplidmate</b>	
Tug .....	24
Tugmaatreëls .....	27
<b>E</b>	
<b>Eenwording van gemeentes</b>	
Reglement, algemene omskrywing en prosedure.....	51
<b>Eiendomme, goedere en fondse</b>	
Algemene Sinodale.....	60
Gemeentelike .....	68
Reglement vir die reëling van.....	60
Sinodale.....	63
Van die ring.....	65
<b>Ekumene</b>	
Alle kerkvergaderinge .....	103
Beleid .....	31
<b>Eredienste</b>	
Inrigting van die .....	19

Leiding van.....	19
Prediking .....	20
Sakramente .....	19
Evangeliebediening	
Toelating tot die.....	2

## **G**

Geskil	
Beslegting.....	113

## **K**

Kerkraad	
Buitengewone vergaderings.....	15
Samestelling .....	14, 128
Vergader minstens vier keer per jaar .....	15
Voorsitter.....	15
Kombinasie van gemeentes	
Reglement, algemene omskrywing en prosedure.....	51
Konflik	
Beslegting.....	113, 114
Kuratorium	
Begeleidingskommissie .....	76, 79
Eksamenkommissie .....	45, 77, 82, 123
Kieskollege .....	78, 79
Samestelling .....	2, 76
Subkommissies .....	77
Verantwoordelikheid .....	76

## **L**

Leer en Aktuele Sake	
Algemene omskrywing .....	22
Legitimasie	
Deur Algemene Regskommissie behartig .....	83
Persone uit inrigtings van erkende kerke.....	84
Persone uit inrigtings van nie-erkende kerke.....	84
Persone uit nie-kerklike inrigtings of fakulteite.....	84
Studente wat in die buiteland studeer het .....	83
Van predikante of proponente uit ander kerke.....	83
Legitimasie-verklaring.....	84
Leraar .....	<i>Kyk by: Bedienaar van die Woord</i>
Lidmaatskap	
Oordrag.....	120
Uitgangspunte en hantering.....	120
Lidmate	
Tug .....	24
Tugmaatreëls opgehef.....	27

## **M**

Mosie van Orde .....	89
----------------------	----

## **N**

### **Nagmaal**

Bedien buite die erediens.....	114
Gereelde viering .....	123
Minstens vier keer per jaar .....	20
In kleingroepe.....	124
Oop of geslote .....	123
Toelating van kinders .....	124
Uitnodiging vir besoekers.....	104

## **O**

Ontbinding van gemeentes .....	54
--------------------------------	----

### **Opleiding en legitimasie van Bedienaars van die Woord**

Doserende personeel aan die teologiese fakulteite .....	78
Reglement, ooreenkoms met die universiteit.....	76

### **Orde**

Reglement van .....	86
---------------------	----

### **Ouderlinge en diakens**

Afgevaardigdes na vergaderinge.....	15, 16, 37, 54
Dienstermyn .....	10
Gereelde aftrede.....	10
Tug .....	16, 24
Tugmaatreëls .....	28

### **Outeursreg**

Liedboek.....	126
Sangbundels .....	126

## **P**

Predikant .....	<i>Kyk by: Bedienaar van die Woord</i>
-----------------	--

### **Prediking**

Belydenisskrifte aan die orde gestel .....	20
--	----

### **Proponent**

Bevestiging van .....	5
Bevoegdhede .....	42
Ouer as 60 jaar.....	42
Simboliese handgebare.....	127

Proponentseksamen .....	81
-------------------------	----

Bykomende vereistes .....	82
Omvang .....	81

Proponentseksamenkommissie .....	<i>Kyk by: Kuratorium: Eksamenkommissie</i>
----------------------------------	---

## **R**

### **Revisie**

Kennisgewing van .....	91
------------------------	----



Ring	
Eiendomme, goedere en fondse .....	65
Werkzaamhede .....	15
Ringskommissie	
Staan die diensverhoudingkommissie by oor verhouding kerkraad-predikant .....	7
<b>S</b>	
Sakramente	
Bediening deur proponente .....	117
Samesmelting van gemeentes	
Reglement .....	51
Sending/getuienis	
Basis vir samewerking met ander kerke en organisasies .....	96
Definisie .....	21, 94, 110
Die NG Kerkfamilie .....	97
Gelegitimeerdes in getuienisdien van ander kerke en organisasies .....	96
Kerklike sendingbetrokkenheid .....	94
Lidmaatskap en kerkverband .....	97
Lidmate saam met ander kerke en sending-/getuienisorganisasies .....	95
Reglement, algemene omskrywing .....	94
Skakeling met die owerheid .....	98
Toerusting vir sending/getuienis .....	95
Simboliese handgebare deur proponente .....	127
Sinode	
Eiendomme, goedere en fondse .....	63
Samestelling .....	16
Taak en bevoegdhede van die .....	16
Vergader ten minste elke vier jaar .....	16
Standplaas	
Omruiling .....	125
Stigting van nuwe gemeentes .....	51
<b>T</b>	
Tentmakerbediening	
Afvaardiging na meerdere vergaderings .....	100
Prosedure vir bestaande en nuwe poste .....	99
Reglement .....	99
Sake wat die aandag van die kerkraad moet geniet .....	99
Tugmaatreëls	
Belydende lidmate .....	27
Dooplidmate .....	27
Evangeliedienaars .....	28
Ouderlinge en diakens .....	28
Tugmaatreëls opgehef	
Bedienaars van die Woord .....	29
Lidmate .....	29
Ouderlinge en diakens .....	29
Tugondersoek	

Deur medelidmaat bygestaan .....	26
Koste .....	27
Prosedure .....	24

**V**

Verlies van bevoegdheid	
Appèl teen .....	10
Bedanking.....	43
Tug .....	43
Verlof van predikante en sinodale amptenare	
Langverlof .....	107
Reglement.....	106
Studieverlof .....	107

**W**

Werkgewer	
Rekord hou van aard van optrede ingevolge Artikel 12 .....	7